

Ынтымақов С. А. Карпушина Т. Д.

Отбасы құқығы

ПРАКТИКУМ

Алматы

2006

ББК 67.99(2)4я7

Ы – 68

Пікір жазған:

ҚазГЗУ-дің азаматтық құқық кафедрасының
меңгерушісі, заң ғылымдарының докторы,
профессор **Диденко А. Г.**

Ынтымаков С. А. Карпушина Т. Д.

Ы – 68 Отбасы құқығы. Практикум.— Алматы: Заң әдебиеті.—
2006.— 128 бет.

ISBN 9965-620-10-5

ҚазГЗУ-дің оқытушылары С.А. Ынтымаков пен Т.Д. Карпушинаның Отбасы құқығы бойынша дайындаған бұл практикумы Қазақстан Республикасының жаңа “Неке және отбасы туралы” заңы негізінде дайындалған алғашқы оқу-әдістемелік құралы болып табылады.

Практикумда есептер отбасы құқығы курсы бойынша қарастырылатын тақырыптарға сәйкес жүйеленіп берілген және онда осы пәннің аса маңызды да күрделі сұрақтары кең көлемде қамтылып отыр.

Практикумға енгізілген есептер тек “Неке және отбасы туралы” заң нормаларымен ғана емес, сондай-ақ азаматтық заңдар мен халықаралық шарттардың ережелері негізінде шығаруды қажет етеді.

Сондай-ақ, айта кету керек, кейбір есептер арнайы Қазақстан Республикасы Жоғарғы Сотының Қаулыларын қолданбаған жағдайда дұрыс шығару мүмкін болмайтындай етіп құрастырылған.

Практикум жоғары заң оқу орындары мен заң факультеттерде тәжірибелік сабақтар өткізуге, сондай-ақ отбасы құқығын өз бетінше оқып үйренемін деушілерге арналған.

ББК 67.99(2)4я7

Ы **1203020500**
00(05)-06

ISBN 9965-620-10-5

© Ынтымаков С. А., 2006.

© Карпушина Т. Д., 2006.

© Заң әдебиеті, 2006

М А З М Ұ Н Ы

Әдістемелік нұсқаулар.....	4
Тақырып. Отбасы құқығының түсінігі мен пәні.	
Отбасылық құқықтық қатынастар.....	6
Тақырып. Неке ұғымы.....	10
Тақырып. Некені тоқтату.....	14
Тақырып. Ерлі-зайыптылардың құқықтары мен міндеттері.....	18
Тақырып. Ата-аналардың және балалардың құқықтары мен міндеттері.....	25
Тақырып. Жанұя мүшелерінің алименттік міндеттемелері.....	33
Тақырып. Ата-анасының қамқорынан айырылған балаларды тәрбиелеудің нысандары.....	43
Қосымша.....	17.12.98 жылғы Қазақстан
Республикасының “Неке және отбасы туралың Заңы.....	52

Әдістемелік нұсқаулар

Оқу құралының мақсаты - студенттерге отбасы құқығының маңызды сұрақтарын терең игеріп меңгеруіне тәжірибелік тұрғыдан жәрдем беру және осы жинақта берілген тәжірибелік тапсырмаларды орындау барысында студенттерде өзінше ойлау қаблетін қалыптастырып, нормативтік ма-териалдарды дұрыс қолдана білуге үйрету.

Практикумға енгізілген материалдар жоғары заң оқу орындарында отбасы құқығын оқып меңгеруге арналған арнайы бағдарламаға сәйкес және ҚР-ның “Неке және отбасын, сондай-ақ азаматтық заңдары мен халықаралық шарттардың ережелерінің негізінде құрастырылған.

Есептер мәтінінде қарастырылатын даулы мәселенің анық шешімін шығару үшін барлық қажетті де мәнді деректер есептер шартында беріліп отыр.

Тәжірибелік сабақтарға дайындық ең алдымен практикумда берілген тақырыптарға байланысты негізгі теориялық сұрақтарға жауаптар қарастырудан, яғни сол сабақтардың тақырыптары бойынша ұсынылып отырған сәйкес оқулық тар мен арнайы әдебиеттерді оқудан, тақырыпқа қатысты нұсқаланған нормативтік құқықтық актілермен танысудан басталуы тиіс.

Есепті шешпес бұрын студент, ең алдымен оның мазмұнымен тиянақты түрде танысып, ондағы даулы мәселелердің мәнін және істің барлық жәйттерін анықтап алуы тиіс.

Бұл студенттің тәжірибелік сабақ барысында осы практикумда берілген саналуан құқықтық казустарды терең түсініп талдай білуіне және құқықтық-нормативтік актілерді дұрыс пайдаланып, істің мән жайын анық ашып, сараптап үйренуіне өзінің үлкен ықпалын тигізеді.

Тапсырманы орындау барысында, сондай-ақ студент есептерде көрсетілген отбасы неке қатынастарына қатысушы әрбір тараптың дәйектеріне заң тұрғысынан баға беріп кетуге міндетті.

Жауап заң нормаларына дұрыс және жан-жақты сілтеме жасау арқылы негізделіп берілуі тиіс.

Оқу орындарында есептерді шешуге топтың барлық студенттері атсалысып, жария түрде жалпылай, талдау арқылы шығарғандары дұрыс.

Осы практикумда нұсқалған кейбір нормативтік-құқық-тық актілерге уақыт өте олар қабылданып, күшіне енгеннен кейін де өзгерістер мен толықтырулардың енгізілуі мүмкін, сондықтан да студенттердің бұл жағдайларды есте ұстағаны абзал.

Нормативтік актілер 2003 жылдың 1-наурызына сай берілген.

Қысқартылып берілген сөздердің тізімі

АК - Азаматтық кодекс

АХАЖ - Азаматтардың хал актілерін жазу

ҚР - Қазақстан Республикасы

ҚК - Қылмыстық кодекс

1-тақырып.

ОТБАСЫ ҚҰҚЫҒЫНЫҢ ТҮСІНІГІ МЕН ПӘНІ.

ОТБАСЫЛЫҚ ҚҰҚЫҚТЫҚ ҚАТЫНАСТАР

Тақырып бойынша сұрақтар

1. Отбасы құқығының түсінігі мен пәні. Отбасы құқығының реттеу тәсілдері.
2. Отбасы құқығының қағидалары.
3. Отбасы құқығының қайнар көздері. Отбасы - неке қатынастарына азаматтық заңдарды, халықаралық жеке құқық нормаларын қолдану.
4. Отбасылық құқықтық қатынастар:
 - 4.1. Түсінігі мен түрлері;
 - 4.2. Субъектілері;
 - 4.3. Объектілері.
5. Отбасылық құқық бойынша құқыққабылеттілік пен әрекет қабілетті-ліктің мазмұны.
 6. Неке-отбасылық құқықтарды жүзеге асыру және қорғау.
 7. Отбасылық құқықтағы мерзімдер:
 - 7.1. Түсінігі мен түрлері;
 - 7.2. Неке-отбасылық қатынастарына талап қою мерзімін қолдану.

Құқықтық-нормативтік актілер

1. Қазақстан Республикасының Конституциясы.
2. “Неке және отбасы туралы” 17.12.98 жылғы ҚР Заңы.
3. ҚР АҚ (жалпы бөлім) 27.12.94.
4. ҚР АҚ (ерекше бөлім) 01.07.99.
5. ҚР Азаматтық іс жүргізу кодексі 13.07.99.
6. “Отбасы және әйелдер ісі жөніндегі Ұлттық комиссия туралы” ҚР Перзидентінің Жарлығы 22.12.98.
7. Құқықтық жәрдем көрсету және азаматтық, отбасылық, сондай-ақ қылмыстық істер бойынша Конвенция 03.01.93.

8. Балалар құқығы туралы Конвенция. (Нью-Йорк, 20.11.89 ж.). ҚР Қаулысымен 08.06.94 бекітілген.

9. Шетелден алимент өндіріп алу туралы Конвенция. 05.09.62. ҚР Заңымен 30.12.99 бекітілген.

10. “Балаларды тәрбиелеуге байланысты даулы істерді қарау кезінде соттардың заңнамаларды қолдануы туралың ҚР Жоғарғы Сот Пленумының Қаулысы 28.04.2000.

11. “Некені бұзуға байланысты істерді қарау кезінде соттардың заң-намаларды қолдануы туралың ҚР Жоғарғы Сот Пленумының Қаулысы 28.04.2000.

12. “Балаларды (қыздарды) асырап алуға байланысты істерді қарау кезінде соттардың неке және отбасы туралы заңнамаларды қолданудың кейбір мәселелері туралың ҚР Жоғарғы Сот Пленумының Қаулысы 22.12.2000.

13. ҚР Президенті жанындағы “Отбасы және әйелдер істері бойынша Ұлттық Комиссия туралың Ереже. ҚР Президентінің Жарлығымен бекітілген 22.12.98.

Әдебиеттер

1. Антокольская М. В. Семейное право.- М.: Юристъ, 1996.
2. Антокольская М. В. Курс лекций по семейному праву.- М.: Юристъ, 1995.
3. Богуславский М. М. Международное частное право.- М.: Юристъ, 1998.
4. Гражданское право. Оқулық. 3 бөлім // А. П. Сергеев, Ю. К. Толстойдың редакциясы бойынша.- М.: ПРОСПЕКТ, 1998.
5. Матвеев Г. К. Советское семейное право.- М.: Юридическая литература, 1985.
6. Нечаева А. М. Семейное право. Курс лекций. Оқулық.- М.: Юристъ, 2000.
7. Пчелинцева Л. М. Семейное право России.- М.: 1999.

Есептер

1. Алматы қаласының тұрғыны Тохтахунов “Свидетели Иеговын” атты діни сектаға барып жүреді, ол бір күндері бұл іске өзінің 12 жасар баласы Фархатты да тартады. Бастапқыда Тохтахуновтың әйелі бұл жайға аса мән бермей жүретін, алайда күйеуі Фархатты бірнеше сағаттар бойы діни әдебиеттер оқуға мәжбүрлей бастағанда ол бұған күдікпен қарай бастайды. Осы мәселеге байланысты айтылған әйелінің наразылығына Тохтахунов ешбір құлақ аспай оны әркез елеусіз қалдырумен болады.

Тохтахунов арада бір ай мерзім өткеннен кейін, мектеп баланы тек тәрбиесіздікке ғана баулиды деген сылтаумен, Фархаттың мектепке баруына мүлдем тыйым салды. Өз баласының болашағына алаң болған Тохтахунова заңгерге ба-рады. Істі шешіңіздер. Фархаттың әкесі баласының қандай құқықтарын бұзуда? Неке және отбасы заңнамаларында өз балаларының құқықтарын бұзғандығы үшін ата-аналарға жауапкершіліктер көзделген бе?

2. Ново-Алексеевка орта мектебінің оқушысы Петя Во-ронов мектепке беті-қолы жарақаттан көгеріп келіп жүреді. Мұны байқаған мектеп мұғалімі оның ата-анасын мектепке шақыртады. Алайда мектепке тек Петяның анасы ғана келеді. Баланың беті-қолындағы жарақат қайдан пайда болған деген сұраққа анасы нанымды жауап бере алмайды.

Мектеп басшыларының өтініші бойынша ұйымдастырылған қорған-шы және қамқоршы орган жүргізген тексеру нәтижесінде, төменде-гідей мән-жайлар белгілі болады: Петяның әкесі - Алексей Воронов көп жылдардан беріараққа салынып, маскүнем болып кеткен, сол себепті ол күнде жанұя мүшелерімен жанжалдасып дау шығаруды дағдыға айналдырған. Арақ ішіп, мас болғанда ол баласын себепсіз ұрып соғатын, сонымен қоймай Петяға араша түспек болған әйелін де соққыға жығатыны белгілі болады.

Баланың құқығын қорғау мақсатында Петяның әкесіне қандай шара қолдануға болар еді?

Петяның анасы тарапынан Алексей Вороновқа шара қолданбау істің мәні өзгерте ме?

3. Бас бостандығынан айрылып, сотталып кеткен Исаев 1998 жылы түрмеден босатылып келгенде осыдан екі жыл бұрын (1996 жылдың наурызында) әйелінің олардың ортақ меншігі болып табылатын автокөлікті сатып жібергені белгілі болады. Әйелінің бұл әрекетіне көңілі толмаған Исаев, зайыбынан жасаған сату-сатып алу шартын бұзуды талап етеді. Әйелі шартты бұзудан бас тартып автокөлікті сатуға, оны материалдық мұқтаждық мәжбүр еткендігімен байланыстырады (акша олардың баласын емдеуге жұмсалған еді). Сондай-ақ автокөлікті сатудан түскен акша әлдеқашан жұмсалып кеткен, сондықтан да сату-сатып алу шартын бұзуды талап ету мүмкін емес екендігін айтады. Әйелінің шартты бұзуға мүдделі емес екендігіне көзі жеткен Исаев, сату-сатып алу шартын жарамсыз деп тану туралы талап-арыз даярлауға кіріседі. Исаева заңгерге кеңес сұрап барғанда заңгер оған Исаевтың талап қою мерзімін өткізіп алғандығын айтып бе-реді. Бұл жайды Исаева күйеуіне баяндайды. Осыдан кейін Исаев та заңгерге барып, өз мүддесін қорғаудың қандай да бір жолын көрсетуді өтінеді. Исаевқа қандай кеңес берер едіңіздер? Аталған жағдайда қандай құқықтың (азаматтық құқықтың ба, әлде отбасылық құқықтың ба?) нормалары қолданылады? Талап қою мерзімі отбасы-неке қатынастарына қолданыла ма?

4. Некені бұзғаннан кейін 5 жыл бойы Нұргүл Мукаше-ва өзінің бұрынғы күйеуінен кәмелетке толмаған қызына алимент төлеуді талап етпейді, себебі ол мұнай компания-сында есепші болып істегендіктен ақшаға аса мұқтаждық көрмейтін. Алайда 2000 жылы аталған мұнай компаниясы жабылып, Мукашева Н. жұмыссыз қалады. Осы себептерге байланысты Мукашева өзінің бұрынғы күйеуінен қызды асырауға қажетті ақша соммасын ай сайын жіберіп тұруын өтінеді. Мукашев болса ерікті түрде ақша төлеп тұрудан бас тартады. Сотқа талап-арыз беретіндігі жайлы зайыбының ескертуіне

Мұқашев бұрынғы әйелі Нұргүл Мұқашеваның талап қою мерзімін өткізіп алғандығына сілтеп, оның ескертуін елеусіз қалдырып, әйелінің талабын орындаудан бас тартады. Осы қалыптасқан жағдайда Нұргүл Мұқашева қандай әрекеттер жасауы тиіс? Неке және отбасы туралы заң бойынша алимент өндіріп алуға талап қою мерзімі қолданыла ма?

5. 2001 жылдың мамыр айында Шарипова заң кеңесшісіне келіп, өзінің Ташимов пен заңды некеде болғанын айтады.

Некеде болған алғашқы жылы зайыбы оған ерекше көңіл бөлетін, жиі гүл сыйлап, сыйлықтар тарту ететін, қонаққа және түнгі клубтарға, театрларға бірге баратын. Алайда бірге тұрғандарына бір жыл толғаннан кейін зайыбы оған бұрынғысынша аса көңіл бөлмейтін болады. Ол өзінің көп уақытын достарымен өткізіп, олармен аң аулауға шығып, үйде бірнеше күндер бойы болмайтынды шығарады.

Заңгерден кеңес алуға келген Шарипова күйеуін өзіне ертеректегідей ерекше көңіл бөліп қаратуға мәжбүрлеудің заңды тәсілі бар ма деп сұрайды. Сондай-ақ Шарипова Ташимовпен некені бұзғысы келмейтіндігін және күйеуіне қойылатын бірден-бір кінә тек жоғарыда айтылған жайлар екендігін баяндайды. Сіздер Шариповаға қандай кеңес берер едіңіздер? Неке-отбасы заңдарымен қандай қатынастар реттеледі?

2-тақырып. НЕКЕ ҰҒЫМЫ

Тақырып бойынша сұрақтар

1. Отбасы құқығы бойынша неке ұғымы:
 - 1.1. Некенің түсінігі;
 - 1.2. Жалған неке мен пайданы көздейтін некенің салыстырмалы белгілері.
2. Некеге отырудың шарттары мен некеге отыруға кедергі болатын жағдайлар.
3. Некеге отырудың тәртібі. Некені мемлекеттік тіркеуге алу.
4. Некенің жарамсыздығы:
 - 4.1. Некені жарамсыз деп танудың негіздері.
 - 4.2. Некені жарамсыз деп танудың тәртібі.
 - 4.3. Некені жарамсыз деп тануды талап етуге құқығы бар адамдар.
 - 4.4. Некені жарамсыз деп танудың құқықтық салдары.

Құқықтық-нормативтік актілер

1. “Неке және отбасы туралың 17.12.98 жылғы ҚР Заңы.
2. ҚР АҚ (жалпы бөлім) 27.12.94.
3. ҚР Заңы. ҚР Азаматтық іс жүргізу кодексі 13.07.99
4. “Мемлекеттік баж туралың ҚР Заңы 31.12.96.
5. Азаматтардың тегі мен есімін және әкесінің атын өзгертуге байланысты өтініштерді қараудың тәртібі туралы Ереже. ҚР Үкіметінің қаулысымен бекітілген 26.09.96.
6. Құқықтық жәрдем көрсету және азаматтық, отбасы-лық, сондай-ақ, қылмыстық істер бойынша Конвенция 03.01.93.
7. Қазақстан азіттарының шетел азаматтары мен азаматтығы жоқ тұлғалармен жасасқан некесін тіркеудің тәртібі туралы Әділет Министрлігіаманің Хаты 21.01.97.

Әдебиеттер

1. Антокольская М. В. Семейное право.- М.: Юристъ, 1996.
2. Антокольская М. В. Курс лекций по семейному праву.- М.: Юристъ, 1995.
3. Нечаева А. М. Семейное право. Курс лекций.- М.: Юристъ, 2000.
4. Максимович Л. Б. Брачный контракт.- М.: Ось-89, 1997.
5. Пчелинцева Л. М. Семейное право России. Оқулық.- М.: 1999.
6. Короткова Л. Б. Что такое фиктивный брак? Государство и право.-1993.- № 8.
7. Шершеневич Г. Ф. Курс гражданского права.- Тула: Афтограф, 2001.

Есептер

1. 2001 жылдың 15 наурызында Алматы қаласы Бостандық ауданының АХАЖ бөліміне 1985 жылы туылған Михайлова неке жасын төмендетуді өтініп арыз береді. Өзінің арызында Михайлова 2000 жылдың қаңтар айынан бері Дубровинмен азаматтық некеде тұратынын және сол некеден 2001 жылдың 10 ақпанында дүниеге келген ортақ бір қыздарының бар екендігін көрсетеді. Осы уақыт аралығында олар бірлесіп пәтер, автомобиль және басқа да мүліктер сатып алған болатын.

Осы жағдайда АХАЖ органдары тарапынан қандай әрекеттер жасалуы тиіс және осы кезде олар қандай заң нормаларын басшылыққа алады? Неке жасын төмендетуге қандай жағдайлар себепті негіз болып саналады?

2. 23 жасар Ахмад Садуов және 20 жастағы Анастасия Андреева АХАЖ органына арыз беріп, өз некелерін тіркеуді тездетуді өтінеді. Олар сондай-ақ өз некесін тіркеуді тездетуді өтінеді, себебі Ахмадтың ата-анасы бұл некеге үзілді-кесілді қарсы еді. Ахмадтың ата-анасының бұл некеге қарсы болуының басты себебі - баласының мұсылман емес қызға үйленгісі келгендігі болатын. Ал Ахмадтың үлкен ағалары тіпті олардың екеуін де, некелесуге келген күні

өлтіруден тайынбайтындықтарын айтып қорқытады. Осы жағдайда Ахмадтың ата-анасы мен ағаларының пікірлері ескерілуге тиіс пе? Қазақстан Республикасының отбасы-неке заңдарында қандай жағдайларда некені бір айға дейін немесе сол арыз

берген күні тіркеуге жол беріледі?

3. Анасы мезгілсіз қайтыс болғалы Наташа Соколова анасының әкпесі - Ирина Давыдованың қолында тәрбиеленіп жүреді. Күндердің күнінде әкпесінің баласы Александр мен Наташаның арасында сүйіспеншілік, махаббат сезімі пайда болады. Наташаның жасы 18-ге толғанда, олар Алек-сандр екеуі АХАЖ органына арыз беріп олардың заңды некесін тіркеуді сұрайды. Алайда, АХАЖ органының меңгерушісі бұл екі жастың өзара туыс болып келетінін айтып және олардың болашақ ұрпағының тағдырын ойлағандықтан олардың некені тіркеу туралы арызын қабылдаудан бас тартады. АХАЖ органы бөлімі меңгерушісінің пайымдауларына және әрекетіне баға беріңіздер. Некені тіркеуге жол бермейтін заңмен белгіленген қандай жағдайларды білесіз?

4. Алматы қалалық сотына азаматша Бекова азамат Кизиловпен жасалған некені жарамсыз деп тану туралы талап-арыз береді. Өзінің талап-арызында ол жауапкердің жанұя құру мақсатында емес, онымен шын ниетімен некеге отырмай тек оның пәтеріне ие болу үшін ғана отырғанын баяндайды. Осыған байланысты ерлі-зайыптылардың арасында жиі түсініспеушіліктер туындап тұрады және күйеуінің таяу күндері Бековамен некені бұзып, пәтерді сот арқылы бөліске салатындығы туралы ескертеді.

Кизиллов Бекованың талап-арызына наразылық білдіреді, оның ойынша неке жарамсыз деп танылмауы тиіс тек бұзылуы мүмкін. Себебі некені жарамсыз деп тануға ешқандай да негіз жоқ, өйткені Кизиллов өзінің бар тапқан табысын ортақ мүддеге жұмсау үшін үйге алып келетін және әр кез әйеліне материалдық жәрдем көрсетіп тұратын.

Бекованың талап-арызына байланысты сот қандай шешім шығаруы тиіс? Некені жарамсыз деп танудың негіздерін атаңыздар.

Некенің жарамсыз деп танылуынан қандай құқықтық салдарлар туындайды?

5. Алексеев пен Шмелева АХАЖ органына арыз беріп өздерінің некесін тіркеуді сұрайды. Неке тіркелетін күні АХАЖ органына Николаева келіп Алексеевтің онымен азаматтық некеде тұратындығын және сондай-ақ Алексеевтің қазіргі күнге дейін Николаевамен бір үйінде тұрып жатқанын, олардың ортақ шаруа жүргізетіндіктерін және екеуінің үш жасар баласының бар екендігі жайлы айтып береді.

Николаева осы жағдайларды ескеріп АХАЖ органынан Алексеев пен Шмелеваның некесін тіркемеуді өтінеді. АХАЖ органы бұл жағдайда не істеуге тиіс?

Николаевадан белгілі болған жағдайлардан қандай құқықтық салдарлар туындауы мүмкін?

6. Алматы қаласының тұрғыны Жиров сотқа арыз беріп өзінің Калашниковамен жасаған некесін жарамсыз деп тануды сұрайды. Сотта Жиров мына жағдайларды мәлімдейді: 2000 жылдың жазында Қапшағай көлінің жағажайында ол өте сұлу, әрі ашық мінезді Анна есімді қызбен танысады. Евгений қызды ұнатып қалады. Арада аз ғана уақыт өткеніне қарамастан ол көп ойланбастан Аннаға өзіне тұрмысқа шығуды сұрайды. Некелері тіркелгеннен кейін жас жұбайлар бірден бөлек отау құрып, Алматы маңындағы елді мекеннің бірінде тұрып жатады. Уақыт өте келе Аннамен тұрып жатқан Евгений оның кейбір қылықтарының ақылға сай еместігін байқайды.

Мәселен, бір күні Анна күйеуінің бар киімдерін түгелдей жинап алып оны суға салып езіп қояды. Тағы бір күндері үйдегі барлық заттарды көшенің дәл ортасына үйіп жинап қояды. Өзінің бұл әрекетін Анна “жоғарыдан келіп түскен бұйрықпен” байланыстырады. Нәтижесінде Анна Калашникованың науқастығына байланысты психиатрлық ауруханада есепте тұратыны анықталады.

Бірақ, Аннаның әрекет қабілеттігі әлі сот тәртібімен танылмаған болатын. Жировтың талабын қанағаттандыруға бола ма? Анна Калашникованың қылығынан көрніс тапқан жоғарыдағы жайлар некені жарамсыз деп тануға негіз бола ма?

3-тақырып.

НЕКЕНІ ТОҚТАТУ

Тақырып бойынша сұрақтар

1. Некені тоқтатудың түсінігі мен негіздері.
2. Некені тоқтатудың тәртібі.
3. Некені АХАЖ органында бұзу.
 - 3.1. Ерлі-зайыптылардың екеуінің арызы бойынша;
 - 3.2. Ерлі-зайыптылардың біреуінің арызы бойынша;
4. Некені сот тәртібімен бұзу.
5. Некені бұзу туралы шешім шығару кезінде сот шешетін мәселелер.
6. Неке бұзылған жағдайда оның тоқтатылу сәті.
7. Некені жарамсыз деп танудан кейін некенің бұзудың ерекшеліктері.
8. Бұзылған некені қайта қалпына келтіру: түсінігі, негіздері, тәртібі.

Құқықтық-нормативтік актілер

1. “Неке және отбасы туралы” 17.12.98 жылғы ҚР Заңы.
2. ҚР АҚ (жалпы бөлім) 27.12.94.
3. ҚР Азаматтық іс жүргізу кодексі 13.07.99.
4. “Некені бұзуға байланысты істерді қарау кезінде соттардың заңнамаларды қолдануы туралы” ҚР Жоғарғы Сот Пленумының Қаулысы 28.04.2000.

Әдебиеттер

1. Антокольская М. В. Семейное право.- М.: Юристъ, 1996.
2. Антокольская М. В. Курс лекций по семейному праву.- М.: Юрист, 1995.
3. Гражданское право. Оқулық. 3 бөлім // А. П. Сергеев, Ю. К. Толстойдың редакциясы бойынша.- М.: ПРОСПЕКТ, 1998.
4. Пчелинцева Л. М. Семейное право России. Оқулық.- М.: 1999.
5. Шершеневич Г. Ф. Курс гражданского права.- Тула: Афтограф, 2001.

Есептер

1. Горбунова Морозовпен некені бұзу туралы сотқа талап-арыз береді. Олар 1984 жылдан бастап заңды некеде тұрған болатын және сол некеден 1987 жылы туылған бір қыздары бар еді. Морозов спирт ішімдіктеріне салынып, нәтижесінде бұл жанұяда үнемі даужанжал туындап тұратын болған, кейде ол тіпті қызының көзінше төбелеске дейін баратын. Бұл жан-жалдың арты ақыр түбі Морозовтың нар-кологиялық диспансерде емделуімен аяқталатын.

Емдеуден ешбір нәтиже болмайды, Морозов сол бұрынғысынша ішімдікке салынуынан айықпайды. Горбунова талап-арызында өзінің жанұясында орын алған осындай берекесіздіктен әбден қажып, шаршағанын және осы жағдайлардың қызы мен өзінің психикасына қатты әсер ететінін, сондықтан да, ол Морозов - пен бұдан былай тұрғысы келмейтіндігін айтады.

Іс сотта қаралған кезде Морозов зайыбының пікірімен келіспейді ол өзінің әйелі мен қызын жақсы көретіндігін, оның араққа әуестігі некені бұзуға негіз болмауы тиіс деп мәлімдейді. Сондай-ақ ол таяу күндері өзінің арақ ішуін біржола қоюға уәде беретіндігін, емделетіндігін айтады. Сол себептен Морозов соттан некені бұзбауды және әйелімен татуласуға уақыт беруді сұрайды.

Сот қандай шешім шығаруы керек? Қандай жағдайларда сот ерлі-зайыптылардың татуласу-ына уақыт белгілей алады?

2. Мансұрова сотқа талап-арыз беріп, онда ол күйеуі Мансұровпен бес айдан астам уақыт бойы бірге тұрып жатпағанын, онымен ортақ шаруа жүргізбейтіндігін және ұлы-ның тәрбиесімен тек өзі ғана айналысатынын көрсетеді.

Сонымен бірге Мансұрова соттан күйеуі - Мансұровтан балаға алимент өндіріп беруді және бала бағуына байланысты өзі жұмысқа шыға алмайтындықтан өзі үшін де алимент төлетуді міндеттеуді сұрайды. Осы негіздерге байланысты сот некені бұзу туралы іс қозғауға құқылы ма? Бала бағуына байланысты жұмыс істемей, үйде отырған әйелінің күйеуінен алимент төлеуді талап етуі орынды ма?

3. 2000 жылдың сәуір айында Алматы облысы Жамбыл аудандық соттың шешімі бойынша Биғаным Смайлованың күйеуі - Абдулла Жарылғапов әрекет қабілетсіздігі жоқ деп танылған болатын. Жарылғаповтың қорғаншысы болып оның анасы - Бәтима Жарылғапова танылған болатын. Арада бір жыл өткеннен кейін Биғаным Смайлова сотқа талап-арыз беріп, Жарылғаповпен некені бұзуды сұрайды. Талап-арызында Биғаным Смайлова өз балаларының өмірі үшін қауіптенетіндігін айтады, себебі ауруы асқынған кезде күйеуі Абдулла Жарылғапов үнемі балаларды өлтіретіндігімен қорқытады. Биғаным Смайлова өз арызында, сондай-ақ күйеуін бір жыл бойы облыстық психиатриалық ауруханаға орын болмауына байланысты орналастыра алмай жүргенін мәлімдейді. Абдулла Жарылғаповты балалардан баскаша бөлектетудің өзгеше амалы жоқ еді. Абдулланың қорғаншысы болып табылатын Бәтима Жарылғапова өз міндетін іс жүзінде атқармайтын, себебі оның пікірінше Абдулла әлі күнге дейін оның заңды күйеуі болып табылады, сондықтан да Смайлова өзінің күйеуін өзі күтуге міндетті деп санайды. Сот Биғаным Смайлованың өтінішімен танысып болып оны караудан бас тартады, соттың пікірі бойынша Смайлованың бұл әрекеті күйеуінің басына қиын жағдай туған кезде зайыбын күту міндетінен әдейі, саналы түрде жалтарғандық болып табылады. Істі шешіңіздер. Қандай жағдайларда некені АХАЖ органдарында бұзуға

жол беріледі? Абдулланың қорғаншысы болып табылатын Бәтима Жа-рылғапованы өз міндеттерін орындамағаны үшін жауапкершілікке тартуға бола ма?

4. Алматы қаласының жанармай базасында экспедитор болып жұмыс істейтін 42 жасар Тасим Галандаров экономикалық қылмыс жасағаны үшін бас бостандығынан айрылып, мүлкі тәркіленіп сотталып кетеді. Ал оның әйелі 34 жастағы Гүлханым Фазылова күйеуі Тасим Галандаровпен некені бұзудың жолдарын сұрап заңгерге кеңес алуға

келеді. Фазыловаға қандай кеңес берер едіңіздер? Ерлі-зайыптылардың біреуінің түрмеде болуы некені бұзуға негіз болып табыла ма? Ос жағдайда ерлі-зайыптылардың ортақ балаларының болуының қандай құқықтық мәні бар?

5. Алматы облысы Таутүрген ауылының тұрғыны Виктор Петухов Өскемен қаласының маңында орман шаруашылығында вахталық тәсілмен жұмыс істеп жүреді. Бір күні ол кезекті вахтаға кетіп содан кейін із-түссіз жоқ болып кетеді. Ішкі істер органдары жүргізген Виктор Петуховты іздестіру шаралары ешбір нәтиже бермейді. Содан бері үш жыл өтсе де Виктор Петухов бұрынғысынша өзі туралы ешбір мәлімет бермейді. 2001 жылдың 15 наурызында зайыбының өтініші бойынша сот шешімімен Виктор Петухов өлді деп жарияланады. Осыдан кейін екі ай өткен соң Петуховтың әйелі - Светла-на Петухова Талғат Таубалдиевке тұрмысқа шығады. Олардың некесі АХАЖ органында тіркеуге алынады. Светлана Талғат Таубалдиевке күйеуге шыққаннан кейін бала көтереді. Осы кезде өлді деп жарияланған Виктор Петухов қайтып оралады да сотқа талап-арыз беріп Светлана мен Таубалдиевтің некесін жарамсыз деп тануды және сондай-ақ өзінің бұзылған некесін қайта қалпына келтіруді сұрайды. Светлана болса өзінің соңғы некесін бұзғысы келмейді және Петуховпен бұдан әрі қарай барлық қарым-қатынасты үзгісі келетіндігін мәлімдейді. Істі шешіңіздер. 6. Парламенттің

бұрынғы депутаты Амиров санаторийде демалып жүріп 38 жастағы Қостанайдан келген Баян Зараповамен танысады.

Амиров пен Зарапова санаторийде бірге болған күндерден бастап бірін-бірі ұнатып, ақыры санаторийде демалу уақыты аяқталуға таяп қалғанда ол Баянға өзіне тұрмысқа шығуды өтінеді. Олардың некесі АХАЖ органында тіркеуге алынады және осыдан кейін Зарапова Амировтың үйіне тұрақты түрде көшіп келеді. Арада үш ай өткеннен

кейін Амиров жүрек ауруымен ауруханаға келіп түседі де, бірер күннен кейін қайтыс болып кетеді. Амировты жерлеу рәсімделіп болғаннан кейін оның баласы Ануар сотқа талап-арзы беріп, өзінің әкесі мен Зарапованың арасында қиылған некені жарамсыз деп тануды сұрайды. Өзінің талап-арызында ол бұл некенің жалған екендігін және іс жүзінде Баян Зарапова оның әкесіне ешбір көмек

көрсетпегендігін көрсетеді. Нақты айтқанда әкесі науқастанып жатқанда Зарапова көмек көрсетудің орнына оларды,

яғни Ануар мен оның әйелін шақыртумен ғана шектелетін. Амиров пен Зарапованың некесін жарамсыз деп тануды Амировтың баласы Ануар талап етуге құқылы ма? Жалған неке (фиктивный брак) дегеніміз не және оның құқықтық салдары қандай?

4-тақырып.

ЕРЛІ-ЗАЙЫПТЫЛАРДЫҢ ҚҰҚЫҚТАРЫ МЕН МІНДЕТТЕРІ

Тақырып бойынша сұрақтар

1. Ерлі-зайыптылардың арасындағы жеке мүліктік емес құқықтық қатынастар.

1.1. Ерлі-зайыптылардың жеке мүліктік емес қатынастарының түсінігі;

1.2. Ерлі-зайыптылардың жеке мүліктік емес құқықтары мен міндеттерінің түрлері;

1.2.1. Ерлі-зайыптылардың отбасындағы теңдігі.

1.2.2. Ерлі-зайыптылардың тек таңдау, тұрғылықты жерді, қызмет пен кәсіп түрін таңдау құқықтары.

1.2.3. Ерлі-зайыптылардың балаларды тәрбиелеудегі құқықтары мен міндеттерінің теңдігі.

2. Ерлі-зайыптылар арасындағы мүліктік қатнастарының түсінігі мен түрлері;

3. Ерлі-зайыптылардың мүлкінің заңды режимі;

3.1. Ерлі-зайыптылардың бірлескен ортақ меншігі.

3.2. Ерлі-зайыптылардың әрқайысысының жеке меншігі.

3.3. Ерлі-зайыптылардың ортақ мүлкін бөлудің тәртібі және бөлу кезіндегі үлестерді анықтау.

3.4. Некелері бұзылған ерлі-зайыптылардың ортақ мүлікті бөлуге байланысты талап қою мерзімі.

4. Ерлі-зайыптылардың мүлкінің шарттық режимі:

4.1. Неке шартының түсінігі мен нысаны. Неке шартын жасаудың тәртібі. Неке шартын жасасу кезіндегі несие берушілердің құқықтарына кепілдік.

4.2. Неке шартының мазмұны;

4.3. Неке шартын өзгерту мен бұзудың тәртібі.

4.4. Неке шартын жарамсыз деп тану;

5. Міндеттемелер бойынша ерлі-зайыптылардың жауапкершілігі.

5.1.Ерлі-зайыптылардың жеке міндеттемелері бойынша жауапкершілігі.

5.2.Ерлі-зайыптылардың ортақ міндеттемелер бойынша жауапкершілігі.

5.3. Ерлі-зайыптылардың өздерінің кәмелетке толмаған балаларының келтірген зияндары үшін жауапкершілігі.

Құқықтық-нормативтік актілер

1. “Неке және отбасы туралың 17.12.98 жылғы ҚР Заңы.

2. ҚР АҚ (жалпы бөлім) 27.12.94.

3. ҚР “Нотариат туралың Заңы 14.07.97.

4. ҚР “Тұрғын үй қатынастары туралың Заңы 16.04.97.

5. ҚР Президентінің “Жылжымайтын мүлікке құқықты және онымен жасалатын мәмілелерді тіркеу туралың Заң күші бар Жарлығы.

6.“Некені бұзуға байланысты істерді қарау кезінде соттардың заңнамаларды қолдануы туралың ҚР Жоғарғы Сот Пленумының Қаулысы 28.04.2000.

Әдебиеттер

1. Антокольская М. В. Семейное право.- М.: Юристъ, 1996.

2. Антокольская М. В. Курс лекций по семейному праву.- М.: Юристъ, 1995.

3. Гражданское право. Оқулық. 3 бөлім // А. П. Сергеев, Ю. К. Толстойдың редакциясы бойынша.- М.: ПРОСПЕКТ, 1998.

4. Биримжанова С. Э. 219-223 беттер. // Гражданский кодекс толкование и комментирование. Общая часть. В. 2.- А.: Баспа, 1997.

5. Гражданский кодекс РК (Общая часть) Комментарий. Екі кітаптан тұрады, 2 кітап. Жауапты редакторы: М. К.

Сүлейменов, Ю. Г. Басин.- А.: Жеті Жарғы, 1998 ж.

6. Максимович Л. Б. Брачный контракт. Комментарий и разъяснения.- М.: ОСЬ-89, 1997.

7. Сергунина В. Брачный договор.- А.: Жеті Жарғы, 1996.

8. Сергунина В. Брачный договор.- А. Состояние законодательства и перспектива его развития //

Юридическая газета, 22.07.98.

9. Сосипатрова Н. Е. Брачный договор: правовая природа, содержание, прекращение // Государство и право, №

10. Чефранова Е. А. Имущественное отношение в Российской семье.- М.; 1997. 11. Шершеневич Г. Ф. Курс гражданского права.- Тула: Афтограф, 2001.

Есептер

1. Алматы қаласының тұрғыны әскери-медициналық Академияның курсанты Николай Шмидт эстрада цирк-колледжінің 4 курс студенті Ксения Лазеровамен некеге тұрады. Ашық та ажарқын мінезді Ксения күйеуге шыққаннан кейін де өз уақытының басым бөлігін өзінің бұрынғы достарымен өткізіп жүреді. Ксения өзінің достары өткізетін бірде-бір кештер мен отырыстарды жібермей, барлық кезде Николайсыз өзі ғана барып тұрады. Әрине, Ксенияның бұл қылығы күйеуіне ұна-майтын, сондықтан да ол бір күні әйелінен бұл “жүгенсіздіктің дереу тоқтатуды талап етеді. Алайда Ксения күйеуімен келіспейді, оның ойынша күйеуі оның бостандығына шек қоюға құқығы жоқ деп санады. Николайдың пікірі бойынша Ксения оның әйелі болғандықтан ол қыдыруға немесе демалуға барлық уақытта онымен бірге баруы керек деп түсіндірді. Бұл дауда кімдікі дұрыс? Ерлі-зайыптылардың пікірлеріне құқықтық тұрғыдан баға беріңіздер.

2. Заң институтын бітіргеннен кейін бір айдан соң Василий Шумов пен сол институттың 3 курс студенті Светлана Сорокина заңды некеге тұрады. Көп ұзамай жас маман Василий Шумовқа Солтүстік Қазақстан облысының Петропавл қалалық прокуратурасына жұмысқа жолдама беріледі. Светлана күйеуімен бірге аттанып кете алмады, себебі оның институтты оқып аяқтауына әлі бір жыл бар болатын.

Сонымен Петропавл қаласына Василийдің жалғыз өзі кетуіне тура келеді. Қысқы каникул кезінде Светлана Петропавлға күйеуіне барып қайтады. Алайда, оған қаланың өзі және климаты ұнамай қалады. Бірақта Светлана ол жайында күйеуіне ештеңе айтпаған болатын. Сол жылы жазда Светлана институтты аяқтайды, осы кезде Василий оған Петропавл қаласын да көшіп келуді ұсынады. Светлана Алматыдан кеткісі келмегендіктен күйеуінің бұл ұсынысын қабылдаудан бас тартады.

Василийдің пікірі бойынша Светлана заңды неке бойынша оның әйелі болып табылатындықтан – күйеуінің бұл талабын орындауға міндетті деп табады. Светлана болса ерлі-зайыптылардың бірге тұруы міндетті емес және олар бір-біріне еңбек демалысы кезінде барып-келіп тұрса да, жеткілікті деп санайды.

ҚР отбасылық құқығы бойынша ерлі-зайыптылардың тұрғылықты жерді таңдау құқығы деген нені білдіреді? Василийдің Светланаға қойған талабы, яғни әйелінің оның қызмет орнына көшіп келуін міндеттеуі дұрыс па? Светлананың пікіріне қандай сараптама берер едіңіздер?

3. Бектеміров ойынханада (казинода) істейтін Курбано-вамен некеге тұрады. Некелері тіркелінгеннен кейін күйеуі әйелінің жұмысына қатысты түрлі наразылықтар білдіре бастайды. Ол әйелінен басқа бір жұмысқа ауысуды талап етеді, Курбанова болса бұл жұмыстың өзіне ұнайтындығын айтып күйеуінің талабын орындаудан бас тартады.

Осы келіспеушіліктен кейін Бектеміров некені бұзу туралы сотқа талап-арыз береді.

Сот қандай шешім қабылдауы тиіс? Неке және отбасы туралы заңда некені бұзудың қандай негіздері мен тәртібі белгіленген?

Бектеміров өз әйелінің қандай да бір құқығын бұзды деп ойлайсыздар ма?

4. Мезенцев пен Амирова, некеге тұрар алдында әрқайсысы өздерінің тегін (фамилияларын) сақтап қалуды ұйғарады. Олардың

жанұясында тұңғыш бала дүниеге келіп, оны тіркеткеннен кейін ерлі зайыптылар өздерінің бастапқы шешімдерін өзгертіп, енді олар ортақ тек ретінде өздерінің бі-реуінің тегін тандап алу туралы шешім қабылдайды.

Осыдан кейін ерлі зайыптылар АХАЖ органына өтініш білдіріп Ами-рова деген фамилияны зайыбының

фамилиясына ауыстыруды сұрайды. Осы жағдайда АХАЖ органдары қалай, қандай шешім қабылдауы тиіс? Тек (фамилия) өзгертудің негіздері мен тәртібін атаңыздар?

5. Бекболатова Гулнар 2000 жылдың 10 қарашасында Бекболатов Рауанмен некеден ажырасуына байланысты ортақ мүлікті бөлісу туралы сотқа талап-арыз береді. Талапкер өзінің арызында некеге отырғанға дейін өзінің жеке меншігінде автомашинаның болғанын, ал Бекболатов Рауан ата-анасы қайтыс болғанда пәтердің ү бөлігін мұраға алғандығын көрсетеді. Олар некеде тұрған кезде бірлесіп екі бөлмелі пәтер, тоңазытқыш, кір жуатын машина, түрлі түсті теледидар, үй жиһазы мен төсек орын және ас үйге қоятын гарнитур сатып алған еді. Осы аталғандардың ішінен талапкер соттан пәтерді, сондай-ақ төсек орын мен ас үйге қоятын гарни-турды өзіне қалдыруды сұрап, өзінің талабын Бекболатовтың меншігінде мұра бойынша алған пәтердің ү бөлігінің барымен негіздейді.

Сот шешімі қандай болуы тиіс?

6. Алматы қаласындағы нотариалдық кеңселердің бірінде Иран азаматы мен Қазақстан Республикасының азаматшасы арасында неке шарты жасалып, онда төмендегідей жағдайлар көрсетіледі:

- некеге отырғанға дейінгі мүлік олардың әрқайсысы-ның жеке меншігі болып табылады;

- некеде болған кезде жиналған барлық мүлік күйеуінің мүлкі болып табылады, ал әйеліне тек оның өзінің же-

- ке басының қажеттілігін өтеуге қажетті заттары мен күйеуі сыйлаған қымбат сыйлықтар ғана тиесілі болады. *әйелі* - 3 жылға дейін ешқайда шықпай үйде отыруы тиіс жә-не еліне бармауға

міндетті; - 2 жыл бойы бала көтермеуі тиіс (себебі, күйеуінің жанұя мүшелері оның осы жанұядан бала тууына беделді екендігіне көздерін жеткізуі керек); - үй шаруасымен айналысу керек (ас пісіру, үй тазалау т. б.); **күйеуі** әйелін асырайды; әйеліне қажетті киімдер сатып алады немесе оны са-тып алу үшін оның өзіне ақша береді. Егер неке бұзылған

жағдайда бала әкесімен қалады және әйелі ажырасқаннан кейін де 2 жыл бойы басқа адамға үйленуіне болмайды; Осы жасалған неке шартына құқықтық тұрғыдан баға беріп, сараптаңыздар.

7. Ашот Акопян мен Рая Саркисян некеге тұрғаннан кейін Алматы қаласының маңындағы елді мекендердің бірінде үй салады. Үй төрт бөлмеден тұрады және оның кіретін есігі екеу болатын. Үй тұрғызылған жер учаскесі Рая Саркисян-ның жеке меншігінде болады.

Ашот Акопян кәсіпкерлікпен айналысып, Ресейден же-ңіл автомашиналарға қажетті қосалқы бөлшектерді Қазақстанға алып келіп сатып жүретін. Бірде 2000 жылдың күзінде Акопянды Ресей құқық қорғау органдары тұтқындап, оған экономикалық қылмыс жасады деген айып тағады. Арада бес ай өткеннен кейін Акопянның кінәсі, яғни қылмыс жасағаны дәлелденбей ол бостандыққа шығарылады. Акопян қайтып оралғанда үйдің екі бөлмесін әйелінің азамат Әскер Хусайыновқа сатып жібергеннің біледі. Рая Саркисян үйдің екі бөлмесін сатуға күйеуінің түрмеде болуы себеп болды дейді, өйткені осы кездері ол аса материалдық тапшылық көрген еді. Сондай-ақ әйелі сатылған үйден түскен ақшаның басым бөлігінің жұмсалып кеткендігін айтады.

Бұл әрекетке көңілі толмаған Ашот Акопян әйелінен азамат Әскер Хусайыновпен жасаған сату-сатып алу шартын дереу бұзуды одан талап етеді, оның пікірінше үй ерлі-зайыптылардың ортақ қаржысына салынғандықтан әйелі үйдің бір бөлігін оның келісімінсіз сатуға құқығы жоқ деп санады. Рая Саркисян шартты бұзудан бас тартып, үй тұрғызылған жер учаскесі оның жеке меншігі екендігін, сон-

дықтан да оның өз меншігін қалай билесе де құқысы бар екендігін көлденең тартады. Осыдан кейін Акопян азамат Әскер Хусайыновпен әйелі Рая Саркисянның арасында жасалған сату-сатып алу шартын жарамсыз деп тану туралы сотқа талап-арыз береді. Сот қандай шешім шығаруы тиіс?

8. Алматы қаласының тұрғыны Тамара Төлепбергенова суретші Аблай Сабыровпен заңды некеде тұрғанына үш жыл болатын, алайда ол күйеуінің соңғы кездері оған ешбір қы-зығушылық танытпайтынын байқайды. Күйеуі өз уақытының басым бөлігін сурет шеберханасында өткізіп, үйден ерте кетіп, үйге тым кеш оралып жүреді. Тамара күйеуіне ескерту жасап, егер ол өзінің бұл қылығын өзгертпесе онымен ажырасатыны туралы айтады.

Абылай әйеліне деген өз көзқарасын өзгертпегендіктен, Тамара некені бұзуды талап етеді. Аблай қарсы болмайды. Алматы қаласының Бостандық аудандық АХАЖ органында олардың некелері бұзылады. Арада алты ай өткеннен кейін Тамара Төлепбергенова Абылай Сабыровтан сот тәртібімен олар бірге тұрған кезде жинаған ортақ мүлікті бөлу туралы талап қояды. Сондай-ақ Төлепбергенова Сабыровтың салған картиналарын және олар некеде тұрған кезде салынған, бірақ неке бұзылғаннан кейін сатылған картиналары үшін алған гонорарын бөлуді талап етті. Төлепбергенованың қойған талабы негізді ме? Неке бұзылғанға дейін Сабыровтың салған картиналары ерлі-зайыптылардың ортақ бірлескен меншігі болып табыла ма? Неке бұзылғаннан кейін Сабыровтың алынған гонорары бөліске жата ма?

9. Арман Әлібек пен Әлия Сыдыкова некеге отырғаннан кейін үш жыл өткен соң неке шартын жасасады. Олар осы шартта пәтер мен автомашинаға жеке меншік құқығын орнатады, яғни автомобиль “Вольвоң - Арманның жеке

меншігіне өтеді, үй - Әлияның меншігі болып белгіленеді. Ал қалған мүліктерге ортақ бірлескен меншік құқығы режимін сақтап қалады.

Шарт жасасып қойғаннан кейін бір жылдан соң Арман мен Әлияның үйінен өрт шығып үйдің жартысы және бірсыпыра мүліктер жарамсыз болып қалады. Осы себептерге байланысты үйді жедел жөндеу қажет болады. Арман өзменшігіндегі автомашинаны сатуды ұйғарады.

Автомобильді сатудан түскен ақша үйді жөндеуге және тұрмыс техникаларын сатып алуға: теледидар, тоңазтқыш және бейнемагнитофонға жұмсалады. Арада бірнеше жылдар өткеннен кейін ерлі-зайыптылар некені бұзу туралы және мүлікті бөлісуге байланысты туған дауды шешуді өтініп сотқа арыз береді. Істі шешіңіздер. Мүлікті бөлу қалай жүзеге асырылады? Осы жағдайда қандай мүліктерді ерлі-зайыптылардың ортақ бірлескен меншігіне жатқызуға болады?

5-тақырып.

АТА-АНАЛАРДЫҢ ЖӘНЕ БАЛАЛАРДЫҢ ҚҰҚЫҚТАРЫ МЕН МІНДЕТТЕРІ

Тақырып бойынша сұрақтар

1. Баланың туу тегін белгілеу.
2. Әке болуды анықтау:
 - 2.1. Әкелікті ерікті түрде белгілеу.
 - 2.2. Әкелікті сот тәртібімен белгілеу.
3. Баланың ата-анасын туу туралы жазбалар кітабына жазу.
4. Әке (ана) болуды даулау.
5. Кәмелетке толмаған балалардың құқықтары:
 - 5.1. Баланың жеке құқықтары.
 - 5.2. Баланың мүліктік құқықтары.
6. Ата-аналардың құқықтары мен міндеттері.
7. Баласынан бөлек тұратын ата-ананың ата-ана құқықтарын жүзеге асыруы. Кәмелетке толмаған ата-аналардың ата-ана құқықтарын жүзеге асыруы.
8. Ата-ана құқығынан айыру:
 - 8.1. Ата-ана құқығынан айыруды даулау;
 - 8.2. Ата-ана құқығынан айырудың құқықтық салдары;
 - 8.3. Ата-ана құқығын қалпына келтіру;
9. Ата-ана құқығын шектеу:
 - 9.1. Шектеудің негіздері мен тәртібі;
 - 9.2. Ата-ана құқығын шектеудің құқықтық салдары;
 - 9.3. Ата-ана құқығын шектеудің күшін жою;
 - 9.4. Ата-ана құқығынан айырудың ата-ана құқығын шектеуден айырмашылығы.

Құқықтық-нормативтік актілер

1. Қазақстан Республикасының Конституциясы.
2. “Неке және отбасы туралы” 17.12.98 жылғы ҚР Заңы.
3. ҚР АҚ (жалпы бөлім) 27.12.94.
4. ҚР Азаматтық іс жүргізу кодексі 13.07.99

5. Құқықтық жәрдем көрсету мен азматтық, отбасылық, сондай-ақ, қылмыстық істер бойынша Конвенция 03.01.93.

6. Балалар құқығы туралы Конвенция (Нью-Йорк, 20.11.89 ж). ҚР Қаулысымен 08.06.94 бекітілген.

7. “Балаларды тәрбиелеуге байланысты даулы істерді қарау кезінде соттардың заңнамаларды қолдануы туралың ҚР Жоғарғы Сот Пленумының Қаулысы 28.04.2000.

8. Патронат туралы Ереже. ҚР Үкіметінің Қаулысымен бекітілген 30.12.99 ж.

Әдебиеттер

1. Антокольская М. В. Семейное право.-М.: Юристъ, 1996.

2. Антокольская М. В. Курс лекций по семейному праву.- М.: Юристъ, 1995.

3. Гражданское право. Оқулық. 3 бөлім // А. П. Сергеев, Ю. К. Толстойдың редакциясы бойынша.- М.: ПРОСПЕКТ, 1998.

4. Гражданский кодекс РК (Общая часть) Комментарий. Екі кітаптан тұрады, 2 кітап. Жауапты редакторы: М. К. Сүлейменов, Ю. Г. Басин.— А.: Жеті Жарғы, 1998 ж.

5. Нечаева А. М. Семейное право. Курс лекций.- М.: Юристъ, 2000.

6. Шершеневич Г. Ф. Курс гражданского права.- Тула: Афтограф, 2001.

7. Ермакова Л. Н., Утешова К. Ш. Судебная практика по рассмотрению споров, связанных с рождением детей. // Гражданское законодательство РК. В. 10.- А.:ТОО Баспа, 2000.

Есептер

1. Зияда Молдахметова сотқа арыз жазып, дүниеге жаңа келген жас сәбиін тіркеуді кейінге қалдыруды сұрайды. Өзінің арызында Молдахметова 2001 жылдың 16 наурызында дүниеге сәби қыз әкелгенін, тек сол жылдың 25 шілдесінде ғана оны тіркету үшін АХАЖ органдарына өтініш бергенін және тіркеу мерзімін өткізіп алғандықтан олар сәбиді тіркеуден бас тартқанын айтады. Оның өз

уақтысында сәбиді тіркетіп үлгермеуіне өзінен басқа сәбиді қарауға ешкімнің болмауы себеп болды деп түсіндірді.

Енді алыстағы әкпесі кішкентай сәбиді күтіп бағуға көмекке келгендіктен ол бірден АХАЖ органдарына жүгінгендігін айтады.

Сот қандай шешім шығаруы тиіс?

2. Максимова 1998 жылдың 20 қыркүйегінен бастап Кравченкомен заңды некеде болған болатын. Бұл некеден оларда бала болған жоқ. 1999 жылдың қараша айында екеуінің өзара келісімі бойынша Кравченко өзін АХАЖ органында Максимованың 1997 жылы 17 тамызда туған баласы - Алешаның әкесі етіп жаздыртады. 2001 жылдың наурыз айында бұл ерлі-зайыптылардың некесі бұзылады, ал 2001 жылдың шілдесінде Кравченко сотқа талап-арыз беріп баланың туу туралы куәлігіндегі өзін баланың әкесі деп көрсететін жазуды жарамсыз деп тануды сұрайды. Осы іске қатысты сот қандай шешім шығаруы керек? Өзін ерікті түрде баланың әкесімін деп таныған тұлға үшін қандай құқықтық салдар туындайтындығын атаңыздар.

Заңды некеде болмаған әйел туған сәбидің әкесі қалай көрсетіледі? Әкелікті (аналықты) анықтауға байланысты туған дау қандай тәртіппен шешіледі және нені сот дәлелдеме ретінде қарастыруға құқылы? Әкелікті (аналықты) даулау - мерзіммен шектелген бе?

3. Имашева 1999 жылдың тамыз айынан бастап, екеуі бірлесіп сатып алған пәтерде Рыскелдиновпен бірге тұрып жатады және олар ортақ шаруашылық жүргізеді. 2001 жылдың наурыз айында Рыскелдинов Ақтау қаласына уақытша жұмысқа кетіп сол жерде мамыр айында кенеттен қайтыс болады. Марқұм қайтыс болғаннан кейін екі айдан соң Имашева қыз туады. 2001 жылдың тамыз айында Имашева Алматы қаласының аудандық сотына әкелікті тану туралы фактіні анықтау туралы өтініш береді.

Сот Имашеваның талабын қанағаттандырудан бас тартады. Имашева кассациялық шағыммен Алматы қалалық сотына жүгінеді.

Имашеваның талабы қанағаттандыруға жата ма? Әкелікті (аналықты) тану туралы фактіні анықтау туралы кімдер талап қоя алады?

4. Ерлі-зайыптылар София Досаева мен Игорь Иванов заңды некеде 11 жыл тұрған болатын және олардың осы некеден 10 жасар Слава есімді ортақ балалары бар еді. София жанұяда өзінің мінезімен ерекшеленетін, яғни өзінің күйеуін ерекше қызғанатын. Игорь келбетті әрі ақ жарқын мінезімен әйелдердің назарына көп ілігетін және тіпті ол кейде олар-дың қайсыбірімен оңаша отырыстарға да барып жүретінді. Бір күні Игорьдың бұл жүрісі жайлы Софияға Игорьмен бір мекемеде жұмыс істейтін Ольга есімді құрбысы айтып береді. Осыдан кейін ерлі-зайыптылардың арасындағы қарым-қатынас тым салқындап кетеді. Осы оқиғадан кейін София күйеуінің қарсы болуына қарамастан некені бұзуға бел шешеді және ұлы Слава Игорьдың тегін (фамилиясын) әкесіне қайтарып беруі тиіс деген пікірге келеді. Сонымен Славаның тегін (фамилиясын) ол Иванов емес өзінің тегіне (фамилиясына), яғни Досаев деп жаздырмақшы болады. Игорь болса Славаның тегінің өзгертілуіне үзілді-кесілді қарсы болады. Сот әуел бастан бұл ерлі зайыптылардың та-туасуларына уақыт береді, алайда одан ешбір оңды нәтиже шықпайды. Көп өтпей олардың некесі заң жүзінде бұзылады.

Ерлі-зайыптылардың арасында баланың тегін өзгертуге байланысты ортақ келісім болмаған жағдайда бұл іс қалай шешіледі, осыған негіздеп жауап беріңіздер. Тек (фамилия) өзгертуді қандай орган жүзеге асырады? Баланың тегін (фамилиясын) өзгерту кезінде Игорьдың пікірі ескерілуі тиіс пе?

5. Ерлі зайыпты Марат пен Айнұр Қалиевтар жаңа туған жас сәбидің есімі туралы ортақ келісімге келе алмайды да АХАЖ органына кеңес сұрап барады. Сәбидің анасы болса ұлының есімін жас балаларды өрттен аман алып қалу кезінде ерлікпен қаза тапқан өзінің сүйікті әкесі Қуыршақтың есімімен атағысы келеді. Баланың әкесіне әйелінің сәбиге бермекші болған бұл есімі ұнамайды, себебі оның пікірінше Қуыршақ деген есім баланың мүддесіне сай емес,

келешекте бұл есім оның намысына тиіп, кім көрінгенге күлкі-келемеж болуына себеп болады деп санайды. Керісінше, сәбидің әкесі өзінің ұлына орыстың әйгілі ғалымы Михайло Ломоносовтың құрметіне ұлына Михайло деген есім бергісі келетіндігін айтады. Алайда күйеуінің бұл ұсынысын әйелі қабылдамай тастайды, оның пікірінше Михайло - орыстың есімі, ал бала қазақ жанұясында дүниеге келгендіктен оған қазақша есім берілуі керек деп санайды.

Сонымен ақырында ерлі-зайыптылар бұл мәселе бойынша ортақ пікірге келе алмайды. Қалиевтарға қандай кеңес беруге болады?

Сіздердің пікірлеріңізше жоғарыдағы есімдердің қайсы баланың мүддесіне қайшы келмейді? Бала есіміне байланысты ата-аналар арасында пайда болған осы келіспеушілікті қандай орган шешуге құзретті?

6. Тохтауновтар жанұясында Тахир есімді жалғыз бала болады. Баланың ата-анасының арасында бала тәрбиелеуге байланысты келіспеушіліктер жиі болып тұратын. Шешесі баласының фортепиано ойнап үйренуін қалайтын, сол себептен де ол баланы ұзақ сағаттар бойы фортепиано ойнап үйренуге мәжбүрлеп жаттықтыратын. Осындай жаттықтыру сағаттары кезінде егер бала қандайда бір шығарманы қате ойнаса немесе жаттықтыру сабағынан қашпақтаса шешесі оны балағаттап, тіпті кейде далаға балалармен ойнауға жібермей қоятын. Анасының осы мәжбүрлеулерінен әбден қа-жыған Тахир соңғы уақыттары жиі жылайтын.

Осындай кездерде баланың әкесі шет қалып қоймай, әйелінің шамадан тыс қатыгездігінен баланы қорғап қалуға әрекет жасайтын. Әдетте мұның арты үйде үлкен дау-жанжалға ұласып, ата-аналары бір-бірімен ұрыс-керіске баратын.

Ал Тахир болса шахмат ойнауды өте ұнататын, сондықтан да ол ұзақ уақыттар бой өз ынтасымен әр түрлі шахмат комбинацияларын үйренуден жалықпай жаттығуға әзір еді, тіпті ол анасына айтпай жасырын түрде шахмат үйірмесіне қатысып жүретін. Ал мектепте өткізілетін турнирлерде Тахир әркез жүлделі орындарға ие болып

жүретін. Баласының шахматқа деген құштарлығы мен қабілетін байқаған әкесі оны бұдан былай музыкаға баулуды тоқтатып шахматқа бейімдеу туралы шешім қабылдайды.

Әйелі күйеуінің бұл шешіміне қарсы болып одан бала тәрбиесіне араласпауды сұрайды. Ақырында ортақ келісімге келе алмаған ерлі-зайыптылар заңгерден кеңес алуды ұйғарады. Ерлі-зайыпты Тохтауновтарға кеңес беріңіздер.

Өздеріңіздің жауаптарыңызды “Неке және отбасы туралы” Заңының нормаларымен дәйектеніздер. Ерлі-зайыптылардың арасындағы баланың тәрбиесіне байланысты дауларды қандай орган қарастыруға құқылы?

Тахирдің анасы баланың өз қалауын ескермей музыкаға үйренуге мәжбүрлеуге құқығы бар ма?

7. Қ. И. Сәтпаев атындағы Қазақ мемлекеттік политехникалық университетінің 2 курс студенті Нина Гурченко студенттік би кешінде сол университеттің 3 курс студенті Владимир Стаховпен танысады. Олар бір көргеннен бірін бірі ұнатып қалады да, арада 6 ай өткеннен кейін заңды некелерін АХАЖ органында тіркетеді.

Ата-аналары бұл некеге қарсы болады, себебі екі жастың да ешбір материалдық жағдайы: ақшасы да, пәтерлері де жоқ болатын. Сонымен қатар олардың екеуі де әлі жоғары білім алып үлгермеген.

Осы қалыптасқан жағдай олардың әрқайысысын өз ата-аналарының үйінде тұруға мәжбүр етеді. Арада бір жыл өткеннен кейін Нина мен Владимирдің тұңғыштары - Настя өмірге келеді. Сәби дүниеге келгеннен кейін Нинаның ата-анасымен Владимирдің арасындағы қарым-қатынасы шиеленісіп қалады. Нинаның ата-анасы Владимирді өзінің жа-нұясына жауапсыздықпен қарайды деп айыптай бастайды. Олар сондай-ақ күйеу балалары - Владимирдің әйелі мен қызына келуіп тұруын қаламайтын. Нинаның анасы қызынан күйеуімен ажырасуын талап етеді. Снымен қоймай олар немерелерін өздері Владимирді қатыстырмай-ақ тәрбиелеуге даяр

екендіктерін қызына айтады. Нина күйеуімен ажырасқысы келмейді, алайда ата-анасынан материалдық жағынан тәуелді болғандықтан

қарсы шыға алмай, ақырында амалсыз сотқа арыз беріп некесін бұзуды сұрауға мәжбүр болады. Владимир болса Нинаның некені ажыратуға байланысты сотқа берген арызына қарсы болады.

Істі шешіңіздер. Нинаның ата-анасы Владимирдің қандай құқықтарын бұзуда? Нинаның ата-анасын некенің бұзылуына себеп болғаны үшін жауапқа тартуға бола ма?

8. Алматы қаласының тұрғындары Валентина мен Ва-силь Дубининдер спирт ішімдіктеріне әуес еді. Олардың жастағы баласы - Саша мектепке бармайтын, себебі ата-анасы одан ақша талап ететін, сондықтан да, ол автокөлік сататын базарда автомобиль жуумен айналысып ақша табуға мәжбүр болады. Ақсай аудандық полициясының учаскелік инспекторлары Саша Дубининді ұсак бұзақылық жасағаны үшін бірнеше рет ұстаған болатын. Нәтижесінде

ақыры Саша Дубининді кәмелетке толмағандар ісі жөніндегі комис-сияның есебіне тіркеуге алады. Дубининдер жанұясында орын алған бұл келеңсіздіктің таяу арада оңалмайтындығына көздері жеткен және бала тәрбиесіне аталған жағдайлардың кері ықпал жасайтындығын ескеріп кәмелетке толмағандар ісі жөніндегі комиссия сотқа талап арыз беріп, Дубининдерді ата-ана болу құқығынан айыру туралы іс қозғауды сұрайды.

Осы іс сотта қаралған кезде мына жағдайлар, яғни ерлі-зайыпты Дубининдердің екуінің де созылмалы алкоголизммен ауыратындығы, сондай-ақ баласын үнемі ұрып соғатыны және Сашаның мектепке баруына тыйм салатындығы анықталады. Сот қандай шешім шығаруы керек? Кәмлетке толмағандар ісі жөніндегі комиссиядан басқа тағы кімдер ерлі-зайыпты Дубининдерді ата-ана болу құқығынан айыру туралы сотқа талап-арыз бере алады? Осы жағдайда Сашаның ата-анасынан алимент өндіріп алу туралы істі қарауға сот құқылы ма? Егер ерлі-зайыпты Дубининдер Қазақстан Республика-

сының азаматы болып табылмаған жағдайда істің мәні мен сот шешімі өзгере ме?

9. Күйеуі қайтыс болғаннан кейін Елена Ли төрт жасар баласы - Вадиммен жалғыз қалады. Елена есепші болып жұмыс істейтін кәсіпорында төленетін еңбекақы өте аз болатын, сол себепті ол жиі материалдық тапшылық көріп жүретін. Сүйікті жарынан айырылып, тұрмыс тауқыметінен қажыған Елена өзінің жадау өміріне арақпен әр беруді әдетке айналдыра бастайды.

Арада көп уақыт өтпей жұмысқа жүйелі түрде шықпағандығы үшін Еленаны жұмыстан шығарып жібереді.

Елена пәтер жалдап тұратын үйдің қабатындағы оның көршілері талай рет куә болғандай, Елена өз пәтерін маскүнемдерге толтырып баласының көзінше өрескел ұят қылықтар жасауға дейін баратын. Араққа мас болған кейбір кездер де ол тіпті баласын пәтерден қуып, аулаға шығарып жіберетін немесе жөнсіз ұрып соғатын. Мұндай кездерде бала көп жағдайда ас ішпей аш, күтімсіз қалатын.

Бұл жайды көршілерінің бірі қорғаншы және қамқоршы органына хабарлайды. Нәтижесінде Елена соттың шешіміне сәйкес ата-ана құқығынан айырылады. Вадимнің қорғаншысы болып баланың әжесі-Ирина Ким тағайындалады.

Сот шешімі шыққаннан кейін қорғаншы және қамқор-шы органының өкілі және Ирина Ким баланы алу үшін Еленаның үйіне келеді. Бірақ олар Елена тарапынан өте өрескел қарсылық көреді. Ол келген адамдардың пәтерге кіруіне бөгет жасап, оларды есіктен итеріп жіберіп, үйді ішінен бекітіп алады. Сондай-ақ төрт жасар Вадим де өз анасынан айырылғысы келмей қарсылық танытады.

Арада бірнеше күн өткеннен кейін баланы анасынан ажыратып алуға тағы да әрекет жасалады, алайда одан да ешқандай нәтиже шықпайды. Елена сол бұрынғысынша баланы әжесіне беруден бас тартудан қайтпайды. Істі шешіңіздер.

Сіздер қалай ойлайсыздар, баланы алып қоюға байланысты шығарылған сот шешімін бұл жағдайда қандай орган жүзеге асыруы

тиіс? Баланы алу кезінде қорғаншының қатысуы бұл жағдай-да міндетті ме?

10. Аудан прокуроры Н. Жансейітов сотқа талап-арыз бе-ріп, азамат Бондарев Алексей Василиевичті 1994 жылы туған Бондарев Романға ата-ана болу құқығынан айыруды сұрайды. Сот мәжілісінде прокурор Н. Жансейітов азамат Алексей Бондаревтің ұзақ уақыттардан бері спирт ішімдіктеріне са-лынып, баласының тәрбиесімен тек ара-тұра ғана айналысатындығын және оның қазір сот үкімімен бес жылға бас бостандығынан айрылғанын сотта баяндайды.

Сот сұрауы бойынша мектептен талап етіліп алынған құжаттарда Роман Бондаревтің әкесі – Бондарев Алексейдің баласын сабаққа жақсы баулығандығы жайлы және барлық ата-аналар жиналысын жібермей үздіксіз келіп тұрғандығы туралы мәліметтер көрсетіледі. Соңғы сот үкімі шыққанға дейін Бондарев ешбір жерде жұмыс істемеген және наркологиялық диспансерде “Екінші сатыдағы созылмалы алкоголизм диагнозымен есепте тұрғаны белгілі болады.

Талап-арызында прокурор баланы, содай-ақ ата-әжесінің тәрбиесіне беруді де қарастыруға болатын айтады.

Алай да оған қорғаншылық-қамқоршылық органдар қарсылық білдіреді, себебі аталған жанұяның тұрмыс жағдайы мен ма-териалдық мүмкіндігі нашар, сондықтан да ол баланың мүд-десіне қайшы келеді дегенді айтады. Істі шешіңіздер.

Аталған негіздер Бондарев Алексейді ата-ана болу құ-қығынан айруға жеткілікті деп санайсыздар ма?

6-тақырып.

ЖАНҰЯ МҮШЕЛЕРІНІҢ АЛИМЕНТТІК МІНДЕТТЕМЕЛЕРІ

Тақырып бойынша сұрақтар

1. Алименттік міндеттемелер: түсінігі, түрлері, пайда болу негіздері.

2. Ата-аналар мен балалардың алименттік міндеттемелері.

2.1. Ата-аналардың кәмелетке толмаған балаларды асырау міндеті. Асыраудың нысандары мен тәртібі;

2.2. Кәмелетке толмаған балаларды асырау үшін сот тәртібімен алынатын алименттің мөлшері;

2.3. Ата-аналардың жасы кәмелетке толған, еңбекке қабілеттігі жоқ балаларды асырау міндеті;

2.4. Ата-аналардың балаларды асырау кезіндегі қосымша шығындарға қатысуы.

2.5. Кәмелетке жасы толған балалардың өздерінің ата-аналарын асырау міндеті (талап ету шарттары).

2.6. Кәмелетке жасы толған балалардың ата-аналарын асырауы кезіндегі қосымша шығындарға қатысуы.

3. Ерлі-зайыптылардың мен бұрынғы ерлі-зайыптылардың алименттік міндеттемелері:

3.1. Ерлі-зайыптылардың өздерінің бірін-бірі асырау міндеттемелері (талап ету шарттары).

3.2. Бұрынғы ерлі-зайыптылардың неке бұзылғаннан кейін алуға тиіс алименттері (талап ету шарттары).

4. Өзге де жанұя мүшелерінің алименттік міндеттемелері:

4.1. Ағалары мен әпкелерінің өздерінің жасы кәмелетке толмаған және еңбекке қабілеті жоқ інілері мен

қарындастарын асырау міндеті (талап ету шарттары).

4.2. Аталар мен әжелердің өздерің немерелерін асырау міндеті;

4.3. Немерелердің өздерінің аталары мен әжелерін асырау міндеті;
4.4. Өгей балалар мен өгей қыздардың өздерінің өгей әкесі мен өгей шешесін асырау міндеті (талап ету шарттары);

4.5. Өзге де жанұя мүшелері үшін өндірілетін алименттің мөлшері.

5. Алимент төлеу туралы келісім:

5.1. Алименттік қатынастардың түсінігі, субъектілері;

5.2. Алименттік қатынастардың нысаны мен мазмұны.

6. Алимент төлеудің және өндіріп алудың тәртібі;

6.1. Сот шешімі бойынша алимент өндіріп алу;

6.2. Алименттік төлемдерді ұстап қалуды ұйымдастыруға байланысты ұйымдардың міндеттері;

6.3. Алимент төлеу туралы келісімге сәйес алимент ұстап қалу.

6.4. Алименттік борыштарды анықтау. Алименттік борыштарды өтеуден босату.

6.5. Алиментті кешіктіріп төлегені үшін жауапкершілік;

6.6. Сот шешімімен белгіленген алимент төлемінің мөлшерін өзгертудің негіздері мен тәртібі;

6.7. Алименттік міндеттемелердің тоқтатылуы.

Құқықтық-нормативтік актілер

1. “Неке және отбасы туралың 17.12.98 жылғы ҚР Заңы.

2. ҚР АҚ (жалпы бөлім) 27.12.94.

3. ҚР Заңы. ҚР Азаматтық іс жүргізу кодексі 13.07.99.

4. ҚР “Нотариат туралың Заңы 14.07.97.

5. Құқықтық жәрдем көрсету және азаматтық, отбасылық, сондай-ақ. қылмыстық істер бойынша Конвенция 03.01.93.

6. Шетелден алимент өндіріп алу туралы Конвенция 05.09.62. ҚР Заңымен 30.12.99 бекітілген.

7. “Некені бұзуға байланысты істерді қарау кезінде соттардың заңнамаларды қолдануы туралың ҚР Жоғарғы Сот Пленумының Қаулысы 28.04.2000.

Әдебиеттер

1. Антокольская М. В. Семейное право.- М.: Юристъ, 1996.
 2. Антокольская М. В. Курс лекций по семейному праву.- М.: Юристъ, 1995.
 3. Гражданское право. Оқулық. 3 бөлім // А. П. Сергеев, Ю. К. Толстойдың редакциясы бойынша.- М.: ПРОСПЕКТ, 1998.
 4. Нечаева А. М. Семейное право. Курс лекций.- М.: Юристъ, 2000.
 5. Акбергенова М. Н. Обзор практики рассмотрения семейных споров Актюбинским городским судом //
- Гражданское законодательство РК. В. 9.- А.: ТОО Баспа, 2000.

Есептер

1. Абилова Фарида мен Абилов Мақсат 1995 жылдан бастап заңды некеде болады, осы некеден олардың 1997 тамыз айында туған Хасан есімді бір ұлдары бар болатын. 1999 жылдың тамыз айында Алматы қаласы Алмалы аудандық сотының шешімі бойынша ерлі-зайыпты Абиловтардың арасында неке ажыратылады.

Автопаркте жүргізуші болып жұмыс істейтін Мақсат Абилов неке бұзылған уақыттан бастап зайыбының талап-арызы бойынша жасы кәмелетке жетпеген Хасанға алимент төлеп тұрады.

Кейінірек Абилов жұмыс орнын ауыстырып, яғни 2000 жылдың сәуір айынан бастап ЖШС-ке экспедитор болып жұмысқа кіреді де, сол кезден бастап алимент төлеуді тоқтатады.

Сонымен жоғарыда аталған уақыт пен 2002 жылдың ақпаны аралығында Абиловтың алименттік борыштары қордаланып қалады.

Осы жағдайда алимент төлеудің тәртібі қандай болмақ?

2. Қуанышбаева Э. М. 2001 жылдың 15 шілдесінде сотқа талап-арыз беріп А. С. Бекеновты баласының әкесі деп тануды және одан алимент өндіріп беруді сұрайды. Өз арызында талапкер мына жайларды хабарлайды: 1996 жылдың қараша айында Алматы қаласының орталық мешітінде Беке-новпен азматтық некеге тұрғанын, некені рәсімдеу кезінде екі жақтан да жақын туыстардың

болғанын, оның соңы неке тойына ұласқандығы жайлы айтылады. Осыдан кейін олар Алматыда тұрып жатады да 1997 жылдың тамыз айында күйеуі екеуі араздасып қалып Қуанышбаева Э. М. Есік қаласына өз ата-анасының үйіне кетіп қалады. Бұл кезде Қуанышбаева Э. М. жүкті болатын.

Келесі жылдың 6 ақпанында ол ұл туады, бірақ Бекенов оны іздеп келмейді. Сотта Бекенов болса Қуанышбаеваның бұл талабын мойындаудан бас тартып, өзінің талапкермен шын мәнінде алты айдай көлемде азаматтық некеде болғанын, бірақ оның жүкті екендігін білмегенін, оның үстіне Қуанышбаева өзінің жүктілігі жайлы оған ештеңе айтпағанын баяндайды. Сот қандай шешім қабылдауы тиіс.

Талапкердің өтінішін қанағаттандыруға заңды негіз бар ма?

3. Ерлі-зайыпты Леоновтардың некесінен ортақ үш бала болады. Олар өздерінің некелерін бұзған кезде балаларының тағдыры жайлы екеуі төмендегідей келісімге келеді: екі қыз шешесімен, ал ұлы-әкесімен қалатын болып шешіледі.

Леонова мектепте мұғалім болып жұмыс істейтін, алатын жалақысы 6 000 теңгені құрайды да, ал Леонов болса жүргізуші болып істеп 25 000 теңге еңбекақы алады. Ерлі-зайыпты Леоновтар арасында алимент төлеуге байланысты дау туындайды. Леонова күйеуінің жалақысының 25% алимент төлемі етіп белгіленуі тиіс деп санайды, себебі оның асырауында тек бір ғана бала бар, ал өзінде екі қыз бар.

Осы іс бойынша сот қандай шешім қабылдауы тиіс?

Балалар ата-аналардың екеуіне де қалдырылған жағдайда алимент төлеу қалай жүзеге асырылады?

4. Дорошенко сотқа талап-арыз беріп, онда Виноходовтан кәмелетке толмаған бала үшін алимент өндіріп беруді сұрайды, себебі баланың әкесі өз еркімен алимент төлеуден немесе қандай да бір материалдық көмек көрсетуден үнемі жалтаратындығы жайлы және олардың арасында алимент төлеу туралы келісімнің болмағандығын көрсетеді.

Сот Дорошенконың талабын қанағаттандырып, Виноходовтың бар-лық табыс көзінің 1/4 бөлігін бала кәмелетке толғанша төлеу тиіс деп шешім шығарады.

Сот шешімімен келіспеген Виноходов кассациялық шағым жазып талапты қанағаттандырудан бас тартуды сұрайды. Өз шағымында Виноходов баланың туу туралы куәлігінде оны баланың әкесі деп көрсетілгені болмаса, шын мәнінде оның балаға әке болып табылмайтындығын айтады. Сондай-ақ бала оның тегінде (фамилиясында) емес, Дорошенко болып жазылатындығын, сол себептен де одан алимент өндіріп алуы заңсыз деп мәлімдейді. Істі шешіңіздер. Виноходовтың кассациялық шағымы бойынша қандай шешім қабылдануы керек?

5. 1998 жылы Аман Бекенов Айман Абдулловамен неке бұзған болатын. Алматы облысы Қарасай аудандық сотының шешімімен ол өзінің 9 жасар баласы Дәулетке алимент төлеп тұруға тиісті болатын. Сот шешімі шыққаннан кейін алғашқы жарты жыл бойы ол үзбей алимент төлеп тұратын, алайда кейін кенеттен Қаскелен қаласынан із-түссіз жоқ болып кетеді.

Абдуллова өзінің бұрынғы күйеуін іздеп табуды өтініп қалалық полицияға арыз береді. Екі жылдан кейін іздестірудің нәтижесінде Бекенов табылады. Ол Тараз қаласында тұрып жатқан екен. Оның тұрғылықты жері туралы мәлімет Айман Абдулловаға дереу хабарланады, ол оны ести салып Тараз қаласына келіп, сондағы қалалық сотқа талап-арыз жазып Бекеновтан екі жыл төленбеген алиментті өндіріп беруді сұрайды. Бұл кезде Бекенов екінші рет некеге тұрған екен және одан бір қызы бар болып шығады. Сондай-ақ Абдулловаға Бекеновтың коммерциялық банкте күзетші болып жұмыс істейтіні және екінші әйелінің ата-аналары тарапынан сыйға тартылған екі бөлмелі пәтерде тұрып жатқан-ы белгілі болады.

Істі сотта қарау кезінде төмендегідей мән-жайлар белгілі болады: Бекеновтың өзінің жеке мүлкі мен ақшасы болмайды, ал үйіндегі бар

мүлік оның екінші әйелімен бірлесіп жинаған ортақ бірлескен меншігі болып шығады.

Екі жыл бойы төленбеген алимент соммасы осы кезде біршама қордаланып қалған екен. Алименттік борышты Бекеновтан толық өндіріп алу мүмкін болмағандықтан Абдуллова өзінің бұрынғы күйеуінің ерлі-зайыптылардың ортақ меншігі болып табылатын мүлкіндегі үлесі есебінен борышты өтеуді талап етеді.

Істі шешіңіздер. Қандай жағдайларда алименттік төлемнің өтемі ретінде борышқордың мүлкі есебінен борыш өтелуі мүмкін.

“Алимент төлеушінің мүлкі - дегенді қалай түсінесіздер?”

6. Асхат Садыров Марина Китаевамен некеге тұрғаннан кейін бір жыл өткеннен соң Шымкент қаласынан Маңғыстау облысына табыс іздеп жолға шығады да кейін сол жер-дегі мұнай компанияларының біріне бұрғышы болып жұмысқа тұрады. Асхат Маңғыстауға аттанардың алдында олардың тұңғышы Ильяс дүниеге келген еді. Бастапқы кездері Асхат өз жанұясына үнемі үзбей хат жазып және ақша салып тұратын.

Алайда арада үш жыл өткеннен кейін Марина өзінің зайыбынан не хат, не ақша алмайтын болады. Өзінің жанұяға деген мұндай көзқарасына көңілі толмаған Китаева сотқа талап-арыз беріп Садыровты Баланы асырауға байланысты өзінің әкелік міндетін орындамағаны үшін ата-ана құқығынан айырып әрі одан алимент өндіріп беруді өтінеді.

Сот Китаеваның талабын қанағаттандырады. Сот шешіміне сәйкес Садыров баласына, яғни Ильясқа кәмлетке толғанша алимент төлеп тұрады.

Арада 30 жыл өткеннен кейін Садыров пенсияға шығып әрі екінші топтың мүгедегі болып Шымкентке қайтып оралады, бірақ сол бұрынғысынша жанұясына қосылмай бөлек тұра береді.

Бұл кезде Ильяс Садыров мектепті бітіріп, педагогикалық институтқа түсіп оны аяқтаған кейін колледжде мұғалім болып жұмыс істеп жүреді.

2001 жылы Асхат Садыров сотқа талап-арыз беріп ұлы Ильяс Садыровтан өзіне алимент төлеуді талап етеді.

Өзінің баласына қойған бұл талабын ол былайша негіздейді: мүгедек болуына байланысты оған жиі қымбат дәрілір сатып алуына және дәрігерлердің қызметін өтеуге көп қаражатты қажет ететіндігімен түсіндіреді. Ильяс болса әкесінің бұл талабын қанағаттандырудан бас тартады.

Бұл іс сотта қаралған кезде Асхат Садыров өзінің Ильяс Садыровқа алимент төлегенін өзіндегі сақтаулы құжаттармен дәлелдеп береді.

Істі шешіңіздер. Асхат Садыровтың талабы негізді ме? Бұл арада Ильяс Садыровты алимент төлеуден босатуға негіз бар ма?

7. Неке бұзардың алдында ерлі-зайыпты Рашид пен Фа-рида Мусиннің арасында ауызша келісім жасалады, ол бойынша Мусиндердің 14 жасар баласы Әмір әкесімен қалады да, ал Фарида Мусина оны асырау үшін оған ай сайын 6 мың тенге ақша беретін болып өзіне міндеттеме алады. Фарида халықаралық ақпарат агенттігінде аудармашы болып жұмыс істейтін және оның еңбек ақысы Қазақ ботаника ғылыми-зерттеу институтында ғылыми қызметкер болып жұмыс істейтін Рашидтің жалақысынан едәуір көп еді. Арада бір жыл өткеннен кейін Рашид институттан жұмыстан шығып кетеді де, Алматы қаласындағы киім сататын базардың бірінде аяқ киім сатумен айналыса бастайды. Сегіз ай өтпей-ақ Рашидтің табысы Фариданың табысынан екі есе көп болады. Мұны естіп білген Фарида Мусина бұдан былай баласына алимент төлемейтіндігін мәлімдейді, себебі оның табы-сы азайған, сондықтанда Рашид баланы оның көмегінсіз-ақ асырай алады деп шешеді. Рашид Мусин Фариданың пікірімен келіспей, егер алимент төленбеген жағдайда сот тәртібімен талап етуге мәжбүр блатындығын айтады. Ерлі-зайыпты Мусиндердің жасаған мәмілесіне құқық-тық тұрғыдан баға беріңіздер. Егер Рашид Мусин сотқа талап-арыз берген жағдайда оның талабы қанағаттандырылуы

мүмкін бе? 8. Ерлі зайыпты Назаровтардың жанұясында дүниеге келген сәби қыздың атын Индира деп қояды.

Перзентханадан шықаннан кейін ерлі-зайыпты Назаровтар сәбиді АХАЖ органында тіркетеді. Арада сегіз ай өткеннен кейін кезекті дәрігерлік тексеру барысында жаңа туған жас сәбиде сал (ДЦП) ауруының белгілері бар екені анықталады. Индираны ауруханаға емдеуге жатқызады. Емдеу ешбір нәтиже бермегендіктен, дәрігерлер ерлі-зайыпты Назаровтарға аурудың жазылмайтындығын айтып Индираны үйге алып кетуді және оған тиісті күтім жасауды айтады. Осыдан кейін ерлі-зайыптылар өзара кеесіп қызды ауруханада қалдыру жөн деп шешеді және өздеріні шешімін олар дәл қазір қызды күтіп бағуға олардың жанұясында ешбір жағдайдың жоқтығымен байланыстырады. Ерлі зайыпты Назаровтардың баладан бас тартқаны туралы аурухана қызметкерлері қорғаншы және қамқоршы органға ха-барлайды, ал олар болса дереу сотқа талап-арыз беріп ерлі-зайыпты Назаровтардың әрқайсысының қызға алимент төлеуін талап етеді. Сот қорғаншы және қамқоршы органның талабын қанағаттандырады. Ерлі зайыпты Назаровтар сот шешімін дауламастан жүйелі түрде қызына алимент төлеп тұратын болады. Индира 18-ге толғанда Назаровтар алимент төлеуді тоқтатады. Қорғаншы және қамқоршы орган ерлі-зайыпты Назаровтардан алимент төлеуді жалғастыруды талап етеді. Қорғаншы және қамқоршы органның талабын қанағаттандыруға негіз бар ма? Сот енді қандай шешім шығаруы тиіс? Жасы кәмелетке толған балалар үшін алимент төлеудің негіздерін атаңыздар.

9. 2001 жылдың маусым айында Қалиева некені бұзу туралы сотқа талап-арыз береді. Өзінің талап арызында Қалиева 1972 жылдан бері Қалиевпен заңды некеде болғанын және осы некеден бұл күнде олардың төрт баласының бар екендігін баяндайды. 1986 жылдан бері ерлі-зайыптылар бірге тұрмайды. 2000 жылдан бері іс жүзінде ерлі-зайыптылардың некесі бұзылған болып саналады, ал Қалиева қазір балаларды алып ата-анасының қолында тұрып жатқан еді. Міне содан

бері ол жауапкермен ешбір қатнаста болған еместі. Сондай-ақ Қалиевтан балаларды асырауға алимент талап етпегенді. Сот қандай шешім шығаруы тиіс? Алимент төлеу қай кезден басталады?

10. Мария Қабашева басқа қалада тұратын өгей шешесінің қайтыс болғандығы туралы хабар алады. Ол ұшақпен жедел оның жерлеу рәсіміне қатысуға аттанып кетеді. Ұшақ қонар кезде сәтсіздікке ұшырап нәтижесінде ұшақтың барлық жолаушылары, соның ішінде Мария Қабашева да қайтыс болады.

Марқұмның күйеуі - Нүркен Тажиев үшін зайыбының бұл қазасы аса ауыр тиеді. Арақпен өзін жұбатпақ болған Нүркен көп уақыт өтпей спирт ішімдіктеріне мүлдем салынып кетеді де, ақыры созылмалы алкоголизм ауруына шалдығады. Ол ішімдікке салынған күндері оның алты жасар қызы-Наргиз бірнеше күндер бойы ешбір күтімсіз қалатын. Бұл жай қорғаншы және қамқоршы органға белгілі болады. Жоғарыда аталған дәлелдердің негізінде Алматы қаласының Бостандық аудандық сотының шешімімен Нүркен Тажиев ата-ана болу құқығынан айырылады да, ал бір ай өткеннен кейін сот шешімімен оның әрекет қабілеттігі шектеледі.

Нүркен Тажиевтің қамқоршысы болып оның ағасы - Бектемір Тажиев тағайындалады. Наргизді Марияның әкпесі-Сарбасова өз тәрбиесіне алады. Көп өтпей Сарбасова ресми түрде 7 жасар Наргиздің қорғаншысы болып тағайындалады.

1999 жылдың наурыз айында Нүркен Тажиев кеннеттен жок болып кетеді. Ол туралы Бектемір Тажиев ішкі істер органына дереу хабарлайды, алайда полиция тарапынан жүргізілген іздестіру шаралары ешбір нәтиже бермейді.

2001 жылдың жазында өзінің жазғы демалысын Көкшетау қаласында өткізіп қайтқан Сарбасованың бір танысы оған Көкшетау қаласынан Нүркенді көргендігін және оның осы жердегі өзен паракходствасында жұмыс істейтіндігі туралы айтады.

Осыдан кейін Сарбасова Нүркен Тажиевтен Наргиз үшін алимент төлеуді талап етеді. Қыздың әкесі бұл талапты мойындап айына 4 000

тенге алимент төлеп тұруға келіседі. Алайда Сарбасова бұл келісімнің жазбаша түрде жасалып нотариалды түрде куәлендірілуін талап етеді.

Нүркен Тажиев оған қарсы болмайды. Сонымен алимент төлеу туралы келісім жазбаша нысан-да жасалып нотариуспен куәлендіріледі.

Төмендегі сұрақтарға жауап беріңіздер: ата-ана құқығынан айрылған Нүркен Тажиев өзінің қызына алимент төлеп тұруға міндетті ме? Нүркен Тажиевтің алимент төлеу туралы келісімге қамқоршысы-Бектемір Тажиевтің рұқсатын алмай-ақ қол қоюға құқысы бар ма?

Алимент төлеу туралы келісімге отырғаннан кейін алимент төлеуші біржақты осы келісімді орындаудан бас тарта ала ма?

11. Қойгелдинова сотқа талап-арыз беріп, өзінің бұрынғы күйеуі Бошқуловтан кәмлетке жасы жеткен қызы үшін қосымша шығындарды өтеуге қажетті ақша сомасын төлетіп беруді сұрайды, өйткені ол жауапкермен осыған дейін заңды некеде болған және сол некеден олардың жасы 18-ге толған бір қызының бар екендігіне жайлы өз арызында көрсетеді.

2000 жылы қызы ақылы негізде, жоғары оқу орнына оқуға түседі, ондағы әрбір оқу жылы үшін 500 американ долларын төлеуге тиіс. Оның жаңғыз өзі мұндай ақша төлеуге мүмкіндігі жоқ болатын. Осыған сәйкес Қойгелдинова жауапкерді айына 5 000 тенге төлеп тұруға міндеттеуді сұрайды. Сот қандай шешім шығаруы тиіс? Қосымша шығындарды өтеудің негіздері мен тәртібін атаңыздар.

12. Боброва Ирина сотқа талап-арыз беріп Бобров Алексейден өзінің 1998 жылдың 24 мамырында туылған баласы Владимир үшін бір-жолғы төлем түріндегі алимент төлемін өндіріп беруді сұрайды. Боброва өз арызында 1999 жылдың ақпанында Бобров Алексеймен сот арқылы ажырасқанын және сот шешіміне сәйкес жауапкер 4 500 тенге алимент төлеуі тиіс болғанын баяндайды.

Осы іс сотта қаралған кезде төмендегідей мән жайлар, яғни, қазір Бобровтың Беккер деген әйелмен заңды некеде екендігі, сондай-ақ ол осы таяу күндері Германияға тұрақты тұру үшін көшкелі жатқаны анықталады. Осы аталған себептерге байланысты Боброва жауапкерге бір жолғы төлем түріндегі алимент төлемін, яғни 250 000 теңгенің барлығын өндіріп беруді сұрайды. Бобров бұл талапты қанағаттандырудан бас тартып, өзінің дәл қазір жұмыссыз жүргендігін және екінші некеден бір қызының бар екендігін соттың ескеруін өтінеді. Сондай-ақ көшуге байланысты қазір оның жанұясы үшін қосымша шығындар шығаруларына тура келіп тұрғанын да айтады. Соған қарамастан ол бірден 120 000 теңге төлеуге даяр екенін, ал қалған соманы Германияға көшіп барып, жұмысқа тұрғаннан кейін әр ай сайын 5 000 теңге көлемінде салып тұратындығы туралы қолхат жазып береді. Сот қандай шешім шығаруы тиіс?

7-тақырып.

АТА-АНАСЫНЫҢ ҚАМҚОРЫНАН АЙЫРЫЛҒАН БАЛАЛАРДЫ ТӘРБИЕЛЕУДІҢ НЫСАНДАРЫ

Тақырып бойынша сұрақтар

1. Ата-анасының қамқорынан айырылған балаларды анықтау.
2. Бала (қыз) асырап алу:
 - 2.1. Бала асырап алудың түсінігі мен тәртібі.
 - 2.2. Бала (қыз) асырап алудың құқықтық салдары.
 - 2.3. Бала (қыз) асырап алуды жарамсыз деп тану.
3. Балаларға қорғаншылық пен қамқоршылық жасау.
 - 3.1. Қорғаншылық пен қамқоршылық белгілеудің тәртібі.
 - 3.2. Қорғаншылық (қамқоршылық) тағайындалған балалардың құқықтары.
 - 3.3. Қорғаншылар мен қамқоршылардың құқықтары мен міндеттері. Олардың өз міндеттерін орындау тәртібі.
 - 3.4. Тәрбиедеу, емдеу мекемелеріндегі балаларға қорғаншылық пен қамқоршылық белгілеудің тәртібі.
 - 3.5. Қорғаншылық пен қамқоршылықтың тоқтатылуы.
4. Патронат:
 - 4.1. Түсінігі мен пайда болу негіздері;
 - 4.2. Баланы тәрбиеге беру туралы шарттың субъектілері;
 - 4.3. Патронаттық тәрбиедегі балалардың құқықтары мен міндеттері;
 - 4.4. Баланы тәрбиеге беру туралы шартты бұзу;
5. Жанұя түріндегі балалар деревнясы мен жасөспірімдер үйі:
 - 5.1. Жанұя түріндегі балалар деревнясының құқықтық мәртебесі;
 - 5.2. Жанұя түріндегі балалар деревнясына балаларды орналастыру;
 - 5.3. Тәрбиеші-ананың құқықтары мен міндеттері;
 - 5.4. Балалар деревнясында тәрбиеленушілердің құқықтары мен міндеттері;

5.5. Жасөспірімдер үйінің түсінігі, мақсаты мен міндеті (әлеуметтік бейімдеу орталықтары);

5.6. Жасөспірімдер үйінде әлеуметтік бейімдеуден өтетін тұлғалар.

5.7. Әлеуметтік бейімдеуден өтетін тұлғалардың құқықтары мен міндеттері.

Құқықтық-нормативтік актілер

1. Қазақстан Республикасының Конституциясы.
2. “Неке және отбасы туралың 17.12.98 жылғы ҚР Заңы.
3. ҚР АҚ (жалпы бөлім) 27.12.94.
4. ҚР АҚ (ерекше бөлім) 01.07.99
5. ҚР Азаматтық іс жүргізу кодексі 13.07.99.
6. ҚР Қылмыстық кодексі 16.07.97.
7. ҚР “Білім туралың Заңы 18.01.92.
8. ҚР “Азаматтық туралың Заңы 20.12.91.
9. “Қазақстан Республикасындағы шет ел азаматтарының құқықтық жағдайы туралың ҚР Президентінің Заң күші бар Жарлығы 19.06.95.
10. “Тұлға науқас болған жағдайда бала (қыз) асырап алуға, балаға қорғаншы (қамқоршы), патронаттықты жүзеге асыра алмайтын аурулардың тізбесін Бекіту туралың ҚР Үкіметінің Қаулысы 24.06.99.
11. “Білім алу кезінде мұқтаж адамдарға берілетін әлеуметтік жәрдемнің мөлшері мен қайнар көздері туралың ҚР Үкіметінің Қаулысы 17.05.2000.
12. Патронат туралы ҚР Үкіметінің Қаулысымен Бекітілген Ереже 09.09.99.
13. ҚР-ның азаматы болып табылатын балаларды асырап алуға ниет білдірген шет ел азаматтарын есепке алу туралы ҚР сыртқы істер министрінің Бұйрығымен 17.06.99 ж. Бекітілген Ереже.
14. ҚР Үкіметінің 09.09.99 жылғы Қаулысымен бекітілген Ата-анасының қамқорынан айырылған балаларды орталықтандырып есепке алуды ұйымдастырудың тәртібі туралы ережесі.

15. Құқықтық жәрдем көрсету мен азматтық, отбасылық, сондай-ақ қылмыстық істер бойынша Конвенция 03.01.93.

16. Балалар құқығы туралы Конвенция (Нью-Йорк, 20.11.89 ж.). ҚР Қаулысымен 08.06.94 бекітілген.

17. “Балаларды (қыздарды) асырап алуға байланысты істерді қарау кезінде соттардың неке және отбасы туралы заңнамаларды қолдануының кейбір мәселелері туралы ҚР Жоғарғы Сот Пленумының Қаулысы 22.12.2000.

18. Білім алу кезінде мұқтаж адамдарға берілетін әлеу-меттік жәрдемнің мөлшері мен қайнар көздері туралы 17.05.2000 ж. ҚР Үкіметінің Қаулысымен Бекітілген Нұсқауы.

Әдебиеттер

1. Антокольская М. В. Семейное право.- М.: Юристъ, 1996.

2. Антокольская М. В. Курс лекций по семейному праву.- М.: Юристъ, 1995.

3. Гражданское право. Оқулық. 3 бөлім. // А. П. Сергеев, Ю. К. Толстойдың редакциясы бойынша.- М.: ПРОСПЕКТ, 1998.

4. Нечаева А. М. Семейное право. Курс лекций.- М.: Юристъ, 2000.

5. Беспалова А. И. Правовая охрана детства.- А., 1985.

6. Романова Л. М. О судебной практике по применению судами законодательство об усыновлении (удочерению). // Гражданское законодательство РК. Выпуск 10.- А.: ТОО Баспа, 2000.

7. Шакенова Б. Проблема усыновленных детей. // Юридическая газета, 12.04.2000.- № 16.

8. Шершеневич Г. Ф. Курс гражданского права.— Тула: Афтограф, 2001.

Есептер

1. Туған әкпесі қайтыс болғаннан кейін оның екі жасар қызын Коваленко қолына алады. Арада бір жыл өткеннен кейін Коваленко жергілікті қорғаншы және қамқоршы органға жүгініп үш жасар Ленаны қалай асырап алуға болатындығы туралы кеңес береуді

сұрайды, сондай-ақ ол бұл күнде кішкентай қыздың өзіне өте бауыр басып кеткенін және оны мама деп атайтынын айтады. Осы уақытқа дейін қыздың әкесі оны іздеп біде-бір рет келген емес және ешқашанда материалдық жәрдем көрсетпейтін. Сонымен бірге Ленаның әкесі басқа әйелмен некеге тұрып және таяу күндері олар өзге бір қалаға көшпекші екен. Коваленко ең алдымен қызды асырап алуға оның құқығы бар ма және ол үшін қандай құжаттар қажет екендігін айтып беруді сұрайды.

Коваленконың сұрағына қалай жауап берер едіңіздер?

Қазақстан Республикасының “Неке және отбасы туралы Заңында бала асырап алудың қандай тәртіптері белгіленген?

2. АҚШ-тан келген ерлі-зайыптылар қорғаншы және қамқоршы органға келіп Қазақстан Республикасының

аза-маты болып табылатын баланы қалай асырап алуға болатындығы туралы мәлімет беруді өтінеді. Олар асырап алғысы келетін баланың жасының екіден аспауын және мүмкін болса славян ұлтынан болуын

қалайтындықтарын мәлімдейді. Ерлі-зайыпты Тимсондар Қазақстанға тек үш аптаға ғана келгендіктен, мүмкін болса осы мерзім аралығында асырап алуға бала тауып, оны Америкаға өздерімен бірге алып қайтқысы келетіндіктерін айтады. Осыған орай олар бала асырап алу процедурасы жалпы қанша уақытты қажет ететіндігін және олардан қандай құжаттардың талап етілетіндігін білгісі келеді.

Ерлі-зайыптыларға қалай жауап берер едіңіздер?

Асырап алушылар шет ел азаматтары болған жағдайда асырап алудың ерекшеліктері қандай болады?

3. 2001 жылдың маусым айында асырап алынған баланың анасы-Исакова Мадина сотқа талап-арыз беріп Абишеваның бала асырап алуға байланысты құжаттарының күшін жоюды талап етеді, себебі талапкердің пікірінше ол асырап алуды оның келісімін алмай жүзеге асырған.

Іс сотта қаралған кезде талапкер мына жайларды мәлімдейді: 2001 жылдың мамыр айында ол өзінің баласы Асқарды, шешесінің үйіне қалдырып кеткен болатын, себебі жұмыс бабымен жолсапарға жиі шығуына тура келетін еді, міне осыны пайдаланып өзінің ағасы Т. Исаковпен бірге тұратын Абишева баланы оның шешесінен алып қояды.

Кезекті жол сапардан оралып ол өз баласын қайтып алып кетпекші болғанда өзінің туған ағасы және Абишева баланы жаз соңына дейін тағы қалдыра тұруды өтінеді. Шілде айында Абишева Т. Исаковпен араздасып қалады, осыдан кейін қорғаншы және қамқоршы органнан жасырып Аби-шева баланы өзімен бірге алып кетіп қалады.

Мадина Исакованың талабы қанағаттандыруға жата ма?

Бала (қыз) асырап алудың күшін жоюға негіз болатын жағдайларды атаңыздар. Бала асырап алудың күшін жою мен бала асырап алуды жарамсыз деп танудың қандай айырмашылығы бар?

4. 14 жасар Томирис Мамедованың ата-анасы ұшақ апатынан қайтыс болып кеткен болатын. Он бір жасынан бастап содан бері Томирис өзінің анасының әкпесі Хасанованың үйінде тұрып жатады және ол ресми түрде Томирисінің қамқоршысы болып табылатын.

Томирис болса музыка мектебінің сегізінші сыныбында оқитын.

Бірде Хасановаға Томирисінің жүкті болып қалғаны белгілі болады. Тәтесімен онаша сөйлескенде Томирис баланың оған керек еместігін айтады. Тәтесі қыздың бұл шешіміне қарсы болмайды, әрі оған сәбиді перзентханада қалдырып кетуге кеңес береді. Сәбидің әкесі болып 15 жасар Руслан Тайров танылады, сондай-ақ оның әкешесі де Хасанованың пікіріне қарсы емес еді.

Томирис перзентханада қыз туады да, оның бас дәрі-геріне жаңа туылған нәрестені перзентханада қалдырып кеткісі келетіндігін мәлімдейді. Мұны естіп білгеннен кейін перзентхананың бас дәрігері қорғаншы және қамқоршы органының өкілдерін шақыртып Томирис Мамедова мен Руслан Тайровқан қызды басқа біреулердің асырап

алуларына қарсы емес екендіктерін білдіріп, бірлесіп арыз жазуларын сұрайды. Істі шешініздер. Кәмлетке жасы толмаған ата-аналардың - басқа біреулердің баласын (қызын) асырап алуға келісім беруі қалай жүзеге асырылады?

5. Нүркен Абдуловты әскери борышын өтеуге шақырған кезде ол Алмагүл Айдаровамен заңды некеде болатын және олардың бір жасар Арман есімді балалары бар еді.

Алғашқы уақыттарда Нүркен өзінің әйеліне жиі хат жазып тұратын, бір жылдан кейін Алмагүл хаттардың сирек келе бастағанын байқайды, ал әскери борышын аяқтауға үш ай қалғанда ол хат жазуды мүлдем қояды.

Осыдан кейін ол өзі туралы ешбір хабар бермейді. Алмагүл Нүркеннің ата-анасынан өзінің күйеуі туралы мәлімет сұрап барғанда олар баласынан бір жылдам астам уақыт бойы ешбір хабар алмағандарын айтады.

Айдарованың талап-арызы бойынша сот Абдуловты хабарошарсыз кетті деп таниды.

Бір жылдан кейін автомобиль апатынан Алмагүл Айдарова қаза табады. Ал Арманды атасы мен әжесінің өтінішіне қарамастан, карт адамдар балаға қажетті күтім жасай алмай-ды деген желеумен балалар үйіне беріп жібереді.

Асырап алуға бала іздеп балалар үйіне жиі келіп жүретін ерлізайыпты Сағатжановтар Арманды көріп оны бірден ұнатып қалады. Көп уақыт өтпей олар балалар үйінің директорына өтініш білдіріп, Арманды өздерінің жанұясына тәрбиеге алғысы келетіндіктерін айтады. Қажетті құжаттар рәсімделгеннен кейін ерлізайыпты Сағатжановтар Арманды асырап алады.

2000 жылы Арман алты жасқа толғанда баланың әкесі Нүркен Абдулов қайтып оралады.

Өзінің ұзақ уақыт бойы хабар-ошарсыз кетуін ол әскери борышын өтегеннен кейін басқа бір әйелмен жанұя құрып бірге тұрғанымен түсіндіреді. Бұл күнде оның жаңа жанұясы және екі аласы бар екен.

Нүркен Абдулов әйелінің қайтыс болғанын естіп-біліп, енді Арманды өзінің жанұясына өзімен бірге алып кетпекші болады. Осыдан кейін Абдулов қорғаншы және қамқоршы органға өтініш жасап өзінің ұлы Арманмен кездесу ұйымдастыруды сұрайды.

Кездесу кезінде Арман әкесін танымайтын болып шығады және онымен бірге тұрғысы келмейтіндігін, өзінің жаңа ата-анасымен қалғысы келетіндігін мәлімдейді.

Нүркен Абдулов Сағатжановтардан өзінің ұлын қайтарып беруді талап ете ала ма? Осы жағдайда Арманның қалауы, яғни пікірі ескеріле ме? Баласын қайтарып алу үшін Нүркен Абдулов қандай әрекеттер жасауға тиіс?

6. 2000 жылы қазан айының 20-сы күні кешке кезекші полицей-Шахаметов Орталық автовокзал маңынан кішкентай баланы кездестіреді. Баланың келбеті жүдеу, күтімсіз әрі жұпыны жеңіл киінген екен және ол орыс тілін түсінбейтін болып шығады. Көп өтпей бұл баланың жасы үште және ұлты тәжік екендігі белгілі болады. Баланың жейдесінің қалтасынан табылған бір жапырақ қағазда баланың есімі - Шахрух екендігі жазылған екен. Сол күні Шахрух қалалық балалар ауруханасына жеткізіліп, тексеруден өткеннен кейін балалар үйіне жіберіледі.

Ерлі-зайыпты Николаевтар қорғаншы және қамқоршы органға өтініш білдіріп Шахрухты асырап алуға рұқсат етуді сұрайды. Қорғаншы және қамқоршы органның қызметкер-лері өкінішке орай бұл баланы ерлі-зайыпты Николаевтардың асырап алуына болмайтындығын айтады, себебі бұл баланың ұлты - тәжік, орыстілін білмейді және діні мен мәдениеті бөлек деп түсіндіреді. Бала асырап алу кезінде осы факторлар міндетті түрде ескерілуі тиіс.

Қорғаншы және қамқоршы органның қызметкерлерінің берген түсініктемелеріне баға беріңіздер? Бала асырап алу кезінде баланың қай ұлтқа жататыны, тілі мен діні, мәдениетінің ерекшеліктері ескерілуі тиіс пе?

Ерлі-зайыпты Николаевтарға қандай кеңес берер едіңіздер?

7. Қапшағай қаласының тұрғыны Фазылова 6 жылға сотталып бас бостандығынан айырылады. Оның әкесіз тәрбиеленген 12 жасар Расул есімді баласы бар болатын. Қамқоршы және қорғаншы орган Расулдың қорғаншысы етіп Фазылованың ағасы - Мамед Фазыловты тағайындайды. Фазыловтың өзінің жеке меншігінде кафесі бар болатын, ол үнемі сол жерде жүретін және іс жүзінде баланың тәрбиесімен мүлдем айналыспайтын. Расул осылайша Фазыловтың пәтерінде жалғыз өзі тұрып жатады, қорғаншысын тек азық-түлік әкелгенде ғана көріп тұратын.

Әр жыл сайын ерте көктемнен бастап жаз соңына дейін Фазылов Расулды кафеге жұмыс істеуге алып баратын. Соның салдарынан ол әр жыл көктем шыққа кезден бастап мектепке сабаққа бармайтын еді.

Расул 14 жасқа толған кезде Фазылов енді оның қамқоршысы болып тағайындалады. Бір күні қамқоршысының дағдылы дәрежі де қатыгез қарым-қатынасына шыдамаған Расул қашып кетеді де, сотқа талап-арыз беріп, өзіне тағайындалған қамқоршысынан бас тартатындығын мәлімдейді. Істі шешіңіздер.

Тағайындалып қойған қамқоршылықты қай орган жоя алады?

Фазылов өзінің қамқорындағы Расулдың қандай құқықтарын бұзған?

Расулдың талабы қанағаттандыруға жата ма?

8. 24 жастағы Тимур Төлеубаев пен 20 жасар Айжан Алданова екеуі де қызмет бабы бойынша жолсапармен Астанаға кетіп бара жатқанда поездда танысады. Олар бірін-бір ұнатады.

Арада бірнеше ай өткенне соң Айжанның аяғы ауыр болып қалады. Айжанның жүктілігі сегіз айға жеткенде олар АХАЖ органына өтініш білдіріп некелерін заңдаструды сұрайды. Арада екі апта өткенен кейін олардың некелері тіркеліп үлгермей жатып Айжанды перзентханаға алып кетеді. Айжан перзентханада ұл туады да өзі қайтыс болып кетеді.

Тимур перзентханадан баланы алып кетуге келгенде оған баланы бермейді, себебі ол Айжанмен заңды некеде әлі жоқ болатын. Тимур

кеңес алу үшін заңгерге келгенде заңгер оған, алдымен оның балаға қорғаншысы болып жазылуын, ал содан кейіннен баланы асырап алуына болатынын түсіндіреді.

Төлеубаев қажетті құжаттарды жинап балаға қорғаншы болуды рәсімдеп жүргенде сәбиді перзентханадан Айжанның анасы - Қарылғаш Алданова үйіне алып кетеді. Қарылғаш Алданова баланы әкесіне беруден мүлдем бас тартады. Нәтижесінде баланың туған әкесі мен әжесінің арасында дау туындайды. Істі шешіңіздер.

Нәрестені Алдановаға бере салған перзентхана қызметкерлерінің әрекетіне баға беріңіздер.

Неке және отбасы туралы

Қазақстан Республикасының Заңы 1998 жылғы
17 желтоқсан N 321-І
Қазақстан Республикасы Парламентінің Жаршысы,
1998 ж., N 23

Осы Заң Қазақстан Республикасындағы неке-отбасы қатынастарын, сондай-ақ оларды жүзеге асырудың кепілдіктерін белгілеп, реттейді, отбасының дамуын Қазақстан Республикасы мемлекеттік әлеуметтік саясатының басым бағыты деп анықтай отырып, оның құқықтары мен мүдделерін қорғауды қамтамасыз етеді.

1-БӨЛІМ. ЖАЛПЫ ЕРЕЖЕЛЕР

1-тарау НЕКЕ-ОТБАСЫ ЗАҢДАРЫ

1-бап. Осы Заңда пайдаланылатын негізгі ұғымдар

Осы Заңда мынадай ұғымдар пайдаланылады:

1) неке - ерлі-зайыптылар арасындағы мүліктік және мүліктік емес жеке қатынастарды туғызатын, отбасын құру мақсатымен заңдарда белгіленген тәртіппен тараптардың ерікті және толық келісімі жағдайында жасалған еркек пен әйелдің арасындағы тең құқықты одақ;

2) жалған неке - отбасын құру ниетінсіз заңда белгіленген тәртіппен жасалған және ерлі-зайыптылардың құқықтары мен міндеттерін туғызбайтын неке;

3) отбасы - некеден, туыстықтан, бала асырап алудан немесе балаларды тәрбиеге алудың өзге де нысандарынан туындайтын мүліктік және мүліктік емес жеке құқықтар мен міндеттерге байланысты және отбасы қатынастарын нығайту мен дамытуға жәрдемдесуге тиісті адамдар тобы;

4) неке жасы - адамның некеге тұру құқығына жеткендегі жасы;

5) балалық шақ - кәмелетке толмаған адамдардың құқықтық жай-күйі;

6) мүліктің шарттық режимі - ерлі-зайыптылардың және олардың осы некеден туған балаларының неке шартымен белгіленген меншігінің режимі;

7) суррогат ана шарты - балалы болуды қалайтын адамдар мен бойға бала бітірудің жасанды әдісін немесе эмбрион

имплантациясын қолдануға келісімін берген әйелдің арасындағы келісім;

8) патронат - уәкілетті мемлекеттік орган мен баланы тәрбиелеуге алуға тілек білдірген адамның (патронат тәрбиешінің) жасасқан шарты бойынша ата-анасының қамқорлығынсыз қалған балалар азаматтардың отбасына тәрбиелеуге берілетін тәрбие нысаны;

9) алименттер - алуға құқығы бар екінші адамға бір адам беруге міндетті болатын асырау қаражаты;

10) отбасылық жағдай - некеде тұрғандағы немесе айырылысқандағы жағдай, балалардың немесе отбасының басқа да мүшелерінің болуы немесе болмауы;

11) материалдық жағдай - жалақының, зейнетақының, басқа да табыстардың болуы немесе болмауы; олардың мөлшері; мүлктің болуы; еңбек қабілетін жоғалту дәрежесі; отбасының басқа мүшелерінен материалдық көмек алуы немесе алмауы;

12) азаматтық хал актілері - адамның құқықтары мен міндеттерінің пайда болуына және тоқтатылуына байланысты оны дараландыратын заңдық ресімделген мән-жайлар;

13) жақын туыстары - ата-аналар, балалар, асырап алушылар, асырап алынғандар, ата-анасы бір және ата-анасы бөлек ағалы-інілер мен апалы-сіңлілер (аға-қарындастар), ата, әже, немерелер;

14) қорғаншы (қамқоршы) - қорғаншылық пен қамқоршылық жөніндегі міндеттерді жүзеге асыру үшін заңда белгіленген тәртіппен тағайындалған адам;

15) қорғаншылық (қамқоршылық) - кәмелетке толмағандардың және сот әрекетке қабілетсіз (әрекет қабілеттілігі шектеулі) деп таныған адамдардың құқықтары мен мүдделерін қорғаудың құқықтық нысаны;

16) репродукциялық денсаулық - адамның толымды ұрпақ туғызуға қабілетін көрсететін денсаулығы;

17) суррогат ана - суррогат ана мен ықтимал ата-ана арасындағы шарт бойынша бойға бала бітіру, оны көтеру және туу.

2-бап. Неке-отбасы заңдарының негіздері

1. Неке және отбасы, ана, әке және бала мемлекеттің қорғауында болады.

2. Қазақстан Республикасының неке-отбасы заңдары:

1) еркек пен әйелдің некелі одағының еріктілігі;

2) ерлі-зайыптылардың отбасындағы құқықтарының теңдігі;

3) отбасының ісіне кімнің болса да өз бетінше араласуына жол берілмеушілік;

4) отбасы ішіндегі мәселелерді өзара келісіммен шешу;

5) балаларды отбасында тәрбиелеуге басымдық беру, олардың өсіп-жетілуі мен әл-ауқатты болуына қамқорлық жасау;

6) отбасының кәмелетке толмаған және еңбекке қабылетсіз мүшелерінің құқықтары мен мүдделерін қорғауға басымдық беру;

7) отбасы мүшелерінің өз құқықтарын кедергісіз жүзеге асыруын қамтамасыз ету, бұл құқықтарды сот қорғауының мүмкіндіктері;

8) отбасының барлық мүшелерін салауатты тұрмыс салтына ынталандыру принциптеріне негізделеді.

3. Мемлекеттік азаматтық хал актілерін жазу органдарында қиылған неке ғана танылады.

4. Некеге тұруы кезінде және отбасылық қатынастарда әлеуметтік, нәсілдік, ұлттық тіл және діни белгілері бойынша азаматтардың құқықтарын шектеудің кез келген нысандарына тыйым салынады.

Азаматтардың неке-отбасы қатынастарындағы құқықтары тек заң негізінде және отбасы мүшелері мен өзге де азаматтардың денсаулығын, адамгершілігін, құқықтарын және заңды мүдделерін қорғау мақсатында қаншалықты қажет болса, сондай шамада ғана шектелуі мүмкін.

3-бап. Неке-отбасы заңдарымен реттелетін қатынастар

Неке-отбасы заңдары:

1) некеге тұрудың, некені тоқтатудың және оны жарамсыз деп танудың шарты мен тәртібін белгілейді;

2) отбасы мүшелерінің: ерлі-зайыптылардың, ата-аналар мен балалардың (асырап алушылар мен асырап алынғандардың) арасындағы, ал неке-отбасы заңдарында көзделген жағдайларда және шектерде басқа туыстар мен өзге де адамдардың арасындағы азаматтық құқықтар мен міндеттерді, мүліктік емес және мүліктік жеке қатынастарды реттейді;

3) ата-анасының қамқорлығынсыз қалған балаларды отбасына орналастырудың нысандары мен тәртібін айқындайды;

4) азаматтық хал актілерін тіркеу және заңдарда белгіленген тәртіппен ақылы қызмет көрсету тәртібін реттейді.

4-бап. Неке-отбасы заңдары және отбасы құқығының нормаларын қамтитын өзге де актілер

Қазақстан Республикасының неке және отбасы туралы заңдары Қазақстан Республикасының Конституциясына

негізделеді, осы Заңнан, отбасылық құқық нормалары қамтылатын Қазақстан Республикасының өзге де нормативтік құқықтық актілерінен тұрады.

5-бап. Неке-отбасы қатынастарына азаматтық заңдарды қолдану

1. Осы Заңның 3-бабында аталған, неке-отбасы заңдарымен реттелмеген (осы Заңның 4-бабы) отбасы мүшелерінің арасындағы мүліктік және мүліктік емес жеке қатынастарға азаматтық заңдар қолданылады, өйткені ол неке-отбасы қатынастарының мәніне қайшы келмейді.

2. Осы заңның 3-бабында көзделген қатынастар заңдармен немесе тараптардың келісімімен реттелмеген және оларға қолданылатын әдет-ғұрып болмаған жағдайларда, бұл олардың мәніне қайшы келмейтіндіктен, мұндай қатынастарға ұқсас қатынастарды реттейтін неке-отбасы және (немесе) азаматтық заңдардың нормалары (заң ұқсастығы) қолданылады. Аталған жағдайларда заң ұқсастығын пайдалану мүмкін болмаса, неке-отбасы қатынастары субъектілерінің құқықтары мен міндеттері неке-отбасы немесе азаматтық заңдардың жалпы негіздері мен мәні және адалдық, парасаттылық пен әділеттілік талаптары (құқық ұқсастығы) негізге алынып айқындалады.

2-тарау НЕКЕ-ОТБАСЫ ҚҰҚЫҚТАРЫН ЖҮЗЕГЕ АСЫРУ ЖӘНЕ ҚОРҒАУ

6-бап. Неке-отбасы қатынастарындағы құқықтар мен міндеттерді жүзеге асыру

1. Егер заң актілерінде өзгеше белгіленбесе, азаматтар өздеріне тиесілі неке-отбасы қатынастарынан туындайтын құқықтарды, оның ішінде осы құқықтарды қорғауға арналған құқықты өз қалауы бойынша қолданады.

Неке-отбасы құқықтарын жүзеге асыру және міндеттерді орындау отбасының басқа мүшелері мен құқықтың өзге субъектілерінің құқықтарын, бостандығын және заңды мүдделерін бұзбауға тиіс.

2. Неке-отбасы құқықтары заңмен қорғалады, бұған осы құқықтардың мақсатына қайшы келетін жағдайлар қосылмайды.

7-бап. Неке-отбасы құқықтарын қорғау

Неке-отбасы құқықтарын қорғауды азаматтық сот ісін жүргізу ережелері бойынша - сот, ал осы Заңда көзделген жағдайларда

мемлекеттік органдар немесе қорғаншы және қамқоршы органдар осы Заңның тиісті баптарында көзделген тәртіппен жүзеге асырады.

8-бап. Неке-отбасылық қатынастарға талап-арыздың ескіруін қолдану

1. Талап-арыздың ескіруі неке-отбасы қатынастарынан туындайтын талаптарға қолданылмайды, бұған бұзылған құқықты қорғауға арналған мерзім осы Заңмен белгіленген жағдайлар қосылмайды.

2. Талап-арыздың ескіруін белгілейтін нормаларды қолдану кезінде сот Қазақстан Республикасы Азаматтық кодексінің (жалпы бөлім) 177, 179, 180, 182-185-баптарының ережелерін басшылыққа алады.

2-БӨЛІМ. НЕКЕ

3-тарау

НЕКЕГЕ ТҰРУДЫҢ ШАРТТАРЫ МЕН ТӘРТІБІ

9-бап. Некеге тұру шарттары

1. Некеге тұру үшін некеге тұрушы еркек пен әйелдің өзара ерікті келісімі және олардың неке жасына жетуі қажет.

2. Неке осы Заңның 11-бабында аталған мән-жайлар болған жағдайда қиылмайды.

10-бап. Неке жасы

1. Неке жасы еркектер мен әйелдер үшін он сегіз жас болып белгіленеді.

2. Дәлелді себептер болған жағдайда мемлекеттік тіркеу орны бойынша азаматтық хал актілерін жазу органдары неке жасын екі жылдан аспайтын мерзімге төмендетуі мүмкін.

3. Неке жасын төмендету туралы өтінішті некеге тұруға тілек білдірушілер немесе олардың ата-аналары, не қорғаншылары (қамқоршылары) белгіленген неке жасын төмендету қажеттігін туғызатын себептерді көрсете отырып қозғай алады.

4. Барлық жағдайларда неке жасын төмендетуге тек некеге тұрушылардың келісімімен ғана жол беріледі.

5. Неке жасына толмаған адамдар арасындағы некеге ата-аналарының не қорғаншыларының келісімімен ғана рұқсат етіледі.

11-бап. Араларында неке қиылуына жол берілмейтін адамдар

Некеге тұруға:

- 1) біреуі болса да басқа тіркелген некеде тұрған адамдардың;
- 2) тікелей ата-тегі бойынша және өзінен тарайтын жақын туыстардың (ата-аналар мен балалардың, атасының, әжесінің және немерелерінің), ата-анасы бір және ата-анасы бөлек әкесі немесе анасы ортақ ағалы-інілер мен апалы-сіңілілердің (аға-қарындастардың);
- 3) асырап алушылар мен асырап алғандардың;
- 4) біреуін болса да психикалық ауруының немесе ақыл есі кемдігінің салдарынан сот әрекетке қабілетсіз деп таныған адамдардың арасында жол берілмейді.

12-бап. Некеге тұратын адамдарды медициналық тексеру

1. Некеге тұруға тілек білдіруші адамдарға медициналық, сондай-ақ медициналық-генетикалық мәселелер және репродукциялық денсаулық қорғау мәселелері бойынша консультация беру мен тексеруді мамандандырылған денсаулық сақтау мекемелері және некеге тұратын адамдардың екеуінің келісімімен ғана жүргізеді.

2. Некеге тұратын адамдарды тексерудің нәтижелері медициналық құпия болып табылады және ол некеге тұруға ниеттенген адамға тексеруден өткен адамның келісімімен ғана хабарлануы мүмкін.

13-бап. Некеге тұру тәртібі

1. Некеге тұратын адамдардың тікелей қатысуымен неке мемлекеттік азаматтық хал актілерін жазу органдарында қиылады.

Некеге тұруға ниет білдірген адамдардың біреуі азаматтық хал актілерін жазу органына келе алмайтын ерекше жағдайларда неке мұндай адамның тұратын жері бойынша қиылуы мүмкін.

Неке қию кезінде өкіл жіберуге жол берілмейді.

2. Некені қию некеге тұруға тілек білдірушілер азаматтық хал актілерін жазу органына арыз берген күннен бастап бір ай мерзім өткен соң жүргізіледі.

Дәлелді себептер болған жағдайда неке қиюды мемлекеттік тіркеу орны бойынша азаматтық хал актілерін жазу органы бір ай өткенге дейін неке қиюға, сондай-ақ осы мерзімді ұзартуға, бірақ бір айдан аспайтын мерзімге ұзартуға рұқсат етуі мүмкін.

Ерекше мән-жайлар болған кезде (жүктілік, бала тууы, бір тараптың өміріне тікелей қауіп төнуі және басқа да ерекше мән-жайлар) неке өтініш берілген күні қиылуы мүмкін.

3. Неке қиюды мемлекеттік тіркеу азаматтық хал актілерін мемлекеттік тіркеу үшін белгіленген тәртіппен жүргізіледі.

4. Азаматтық хал актілерін жазу органдарының некені тіркеуден бас тартуына некеге тұруға тілек білдіруші адамдар не олардың біреуі сотқа шағым жасай алады.

4-тарау НЕКЕНІ ТОҚТАТУ

14-бап. Жұбайының (зайыбының) қайтыс болуы және оны өлді немесе олардың біреуі хабар-ошарсыз кеткен деп жариялау салдарынан некенің тоқтатылуы

1. Неке ерлі-зайыптылардың біреуінің қайтыс болуы немесе сот оны өлді немесе хабар-ошарсыз кеткен деп жариялау салдарынан тоқтатылады.

2. Сот қайтыс болды деп жариялаған немесе сот хабар-ошарсыз кеткен деп таныған жұбайы келген және тиісті сот шешімі күшін жойған жағдайда некені ерлі-зайыптылардың бірлескен өтініші бойынша азаматтық хал актілерін жазу органы қалпына келтіруі мүмкін.

3. Егер жұбайлардың екіншісі жаңа некеге отырса, некені қалпына келтіруге болмайды.

Егер неке қию кезінде тараптарға (немесе тараптардың біреуіне) қайтыс болды немесе хабар-ошарсыз кетті деп танылған жұбайы тірі екені белгілі болса, бұл ереже қолданылмайды.

15-бап. Некені бұзу

1. Неке ерлі-зайыптылардың біреуінің немесе екеуінің де өтініші бойынша, сондай-ақ сот әрекетке қабілетсіз деп таныған жұбайдың қорғаншысының өтініші бойынша оны бұзу жолымен тоқтатылуы мүмкін.

2. Некені әйелдің жүктілігі кезеңінде және бала туғаннан кейінгі бір жыл ішінде әйелдің келісімінсіз бұзуға болмайды.

16-бап. Азаматтық хал актілерін жазу органдарында некені бұзу

1. Азаматтық хал актілерін жазу органдарында некені бұзу кәмелетке толмаған ортақ балалары жоқ және бір-біріне мүлкітік және өзге де талаптар қоймайтын ерлі-зайыптылардың некені бұзуға өзара келісуі жағдайында жүргізіледі.

2. Ерлі-зайыптыларға ортақ кәмелетке толмаған балаларының болуына қарамастан, ерлі-зайыптылардың біреуінің өтініші бойынша, егер ерлі-зайыптылардың екіншісін:

1) сот хабар-ошарсыз кеткен деп таныса;

2) сот әрекетке қабілетсіз деп таныса;

3) қылмыс жасағаны үшін кемінде үш жыл мерзімге бас бостандығынан айыруға сотталса, неке азаматтық хал актілерін жазу органдарында бұзылады.

3. Некенің бұзылуын мемлекеттік тіркеуді азаматтық хал актілерін жазу органы азаматтық хал актілерін мемлекеттік тіркеу үшін белгіленген тәртіппен жүргізеді.

17-бап. Азаматтық хал актілерін жазу органдарында некені бұзу кезінде ерлі-зайыптылардың арасында туындайтын дауларды қарау

Некені бұзу кезінде ерлі-зайыптылардың арасында туындайтын даулар азаматтық хал актілерін жазу органдарында сот тәртібімен қаралады.

18-бап. Некені сот тәртібімен бұзу

Некені сот тәртібімен бұзу:

1) осы Заңның 16-бабының 2-тармағында көзделген жағдайларды қоспағанда, ерлі-зайыптыларда кәмелетке толмаған ортақ балалардың болуы;

2) ерлі-зайыптылардың біреуінің некені бұзуға келісімі болмаған кезде;

3) егер ерлі-зайыптылардың біреуі өзінің қарсылығы болмауына қарамастан, некені бұзудан өз әрекеттері не әрекетсіздігі арқылы жалтарса;

4) ерлі-зайыптылардың бір-біріне мүлкітік талаптары болған жағдайларда жүргізіледі.

19-бап. Ерлі-зайыптылардың біреуінің некені бұзуға келісім болмаған жағдайда некені сот тәртібімен бұзу

1. Егер сот ерлі-зайыптылардың одан әрі бірлесіп өмір сүруі және отбасын сақтауы мүмкін еместігін анықтаса, неке сот тәртібімен бұзылады.

2. Ерлі-зайыптылардың біреуінің некені бұзуға келісімі болмаған жағдайда, сот ерлі-зайыптыларды татуластыруға шаралар қолдануға және ерлі-зайыптыларға татуласу үшін үш ай көлемінде мерзім тағайындай отырып, істі қарауды кейінге қалдыруға құқылы.

Егер ерлі-зайыптыларды татуластыру жөніндегі шаралар нәтижесіз болып шықса және ерлі-зайыптылар (олардың біреуі) некені бұзуды талап етсе, неке бұзылады.

20-бап. Өзге де негіздер бойынша некені сот тәртібімен бұзу

1. Кәмелетке толмаған ортақ балалары бар ерлі-зайыптылардың, сондай-ақ осы Заңның 18-бабының 3) тармақшасында аталған ерлі-зайыптылардың некені бұзуға өзара келісімі болған жағдайда сот некені айырылысу себептерін анықтамай-ақ бұзады.

2. Некені сот тәртібімен бұзу ерлі-зайыптылар некені бұзу туралы арыз берген күннен бастап кемінде бір ай өткен соң жүргізіледі.

3. Ерекше жағдайларда сот осы баптың 2-тармағында аталғанынан кемірек мерзім белгілеуі мүмкін.

21-бап. Некені бұзу туралы шешім шығару кезінде сот шешетін мәселелер

1. Некені сот тәртібімен бұзу кезінде ерлі-зайыптылар соттың қарауына кәмелетке толмаған балалар өздерінің қайсысымен тұратындығы туралы, балаларды және (немесе) еңбекке жарамсыз мұқтаж жұбайын асырауға қаражат төлеу тәртібі туралы, бұл қаражаттың мөлшері туралы не ерлі-зайыптылардың ортақ мүлкін бөлу туралы келісім ұсына алады.

2. Егер ерлі-зайыптылардың арасында осы баптың 1-тармағында аталған мәселелер бойынша келісім болмаса, сондай-ақ ол келісім балалардың немесе ерлі-зайыптылардың біреуінің мүдделерін бұзатындығы анықталса, сот:

1) неке бұзылғаннан кейін кәмелетке толмаған балалар ата-анасының қайсысымен тұратындығын айқындауға;

2) балаларды асырауға алимент ата-аналардың қайсысынан және қандай мөлшерде өндіріліп алынатынын белгілеуге;

3) ерлі-зайыптылардың (олардың біреуінің) талап етуі бойынша олардың бірлескен ортақ меншігіндегі мүлікті бөлуді жүргізуге;

4) екінші жұбайдан асырауға қаражат алуға құқығы бар жұбайдың талап етуі бойынша осы асырау қаражатының мөлшерін айқындауға міндетті.

3. Егер мүлікті бөлу үшінші бір адамдардың мүдделерін қозғайтын болса, сот мүлікті жеке іс жүргізіліп бөлу туралы талапты жеке істе қозғауға құқылы.

22-бап. Некенің ол бұзылған жағдайда тоқтатылу кезі

1. Азаматтық хал актілерін жазу органдарында бұзылатын неке азаматтық хал актілерін жазу кітабында некенің бұзылғандығы мемлекеттік тіркелген күннен бастап, ал неке сотта бұзылған жағдайда - соттың шешімі заңды күшіне енген күннен бастап тоқтатылады.

2. Сот некені бұзу туралы соттың шешімі заңды күшіне енген күннен бастап үш күн ішінде сот шешімінің көшірмесін шешім шығарылған жердегі, сондай-ақ неке қию мемлекеттік тіркелген жердегі азаматтық хал актілерін жазу органына жолдауға міндетті.

Ерлі-зайыптылардың азаматтық хал актілерін жазу органында некенің бұзылғаны туралы куәлік алғанға дейін жаңадан некеге тұруға құқығы жоқ.

23-бап. Некені тоқтатудың салдары

Некенің тоқтатылуымен ерлі-зайыптылардың, осы Заңда көзделген жағдайларды қоспағанда, некелік қатынастарынан туындайтын жеке және мүліктік құқықтары мен міндеттері тоқтатылады.

5-тарау НЕКЕНІҢ ЖАРАМСЫЗДЫҒЫ

24-бап. Некені жарамсыз деп тану

1. Осы Заңның 9-11-баптарында белгіленген шарттар бұзылған кезде, сондай-ақ жалған жасалған жағдайда неке жарамсыз деп танылады.

2. Мәжбүрлеп қиылған неке жарамсыз деп танылуы мүмкін.

3. Егер некеге тұрушы адамдардың біреуі екіншісінен құрылған отбасы мүшелеріне, жеке басының және қоғамның қауіпсіздігіне нақты қатер төндіретін ауруы бар екенін жасырса, соңғысы сотқа некені жарамсыз деп тану туралы талаппен жүгінуге құқылы.

4. Некені жарамсыз деп тануды сот жүргізеді.

5. Сот некені жарамсыз деп тану туралы соттың шешімі заңды күшіне енген күннен бастап үш күн ішінде соттың осы шешімімен

некеге тұру мемлекеттік тіркелген жердегі азаматтық хал актілерін жазу органына көшірме жіберуге міндетті.

6. Некенің жарамсыздығы оның қиылған күнінен бастап танылады.

25-бап. Некені жарамсыз деп тануды талап етуге құқығы бар адамдар

1. Некені жарамсыз деп тану туралы талап қоюға:

1) егер неке жасына толмаған адаммен неке қиылса (осы Заңның 10-бабы), кәмелетке толмаған жұбайы, оның ата-анасы (оларды ауыстыратын адамдар), қорғаншы және қамқоршы орган немесе прокурор құқылы. Кәмелетке толмаған жұбай он сегіз жасқа толғаннан кейін некені жарамсыз деп тануды талап етуге тек оның өзі ғана құқылы;

2) егер некеге тұруға ерлі-зайыптылардың бірінің ерікті келісімі болмаған жағдайда: мәжбүр ету, алдау, қателесу немесе өзінің жай-күйінің салдарынан некеге тұруды мемлекеттік тіркеу кезінде өзінің әрекеттерінің маңызын түсінбей және өзін-өзі билей алмауы себепті неке қиылған болса, некеге тұру арқылы құқығы бұзылған жұбай, сондай-ақ прокурор;

3) некені қиюға кедергі келтіретін мән-жайлардың бар екенін білмеген жұбай, әрекетке қабілетсіз деп танылған жұбайдың қорғаншысы, оның алдындағы бұзылмаған неке бойынша жұбайы, осы Заңның 11-бабының талаптарын бұза отырып қиылған неке арқылы құқықтары бұзылған басқа да адамдар, сондай-ақ қорғаншы және қамқоршы орган мен прокурор;

4) жалған некеге тұру жағдайында прокурор, сондай-ақ некенің жалғандығы туралы білмеген жұбайы;

5) осы Заңның 24-бабының 3-тармағында аталған мән-жайлар болған кезде құқығы бұзылған жұбай құқылы.

2. Неке жасына толмаған адаммен, сондай-ақ сот әрекетке қабілетсіз деп таныған адаммен қиылған некені жарамсыз деп тану туралы істі қарау кезінде іске қатысуға қорғаншы және қамқоршы орган тартылады.

26-бап. Некенің жарамсыздығын болғызбайтын мән-жайлар

1. Егер некені жарамсыз деп тану туралы іс қаралатын сәтке заңға орай оның қиылуына кедергі жасаған мән-жайлар жойылса, некені жарамсыз деп тануға болмайды.

2. Егер кәмелетке толмаған жұбайдың мүдделері талап етсе, сондай-ақ оның некені жарамсыз деп тануға келісімі болмаған

жағдайда сот неке жасына толмаған адаммен қиылған некені жарамсыз деп тану туралы талап-арыздан бас тарта алады.

3. Егер мұндай некені тіркеткен адамдар істі сот қарағанға дейін іс жүзінде отбасын құрса, сот некені жалған деп тани алмайды.

4. Ерлі-зайыптылардың арасында заңмен тыйым салынған туыстық дәрежесі болған не некені тіркеу кезінде ерлі-зайыптылардың біреуі басқа бұзылмаған некеде тұрған (осы Заңның 11-бабы) жағдайларды қоспағанда, некені ол бұзылғаннан кейін жарамсыз деп тануға болмайды.

27-бап. Некені жарамсыз деп танудың салдары

1. Сот жарамсыз деп таныған неке, осы баптың 4 және 5-тармақтарында белгіленген жағдайларды қоспағанда, ерлі-зайыптылардың осы Заңда көзделген құқықтары мен міндеттерін туғызбайды.

2. Некесі жарамсыз деп танылған адамдар бірлесіп сатып алған мүліктің құқықтық режимі Қазақстан Республикасы Азаматтық кодексінің үлестік меншік туралы ережелерімен реттеледі. Ерлі-зайыптылар жасасқан неке шарты (осы Заңның 38-40-баптары) жарамсыз деп танылады.

3. Некені жарамсыз деп тану мұндай некеде туған немесе неке жарамсыз деп танылған күннен бастап екі жүз жетпіс күн ішінде туған балалардың құқығына нұқсан келтірмейді (осы Заңның 46-бабының 2-тармағы).

4. Некені жарамсыз деп тану туралы шешім шығарған кезде сот некені жарамсыз деп тану үшін негізге алынған мән-жайлардан некеге тұру кезінде бейхабар болған жұбайдың (адал ниетті жұбай) екінші жұбайдан осы Заңның 134, 135-баптарына сәйкес асырауға қаражат алу құқығын тануға құқылы, ал некені жарамсыз деп таныған кезге дейін бірлесіп сатып алынған мүлікті бөлуге қатысты осы Заңның 32, 36, 37-баптарында белгіленген ережелерді қолдануға, сондай-ақ неке шартын толық немесе ішінара жарамды деп тануға құқылы.

Адал ниетті жұбай азаматтық заңдарда көзделген ережелер бойынша өзіне келтірілген материалдық және моральдық зиянды өтеуді талап етуге құқылы.

5. Адал ниетті жұбай некені жарамсыз деп таныған кезде өзі неке қиюды мемлекеттік тіркеу кезінде таңдаған тегін сақтап қалуға құқылы.

6-тарау ЕРЛІ-ЗАЙЫПТЫЛАРДЫҢ ЖЕКЕ ҚҰҚЫҚТАРЫ

МЕН МІНДЕТТЕРІ

28-бап. Ерлі зайыптылардың құқықтары мен міндеттерінің туындауы

Ерлі-зайыптылардың құқықтары мен міндеттері азаматтық хал актілерін жазу органдарында некеге тұру мемлекеттік тіркелген күннен бастап туындайды.

29-бап. Ерлі-зайыптылардың отбасындағы теңдігі

1. Ерлі-зайыптылар тең құқықтарды пайдаланады және тең міндеттер атқарады.

2. Ерлі-зайыптылардың әрқайсысы қызмет, кәсіп түрін, тұрғылықты жерді таңдауда ерікті.

3. Ана, әке болу, балаларды тәрбиелеу, оларға білім беру мәселелері мен отбасы өмірінің басқа да мәселелерін ерлі-зайыптылар бірлесіп шешеді.

4. Ерлі-зайыптылар отбасындағы өз қатынастарын өзара сыйластық және өзара көмек негізінде құруға, отбасының игілігі мен нығаюына жәрдемдесуге, өз балаларының денсаулығына, өсіп-жетілуіне және олардың әл-ауқаты жағдайына қамқорлық жасауға міндетті.

30-бап. Ерлі-зайыптылардың тек таңдау құқығы

1. Некеге тұру кезінде ерлі-зайыптылар өз тілектері бойынша ортақ тек ретінде өздерінің біреуінің тегін таңдап алады не ерлі-зайыптылардың әрқайсысы өзінің некеге тұрғанға дейінгі тегін сақтап қалады, не өз тегіне екінші жұбайдың тегін қосады.

Егер ерлі-зайыптылардың біреуінің некеге тұрғанға дейінгі тегі қосарлас болса, тектерді қосуға жол берілмейді.

2. Ерлі-зайыптылардың біреуінің тегін өзгертуі екінші жұбайдың тегін өзгертуіне әкеп соқпайды.

3. Неке бұзылған жағдайда ерлі-зайыптылар ортақ текті сақтауға немесе өздерінің некеге тұрғанға дейінгі тегін қалпына келтіруге құқылы.

7-тарау ЕРЛІ-ЗАЙЫПТЫЛАРДЫҢ МҮЛІКТІК ҚҰҚЫҚТАРЫ МЕН МІНДЕТТЕРІ

1. Ерлі-зайыптылар мүлкінің заңды режимі

31-бап. Ерлі-зайыптылар мүлкінің заңды режимі ұғымы

1. Егер неке шартында өзгеше белгіленбесе, ерлі-зайыптылардың бірлескен ортақ меншігінің режимі олардың мүлкінің заңды режимі болып табылады.

2. Ерлі-зайыптылардың шаруа (фермерлік) қожалығы мүшелерінің бірлескен меншігі болып табылатын мүлікті иелену, пайдалану және оған билік ету құқығы Қазақстан Республикасы Азаматтық кодексінің (Жалпы бөлім) 224 және 225-баптарымен белгіленеді.

32-бап. Ерлі-зайыптылардың бірлескен ортақ меншігі

1. Ерлі-зайыптылар некеде тұрған кезде жинаған мүлік олардың бірлескен ортақ меншігі болып табылады.

2. Ерлі-зайыптылардың некеде тұрған кезде жинаған мүлкіне (ерлі-зайыптылардың ортақ мүлкіне) ерлі-зайыптылардың әрқайсысының еңбек қызметінен, кәсіпкерлік қызметтен және санаткерлік қызмет нәтижелерінен тапқан табыстары, ерлі-зайыптылардың ортақ мүлкінен және ерлі-зайыптылардың әрқайсысының бөлек мүлкінен түскен кірістер, олар алған зейнетақылар, жәрдемақылар, сондай-ақ арнаулы нысаналы мақсаты жоқ өзге де ақшалай төлемдер (материалдық көмек сомалары, мертігу не денсаулығының өзге де зақымдануы салдарынан еңбек қабілетін жоғалтуына және басқаларына байланысты залалды өтеуге төленген сомалар) жатады. Сондай-ақ ерлі-зайыптылардың ортақ кірістерінің есебінен сатып алынған жылжымалы және жылжымайтын мүліктер, бағалы қағаздар, жарналар, салымдар, несие мекемелеріне немесе өзге де коммерциялық ұйымдарға салынған капиталдағы үлестер және ерлі-зайыптылар некеде тұрған кезеңде тапқан басқа да кез келген мүлік ол ерлі-зайыптылардың қайсысының атына сатып алынғанына не ақша қаражаттарын ерлі-зайыптылардың қайсысы салғанына қарамастан, ерлі-зайыптылардың ортақ мүлкі болып табылады.

3. Ерлі-зайыптылардың ортақ мүлікке құқығы некеде тұрған кезеңде үй шаруашылығын жүргізуді, балаларды бағып-күтуді жүзеге асырған немесе басқа да дәлелді себептермен жеке кірісі болмаған жұбайға да тиесілі.

33-бап. Ерлі-зайыптылардың ортақ мүлкін иелену, пайдалану және оған билік ету

1. Ерлі-зайыптылардың ортақ мүлкін иелену, пайдалану және оған билік ету ерлі-зайыптылардың өзара келісімі бойынша жүзеге асырылады.

2. Ерлі-зайыптылардың ортақ мүлкіне билік ету жөнінде ерлі-зайыптылардың бірі мәмілелер жасасқан кезде екінші жұбайының келісімі керек болады.

Ерлі зайыптылардың біреуі ерлі-зайыптылардың ортақ мүлкіне билік ету жөнінде жасасқан мәмілесін сот басқа жұбайдың келісімі болмауын дәлел етіп, тек оның талап етуімен ғана және басқа тараптың мәміле жөнінде білгендігі немесе осы мәмілені жасасуға басқа жұбайдың күні бұрын білуі тиіс екендігі дәлелденген жағдайларда ғана жарамсыз деп тануы мүмкін.

3. Ерлі-зайыптылардың біреуі жылжымайтын мүлікке билік ету жөнінде мәміле мен нотариаттық куәландыруды және (немесе) заңда белгіленген тәртіппен тіркеуді талап ететін мәміле жасауы үшін басқа жұбайдың нотариат куәландырған келісімін алуы қажет.

Аталған мәміле жасауға нотариат куәландырған келісімі алынбаған жұбай осы мәміленің жасалғандығы туралы өзі білген немесе білуге тиіс болған күннен бастап бір жыл ішінде мәмілені сот тәртібімен жарамсыз деп тануды талап етуге құқылы.

34-бап. Ерлі-зайыптылардың әрқайсысының меншігі

1. Мыналар ерлі-зайыптылардың әрқайсысының меншігі болып табылады:

1) некеге тұрғанға дейін ерлі-зайыптылардың әрқайсысына тиесілі болған мүлкі;

2) ерлі-зайыптылардың некеде тұрған кезеңінде сыйлыққа, мұрагерлік тәртібімен немесе өзге де мәміле жасау бойынша тегін алған мүлкі;

3) қымбат заттар мен басқа да сән-салтанат заттарын қоспағанда, некеде тұрған кезеңде ерлі-зайыптылардың ортақ қаражаты есебінен сатып алынса да, жеке пайдалану заттары (киім-кешек, аяқкиім және басқалар).

2. Некенің іс жүзінде тоқтатылуына байланысты бөлек тұрған кезде ерлі-зайыптылардың әрқайсысы тапқан мүлікті сот олардың әрқайсысының меншігі деп тануы мүмкін.

35-бап. Ерлі-зайыптылардың әрқайсысының мүлкін олардың бірлескен ортақ мүлкі деп тану

Егер некеде тұрған кезеңде ерлі-зайыптылардың ортақ мүлкі немесе басқа жұбайдың мүлкі не ерлі-зайыптылардың кез келгенінің еңбегі есебінен осы мүліктің құнын едәуір арттыратын салыным жүргізілгені (күрделі жөндеу, қайта жаңғырту, қайта жабдықтау және с.с.) анықталса, ерлі-зайыптылардың

әрқайсысының мүлкі олардың бірлескен ортақ меншігі болып танылуы мүмкін.

36-бап. Ерлі-зайыптылардың ортақ мүлкін бөлу

1. Ерлі-зайыптылардың ортақ мүлкін бөлу ерлі-зайыптылардың кез келгенінің талап ету бойынша неке кезеңінде де, ол бұзылғаннан кейін де, сондай-ақ ерлі-зайыптылардың ортақ мүлкіндегі ерлі-зайыптылардың біреуінің үлесінен өндіріп алу үшін ерлі-зайыптылардың ортақ мүлкін бөлу туралы кредит берушінің талабын мәлімдеуі жағдайында да жүргізілуі мүмкін.

2. Ерлі-зайыптылардың ортақ мүлкі ерлі-зайыптылар арасында олардың келісімі бойынша бөлінуі мүмкін. Ерлі-зайыптылардың қалауы бойынша олардың ортақ мүлдікті бөлу туралы келісімі нотариат арқылы куәландырылуы мүмкін.

3. Дау туған жағдайда ерлі-зайыптылардың ортақ мүлкін бөлу, сондай-ақ ерлі-зайыптылардың сол мүлдіктегі үлестерін анықтау сот тәртібімен жүргізіледі.

Ерлі-зайыптылардың ортақ мүлкін бөлу кезінде сот ерлі-зайыптылардың талап етуі бойынша ерлі-зайыптылардың әрқайсысына қандай мүлдік берілуге тиіс екендігін анықтайды. Егер ерлі-зайыптылардың біреуіне құны оған тиесілі үлестен асатын мүлдік берілсе, басқа жұбайға тиісінше ақшалай немесе өзге де өтемақы берілуі мүмкін.

4. Кәмелетке толмаған балалардың ғана қажеттерін қанағаттандыру үшін сатып алынған заттар (киім-кешек, аяқ киім, мектеп және спорт жабдықтары, музыкалық аспаптар, балалар кітапханасы және басқалары) бөлінуге жатпайды және бала бірге тұратын жұбайға өтемақысыз беріледі.

Ерлі-зайыптылардың ортақ мүлкінің есебінен ерлі-зайыптылар өздерінің кәмелетке толмаған ортақ балаларының атына салған салымдары сол балаларға тиесілі болып есептеледі және ерлі-зайыптылардың ортақ мүлкін бөлген кезде есепке алынбайды.

5. Ерлі-зайыптылардың неке кезеңіндегі ортақ мүлкін бөлген жағдайда ерлі-зайыптылардың ортақ мүлкінің бөлінбеген бөлігі, сондай-ақ ерлі-зайыптылардың одан кейінгі неке кезеңінде тапқан мүлкі олардың бірлескен ортақ меншігін құрайды.

6. Некесі бұзылған ерлі-зайыптылардың ортақ мүлкін бөлу туралы ерлі-зайыптылар талабына талап-арыз мерзімі өтуінің үш жылдық мерзімі қолданылады.

37-бап. Ерлі-зайыптылардың ортақ мүлкін бөлу кезінде үлестерді анықтау

1. Ерлі-зайыптылардың ортақ мүлкін бөлу және осы мүліктегі үлестерін айқындау кезінде, егер олардың арасындағы шартта өзгеше көзделмесе, ерлі- зайыптылардың әрқайсысының үлесі тең деп танылады.

2. Сот көмелетке толмаған балалардың мүдделерін негізге ала отырып және (немесе) ерлі-зайыптылардың біреуінің мүдделерін негізге ала отырып, егер жұбайлардың бірі дәлелсіз себептермен табыс таппаса немесе ерлі- зайыптылардың ортақ мүлкін отбасының мүдделеріне залал келтіріп жұмсаса, ерлі-зайыптылардың ортақ мүлкіндегі үлестерінің теңдігі негізін ескермеуге құқылы.

3. Ерлі-зайыптылардың ортақ мүлкін бөлу кезінде ерлі-зайыптылардың ортақ борыштары олардың арасында өздеріне берілген үлеске қарай бөлінеді.

2. Ерлі-зайыптылар мүлкінің шарттық режимі

38-бап. Неке шарты

Некеге тұрушы адамдардың келісімі немесе ерлі-зайыптылардың некедегі және (немесе) ол бұзылған жағдайдағы мүліктік құқықтары мен міндеттерін айқындайтын келісім неке шарты деп танылады.

39-бап. Неке шартын жасасу

1. Неке шарты некеге тұруды мемлекеттік тіркеуге дейін де, неке кезеңіндегі кез келген уақытта да жасалуы мүмкін.

Некеге тұруды мемлекеттік тіркеуге дейін жасалған неке шарты некеге тұру мемлекеттік тіркелген күннен бастап күшіне енеді.

2. Неке шарты жазбаша түрде жасалады және оны нотариат куәландыруға тиіс.

40-бап. Неке шартының мазмұны

1. Ерлі-зайыптылар неке шартымен заңда белгіленген бірлескен ортақ меншік режимін (осы Заңның 32-бабы) өзгертуге, ерлі-зайыптылардың барлық мүлкіне, оның жекелеген түрлеріне немесе ерлі-зайыптылардың әрқайсысының мүлкіне бірлескен, үлестік немесе бөлектелген меншік режимін белгілеуге құқылы.

Неке шарты ерлі-зайыптылардың қолда бар мүлкі жөнінде де, болашақтағы мүлкі жөнінде де жасалуы мүмкін.

Неке шартында ерлі-зайыптылар өзара күтіп-бағу жөніндегі өз құқықтары мен міндеттерін, бір-бірінің кірістеріне қатысу әдістерін, олардың әрқайсысының отбасылық шығындар жасау

тәртібін айқындауға; неке бұзылған жағдайда ерлі-зайыптылардың әрқайсысына берілетін мүлікті белгілеуге, сондай-ақ неке шартына ерлі-зайыптылардың мүлдік қатынастарына қатысты өзге де кез келген ережелерді енгізуге құқылы.

2. Неке шартында көзделген құқықтар мен міндеттер белгілі бір мерзімдермен шектелуі не белгілі бір жағдайлардың туындауына немесе туындамауына қарай қойылуы мүмкін.

3. Неке шарты ерлі-зайыптылардың құқық қабілетін немесе әрекет қабілеттілігін, олардың өз құқықтарын қорғау үшін сотқа жүгіну құқығын шектей алмайды; ерлі зайыптылар арасындағы мүлдік емес жеке қатынастарды, ерлі-зайыптылардың балаларға қатысты құқықтары мен міндеттерін реттей алмайды; еңбекке қабілетсіз мұқтаж жұбайдың асырау қаражатын алуға құқығын шектейтін жағдайды көздей алмайды; ерлі-зайыптылардың біреуін өте қолайсыз жағдайға қалдыратын немесе неке-отбасы заңдарының негізгі бастауларына қайшы келетін басқа да жағдайларды қамти алмайды.

41-бап. Неке шартын өзгерту және бұзу

1. Неке шарты ерлі-зайыптылардың келісім бойынша кез келген уақытта өзгертілуі немесе бұзылуы мүмкін. Неке шартын өзгерту туралы немесе бұзу туралы келісім неке шартының өзі сияқты нысанда жасалады.

Неке шартын орындаудан біржақты бас тартуға жол берілмейді.

2. Ерлі-зайыптылардың біреуінің талап етуі бойынша неке шарты Қазақстан Республикасының Азаматтық кодексінде неке шартын өзгерту және бұзу үшін белгіленген негіздер мен тәртіп бойынша соттың шешімімен өзгертілуі немесе бұзылуы мүмкін.

3. Неке шартында, неке тоқтатылғаннан кейінгі кезеңге арналып көзделген міндеттерді қоспағанда, неке шартының қолданылуы неке тоқтатылған кезден бастап тоқтатылады (осы Заңның 22-бабы).

42-бап. Неке шартын жарамсыз деп тану

1. Неке шартын сот Қазақстан Республикасының Азаматтық кодексінде мәмілелердің жарамсыздығы үшін көзделген негіздер бойынша толық немесе ішінара жарамсыз деп тануы мүмкін.

2. Егер шарттың талаптары ерлі-зайыптылардың бірін өте қолайсыз жағдайға қалдыратын болса, олардың бірінің талап етуі бойынша да сот неке шартын толық немесе ішінара жарамсыз деп тануы мүмкін. Осы Заңның 40-бабы 3-тармағының

талаптарын бұзатын неке шартының талаптары жарамсыз деп танылады.

3. Ерлі-зайыптылардың міндеттемелер бойынша жауапкершілігі

43-бап. Ерлі-зайыптылардың мүлкінен өндіріп алу

1. Ерлі-зайыптылардың біреуінің міндеттемелері бойынша өндіріп алу тек сол жұбайының мүлкіне ғана жасалуы мүмкін. Бұл мүлік жеткіліксіз болған жағдайда кредит беруші өзіне өндіріп алу үшін ерлі-зайыптылардың ортақ мүлкін бөлу кезінде борышкер жұбайға тиесілі болатын борышкер жұбайдың үлесін бөліп беруді талап етуге құқылы.

2. Өндіріп алу ерлі-зайыптылардың ортақ міндеттемелері бойынша, сондай-ақ сот ерлі-зайыптылардың біреуінің міндеттемелері бойынша алынғандардың бәрі отбасының қажеттеріне пайдаланғандығын анықтаса, ерлі-зайыптылардың біреуінің міндеттемелері бойынша да ерлі-зайыптылардың ортақ мүлкінен жасалады. Бұл мүлік жеткіліксіз болған жағдайда ерлі-зайыптылар аталған міндеттемелер бойынша өздерінің әрқайсысының мүлкімен бірлесе отырып жауапты болады.

Егер соттың үкімімен ерлі-зайыптылардың ортақ мүлкі ерлі-зайыптылардың біреуі қылмыстық жолмен алған қаражат есебінен сатып алынғаны немесе көбейтілгені анықталса, өндіріп алу тиісінше ерлі-зайыптылардың ортақ мүлкінен немесе оның бір бөлігінен жасалуы мүмкін.

3. Ерлі-зайыптылардың кәмелетке толмаған балалары келтірген зиян үшін жауапкершілігі азаматтық заңдармен белгіленеді. Ерлі-зайыптылардың кәмелетке толмаған балалары келтірген зиянды өтеуі кезінде олардың мүлкінен өндіріп алу осы баптың 2-тармағына сәйкес жасалады.

44-бап. Неке шартын жасасу, өзгерту және бұзу кезіндегі кредит берушілердің құқықтарына кепілдік

Борышкер жұбайдың кредит берушісі (кредит берушілері) айтарлықтай өзгерген мән-жайларға байланысты Қазақстан Республикасы Азаматтық кодексінің (Жалпы бөлім) 401-404-баптарында белгіленген тәртіппен ерлі-зайыптылар арасында жасалған неке шартының талаптарын өзгертуді немесе оны бұзуды талап етуге құқылы.

3-БӨЛІМ. ОТБАСЫ

8-тарау.

БАЛАЛАРДЫҢ ТУУ ТЕГІН БЕЛГІЛЕУ

45-бап. Ата-аналардың және балалардың құқықтары мен міндеттері туындауының негіздері

Ата-аналардың және балалардың құқықтары мен міндеттері балалардың заңмен белгіленген тәртіппен куәландырылған тегіне негізделеді.

46-бап. Баланың туу тегін белгілеу

1. Баланың анасы жағынан тегін (анасы болуын) ананың медициналық мекемеде бала туғанын растайтын құжаттар негізінде, ал бала медициналық мекемеден тыс жерде туған жағдайда - медициналық құжаттардың, куәлардың көрсетулерінің немесе өзге де айғақтардың негізінде азаматтық хал актілерін жазу органы белгілейді.

2. Бір-бірімен некеде тұратын адамдармен туған баланың туу тегі ата-анасының неке туралы жазбасымен куәландырылады.

Бала неке бұзылған, оны жарамсыз деп таныған кезден бастап немесе бала анасының жұбайы қайтыс болған кезден бастап екі жүз жетпіс күн ішінде туған жағдайда, егер өзгеше дәлелденбесе, анасының бұрынғы жұбайы баланың әкесі болып танылады.

3. Егер баланың анасы баланың әкесі өзінің жұбайы (бұрынғы жұбайы) емес деп мәлімдесе, баланың әкесі осы баптың 4-тармағында немесе осы Заңның 47-бабында көзделген ережелер бойынша белгіленеді.

4. Баланың анасымен некеде тұрмайтын адамның әке болуы баланың әкесі мен анасының азаматтық хал актілерін жазу органына бірлесіп арыз беруі жолымен; анасы қайтыс болған, ол әрекетке қабілетсіз деп танылған, анасының тұратын жерін анықтау мүмкін болмаған жағдайларды немесе ол ата-ана құқығынан айырылған жағдайда - қорғаншы және қамқоршы органның келісімімен бала әкесінің арызы бойынша, мұндай келісім болмаған жағдайда - сот шешімімен белгіленеді.

Әке болуды анықтау туралы бірлесіп арыз беру бала туғаннан кейін мүмкін емес немесе қиын деп ұйғаруға негіз беретін мән-

жайлар болған кезде болашақ баланың бір-бірімен некеде тұрмайтын ата-анасы анасы жүкті болған кезде азаматтық хал актілерін жазу органына сондай арыз беруге құқылы. Баланың ата-анасы туралы жазба бала туғаннан кейін жасалады.

Егер анасының күйеуі емес еркектің әке екендігі анық болып шықса, анасы босанғанға дейінгі және босанғаннан кейінгі кезеңдердің ішінде өзін асырау жөніндегі шығындарға одан тиісті ақша қаражатын сот тәртібімен талап етуге құқылы. Ақша қаражатының мөлшерін тараптардың материалдық, отбасылық және назар аударуға тұрарлық басқа да мүдделерін негізге ала отырып, ақша қаражатын төлеу кезінде қолданылып жүрген есептік көрсеткіштің еселенген арақатынасымен сот белгілейді.

5. Он сегіз жасқа (кәмелетке) толған адам жөнінде әке болуды белгілеуге оның келісімімен ғана, ал егер ол әрекетке қабілетсіз деп танылған болса - оның қорғаншысының немесе қорғаншы және қамқоршы органның келісімімен ғана жол беріледі.

47-бап. Әкелікті сот тәртібімен белгілеу

Бір-бірімен некеде тұрмайтын ата-аналардан бала туған жағдайда және ата-ананың бірлескен арызы немесе бала әкесінің арыз болмаған кезде (осы Заңның 46-бабының 4-тармағы) баланың нақты адамнан туу тегі (әке болуды) ата-аналарының біреуінің, бала қорғаншысының (қамқоршысының) арызы бойынша немесе баланы асырап отырған адамның арызы бойынша, сондай-ақ баланың кәмелетке толғаннан кейінгі өз арызы бойынша сот тәртібімен белгіленеді. Бұл жағдайда сот баланың нақты адамнан туу тегін анық растайтын айғақтарды ескереді.

48-бап. Соттың әке болуды тану фактісін белгілеуі

Өзін баланың әкесімін деп таныған, бірақ баланың анасымен некеде тұрмаған адам қайтыс болған жағдайда оның әке екенін тану фактісі азаматтық іс жүргізу заңдарында белгіленген ережелер бойынша сот тәртібімен белгіленуі мүмкін.

49-бап. Баланың ата-анасын туу туралы жазбалар кітабына жазу

1. Бір-бірімен некеде тұратын әке мен ана туу туралы жазбалар кітабына олардың кез келгенінің арызы бойынша баланың ата-анасы болып жазылады.

2. Егер ата-ана бір-бірімен некеде тұрмаса, баланың анасы туралы жазба-анасының арыз бойынша, ал баланың әкесі туралы жазба баланың әкесі мен анасының бірлескен арызы бойынша

немесе бала әкесінің арызы бойынша (осы Заңның 46-бабының 4-тармағы) жүргізіледі немесе әкесі соттың шешіміне сәйкес жазылады.

3. Бала некеде тұрмайтын анадан туған ретте, ата-ананың бірлескен арызы болмаған жағдайда немесе әке болуды анықтау туралы сот шешімі болмаған жағдайда туу туралы жазбалар кітабында бала әкесінің тегі анасының тегі бойынша, бала әкесінің аты-жөні - бала анасының көрсетуі бойынша жазылады.

4. Некеде тұратын және бойға бала бітірудің жасанды әдісін немесе эмбрион имплантациясын қолдануға жазбаша түрде өз келісін берген адамдар осы әдістерді қолдану нәтижесінде өздерінде бала туған жағдайда туу туралы жазбалар кітабына оның ата-анасы болып жазылады.

Суррогат ана мен бойға бала бітірудің жасанды әдістері мәселелерін құқықтық реттеу Қазақстан Республикасының заңдарымен белгіленеді.

50-бап. Әке (ана) болуды даулау

1. Осы Заңның 49-бабының 1 және 2-тармақтарына сәйкес жүргізілген туу туралы жазбалар кітабына ата-ананы жазу баланың әкесі немесе анасы ретінде жазылған адамның, іс жүзінде баланың әкесі немесе анасы болып табылатын адамның, бала кәмелетке толғаннан кейін оның өзінің, бала қорғаншысының (қамқоршысының), сот әрекетке қабілетсіз деп таныған ата-ана қорғаншысының талап етуі бойынша тек сот тәртібімен ғана даулануы мүмкін.

2. Осы Заңның 49-бабының 2-тармағының негізінде баланың әкесі болып жазылған адамның әке болуына дау туғызу туралы талабы, егер жазу кезінде бұл адамға оның іс жүзінде баланың әкесі емес екендігі айқын болса, қанағаттандырылмайды.

3. Заңда белгіленген тәртіппен бойға бала бітірудің жасанды әдісін немесе эмбрион имплантациясын қолдануға жазбаша түрде келісім берген жұбайдың әке болуды даулау кезінде осы мән-жайларға сілтеме жасауға құқығы жоқ.

Басқа әйелге эмбрион имплантациясына келісім берген ерлі-зайыптылардың, сондай-ақ суррогат ананың (осы Заңның 49-бабы 4-тармағының екінші бөлігі) туу туралы жазбалар кітабына ата-аналар жазылғаннан кейін ана және әке болуды даулау кезінде осы мән-жайларға сілтеме жасауға құқығы жоқ.

51-бап. Бір-бірімен некеде тұрмайтын адамдардан туған балалардың құқықтары мен міндеттері

Осы Заңның 46-48-баптарында көзделген тәртіппен әке екені белгіленген жағдайда балалардың ата-аналары мен олардың туыстарына қатысты бір-бірімен некеде тұратын адамдардан туған балалардағы сияқты құқықтары мен міндеттері болады.

9-тарау БАЛАНЫҢ ҚҰҚЫҚТАРЫ

52-бап. Баланың отбасында өмір сүру және тәрбиелену құқығы

1. Он сегіз жасқа (кәмелетке) толмаған адам бала деп танылады.

2. Әрбір баланың мүмкін болғанынша отбасында өмір сүруге және тәрбиеленуге құқығы, өзінің ата-анасын білуге құқығы, олардың қамқорлығына құқығы, өзінің мүдделеріне қайшы келетін жағдайларды қоспағанда, олармен бірге тұруға құқығы бар.

Баланың өз ата-анасы тәрбиеленуіне, оның мүдделерін қамтамасыз етуіне, жан-жақты өсіп-жетілуіне, оның адамдық қадір-қасиетінің құрметтелуіне құқығы бар.

Ата-анасы болмаған жағдайда, оларды ата-ана құқығынан айырған жағдайда және ата-ана қамқорлығынан айырылудың басқа да жағдайларында баланың отбасында тәрбиелену құқығын осы Заңның 13-тарауында белгіленген тәртіппен қорғаншы және қамқоршы орган қамтамасыз етеді.

53-бап. Баланың ата-анасымен және басқа да туыстарымен қарым-қатынас жасау құқығы

1. Баланың ата-анасының екеуімен де, аталарымен, әжелерімен, аға- інілерімен, апа-сіңлілерімен (қарындастарымен) және басқа да туыстарымен қарым-қатынас жасауға құқығы бар. Ата-анасы некесінің бұзылуы, оның жарамсыз деп танылуы немесе ата-анасының бөлек тұруы баланың құқығына әсер етпеуге тиіс.

Ата-анасы бөлек тұрған жағдайда баланың олардың әрқайсысымен қарым- қатынас жасауға құқығы бар. Ата-анасы өртүрлі мемлекеттерде тұрған жағдайда да баланың өз ата-анасымен қарым-қатынас жасауға құқығы бар.

2. Қысыл-таяң жағдайға (ұсталу, тұтқындалу, қамауға алыну, емдеу мекемесінде болу және т.с.с) ұшыраған баланың заңда белгіленген тәртіппен өзінің ата-анасымен және басқа да туыстарымен қарым-қатынас жасауға құқығы бар.

54-бап. Баланың өз пікірін білдіру құқығы

Бала отбасында өз мүддесін қозғайтын кез келген мәселені шешу кезінде өзінің пікірін білдіруге, сондай-ақ кез келген сот немесе әкімшілік іс қарау барысында тыңдалуға құқылы. Он жасқа толған бала пікірі, егер бұл пікір оның мүдделеріне қайшы келмейтін болса, ескерілуге міндетті. Осы Заңда (56, 70, 84, 86, 88, 97, 98, 122-баптар) көзделген жағдайларда қорғаншы және қамқоршы органдар немесе сот он жасқа толған баланың келісімімен ғана шешім қабылдай алады.

55-бап. Баланың ат алуға, әкесінің атын және тегін алуға құқығы

1. Баланың ат алуға, әкесінің атын және тегін алуға құқығы бар.

2. Балаға ат ата-анасының (немесе олардың орнындағы адамдардың) келісімі бойынша қойылады, аты-жөні әкесінің аты бойынша не ұлттық дәстүрлер ескеріле отырып беріледі.

Әкесі атын өзгерткен жағдайда оның кәмелетке толмаған балаларының әкесінің аты-жөні өзгереді, ал кәмелетке толған балалардың әкесінің аты- жөні бұл туралы өздері арыз берген жағдайда өзгертіледі.

3. Баланың тегі ата-анасының тегімен айқындалады. Ата-анасының тегі әртүрлі болған жағдайда балаға ата-анасының келісімі бойынша әкесінің немесе анасының тегі беріледі.

Ата-анасының тілегі бойынша балалардың тегі ұлттық дәстүрлер ескеріле отырып, әкесінің немесе атасының атынан шығарылуы мүмкін.

4. Баланың атына және (немесе) тегіне қатысты ата-ананың арасында туындаған келіспеушілік сот тәртібімен шешіледі.

5. Егер әкесі белгіленбесе, баланың аты анасының көрсетуі бойынша қойылады, әкесінің аты-жөні баланың әкесі ретінде жазылған адамның аты бойынша (осы Заңның 49-бабының 3-тармағы), тегі - анасының тегі бойынша беріледі.

6. Егер ата-анасының екеуі де белгісіз болса, баланың тегін, атын, аты-жөнін қорғаншы және қамқоршы орган қояды.

56-бап. Баланың аты мен тегін өзгерту

1. Ата-анасының екеуі де тегін өзгерткен жағдайда кәмелетке толмаған балалардың тегі өзгереді.

Бала он алты жасқа толғанға дейін ата-анасының бірлескен өтініші бойынша азаматтық хал актілерін жазу органы баланың мүдделерін негізге ала отырып, баланың атын, сондай-ақ оған берілген текті басқа ата-ананың тегіне өзгертуге рұқсат беруге құқылы.

2. Неке тоқтатылған немесе неке жарамсыз деп танылған жағдайда балалар өздеріне туған кезде берілген тектерін сақтап қалады.

3. Егер ата-анасы бөлек тұрса және бала бірге тұратын ата-анасының біреуі оған өзінің тегін бергісі келсе, азаматтық хал актілерін жазу органы бұл мәселені баланың мүдделеріне қарай және ата-ананың екіншісінің пікірін ескере отырып шешеді. Ата-ананың тұратын жерін анықтау мүмкін болмаған, ол ата-ана құқығынан айырылған, әрекетке қабілетсіз деп танылған жағдайда, сондай-ақ ата-ана баланы асырап-бағу мен тәрбиелеуден дәлелді себептерсіз жалтарған ретте оның пікірін ескеру міндетті емес.

4. Егер бала бір-бірімен некеде тұрмайтын адамдардан туған болса және әкесі заңды тәртіппен белгіленбесе, азаматтық хал актілерін жазу органы, баланың мүдделерін негізге ала отырып, оның тегін анасының осындай өтініш жасаған кездегі соның тегіне өзгертуге рұқсат етуге құқылы.

5. Он жасқа толған баланың атын және (немесе) тегін оның келісімімен ғана өзгертуге болады.

57-бап. Баланың ұлты

1. Баланың ұлты оның ата-анасының ұлтымен айқындалады.

2. Егер ата-анасының ұлты әртүрлі болса, ол баланың қалауы бойынша оған жеке басының куәлігі немесе паспорт берілген кезде әкесінің немесе шешесінің ұлтымен айқындалады.

3. Одан әрі баланың ұлты оның өтініші бойынша басқа ата-анасының ұлтына өзгертілуі мүмкін.

58-бап. Баланың мүліктік құқықтары

1. Баланың осы Заңның 5-бөлімінде белгіленген тәртіппен және мөлшерде өзінің ата-анасынан және отбасының басқа да мүшелерінен асырау қаражатын алуға құқығы бар.

2. Балаға алименттер, зейнетақылар, жәрдемақылар ретінде тиесілі сомалар ата-анасының (олардың орнындағы адамдардың) билік етуіне келіп түседі және оны олар баланы асырап-бағуға, оған білім беруге және оны тәрбиелеуге жұмсайды.

3. Баланың өзі сыйға немесе мұрагерлік тәртібімен алған кірістерді, мүлікті, сондай-ақ баланың қаражатына сатып алынған басқа да кез келген мүлікті меншіктенуге құқығы бар.

Өз еңбегінен кіріс алған бала, егер ол ата-анасымен бірге тұрса, отбасын асырау жөніндегі шығыстарға қатысуға құқылы.

Баланың өзіне меншік құқығымен тиесілі мүлікке билік ету құқығы Қазақстан Республикасы Азаматтық кодексінің (Жалпы бөлім) 22 және 23-баптарымен белгіленеді.

Ата-ананың бала мүлкін басқару жөніндегі құқықтарын жүзеге асыруы кезінде оларға осы Заңның 114-бабында белгіленген ереже қолданылады.

4. Баланың ата-ана мүлкіне меншік құқығы болмайды, ата-ананың баланың мүлкіне меншік құқығы болмайды. Бірге тұратын балалар мен ата-аналар бір-бірінің мүлкін өзара келісім бойынша иеленіп, пайдалана алады.

5. Ата-аналар мен балалардың ортақ меншік құқығы пайда болған жағдайда олардың ортақ мүлікті иелену, пайдалану және оған билік ету құқығы азаматтық заңдарда белгіленеді.

59-бап. Баланың қорғалу құқығы

1. Баланың өз құқықтары мен заңды мүдделерін қорғауға құқығы бар.

Баланың құқықтары мен заңды мүдделерін қорғауды ата-анасы (олардың орнындағы адамдар), ал осы заңда көзделген жағдайларда қорғаншы және қамқоршы орган, прокурор және сот жүзеге асырады.

Кәмелетке толғанға дейін заңға сәйкес әрекетке толық қабілетті деп танылған кәмелетке толмаған адамның өз құқықтары мен міндеттерін, оның ішінде қорғалу құқығын өз бетінше жүзеге асыруға құқығы бар.

2. Баланың ата-анасының (олардың орнындағы адамдардың) тарапынан жасалған қиянаттан қорғалуға құқығы бар.

Баланың құқықтары мен заңды мүдделері бұзылған кезде, оның ішінде ата-анасының (олардың біреуінің немесе олардың орнындағы адамдардың) баланы асырап-бағу, тәрбиелеу, оған білім беру жөніндегі міндеттерін орындамауы кезінде немесе тиісті дәрежеде орындамауы кезінде не ата-ана (қорғаншы, қамқоршы) құқығын теріс пайдалану кезінде бала қорғаншы және қамқоршы органға, ал он төрт жасқа толғанда - сотқа өзінің құқықтарын қорғау үшін өз бетінше өтініш жасауға құқылы.

3. Баланың өміріне немесе денсаулығына қауіп төнгендігі туралы, оның құқықтары мен заңды мүдделерінің бұзылғандығы туралы белгілі болған ұйымдардың лауазымды адамдары мен өзге де азаматтар ол жөнінде баланың іс жүзінде тұратын жері бойынша қорғаншы және қамқоршы органға хабарлауға міндетті. Мұндай мәліметтерді алған жағдайда қорғаншы және қамқоршы орган баланың құқықтары мен заңды мүдделерін қорғау жөнінде қажетті шаралар қолдануға міндетті.

10-тарау

АТА-АНАЛАРДЫҢ ҚҰҚЫҚТАРЫ МЕН МІНДЕТТЕРІ

60-бап. Ата-аналардың құқықтары мен міндеттерінің теңдігі

1. Ата-аналардың өз балаларына қатысты құқықтары тең және міндеттері (ата-ана құқықтары) тең болады.

2. Осы тарауда көзделген ата-ана құқықтары балалары он сегіз жасқа (кәмелетке) толғанда, сондай-ақ кәмелетке толмаған балалар некеге тұрған кезде тоқтатылады.

61-бап. Кәмелетке толмаған ата-аналардың құқықтары

1. Кәмелетке толмаған ата-аналардың баласымен бірге тұруға және оны тәрбиелеуге қатысуға құқығы бар.

2. Некеге тұрмаған, кәмелетке толмаған ата-аналар олар бала туған жағдайда және олардың ана және (немесе) әке болуы анықталған жағдайда өздері он алты жасқа толғанда ата-ана құқығын өз бетінше жүзеге асыруға құқылы. Кәмелетке толмаған ата-аналар он алты жасқа толғанға дейін қорғаншы және қамқоршы орган балаға қорғаншы тағайындайды, ол баланың кәмелетке толмаған ата-аналарымен бірге оны тәрбиелеуді жүзеге асырады. Баланың қорғаншысы мен кәмелетке толмаған ата-ананың арасында туындаған келіспеушілікті қорғаншы және қамқоршы орган шешеді.

3. Кәмелетке толмаған ата-аналардың жалпы негіздерде өздерінің әке және ана болуын мойындауға және оған дау айтуға құқығы бар, сондай-ақ олардың он төрт жасқа толғаннан кейін сот тәртібімен өз балаларына қатысты әке болуын анықтауды талап етуге құқығы бар.

62-бап. Ата-аналардың балаларды тәрбиелеу және оларға білім беру жөніндегі құқықтары мен міндеттері

1. Ата-аналар өз балаларының денсаулығына қамқорлық жасауға міндетті.

2. Ата-аналардың өз балаларын тәрбиелеуге құқығы бар және оған міндетті.

Ата-аналардың басқа да барлық адамдарға қарағанда өз балаларын тәрбиелеуге басым құқығы бар.

Бала тәрбиелеуші ата-аналар өздерінің қабілеттері мен қаржылық мүмкіндіктерінің шегінде, оның дене, психикалық, адамгершілік және рухани жағынан дамуына қажетті өмір сүру

жағдайларын қамтамасыз ету үшін негізгі жауапкершілікте болады.

3. Ата-аналар балалардың орта білім алуын қамтамасыз етуге міндетті.

Ата-аналардың балалардың пікірін ескере отырып, орта білім алғанға дейін білім беру мекемесі мен балаларды оқыту нысанын таңдауға құқығы бар.

4. Балалардың тәрбиесі мен білім алуына қатысты барлық мәселелерді балалардың мүдделерін негізге алып және балалардың пікірін ескере отырып, өзара келісімі бойынша ата-аналар шешеді. Ата-аналардың арасында келіспеушілік болған жағдайда олар (олардың біреуі) бұл келіспеушіліктерді шешу үшін қорғаншы және қамқоршы органға немесе сотқа жүгінуге құқылы.

63-бап. Балалардың құқықтары мен мүдделерін қорғау жөніндегі ата-аналардың құқықтары мен міндеттері

1. Ата-аналар өз балаларының заңды өкілі болып табылады және кез келген жеке және заңды тұлғаларға қатысты, оның ішінде соттарда арнаулы өкілеттісіз олардың құқықтары мен мүдделерін қорғайды.

2. Егер қорғаншы және қамқоршы орган ата-аналар мен балалар мүдделерінің арасында қайшылық барын анықтаса, ата-аналардың өз балаларының мүдделерін білдіруге құқығы жоқ. Ата-аналар мен балалардың арасында келіспеушілік болған жағдайда қорғаншы және қамқоршы орган балалардың құқықтары мен мүдделерін қорғау үшін өкіл тағайындауға міндетті.

64-бап. Ата-ана құқықтарын балалардың мүдделерін көздей отырып жүзеге асыру

Ата-ана құқықтарын балалардың мүдделеріне қарама-қайшы жүзеге асыруға болмайды. Балалардың мүдделерін қамтамасыз ету олардың ата-аналары қамқорлығының негізгі мәні болуға тиіс.

Ата-ана құқықтарын жүзеге асыру кезінде ата-аналар балалардың дене және психикалық денсаулығына, олардың адамгершілік жағынан дамуына зиян келтіруге құқығы жоқ. Балаларды тәрбиелеу әдістерінде адамның қадір-қасиетін кемсітетін немқұрайлылық, қатыгездік, дөрекілік, балаларды қорлау немесе қанау болмауға тиіс.

Ата-ана құқықтарын балалардың құқықтары мен мүдделеріне нұқсан келтіре отырып жүзеге асыратын ата-аналар заңда белгіленген тәртіппен жауап береді.

65-бап. Баласынан бөлек тұратын ата-ананың ата-ана құқықтарын жүзеге асыруы

1. Баласынан бөлек тұратын ата-ананың баласымен қарым-қатынас жасауға, оны тәрбиелеуге және баланың білім алуы мәселелерін шешуге қатысуға құқығы бар.

Бала бірге тұратын ата-ана, егер мұндай қарым-қатынас жасау баланың дене және психикалық денсаулығына, оның адамгершілік дамуына зиян келтірмесе, баланың екінші ата-анасымен қарым-қатынас жасауына кедергі болмауға тиіс.

2. Ата-аналары бөлек тұрып жатқан жағдайда балалардың тұратын жері ата-аналарының келісімімен белгіленеді.

Келісім болмаған жағдайда ата-аналардың арасындағы дауды балалардың мүдделерін негізге алып және балалардың пікірін ескере отырып сот шешеді. Бұл орайда сот баланың ата-аналардың әрқайсысына, аға-інілері мен апа-сіңлілеріне (қарындастарына) үйірлігін, баланың жасын, ата-аналардың адамгершілік және өзге де жеке қасиеттерін, ата-аналардың әрқайсысы мен баланың арасында орын алған қатынастарды, олардың дамыту және тәрбиелеу үшін балаға жағдай жасау мүмкіндігін (ата-аналар қызметінің түрі, жұмыс режимі, материалдық және отбасылық жағдайы және т.с.с) ескереді.

3. Ата-аналар баладан бөлек тұратын ата-ананың ата-ана құқығын жүзеге асыру тәртібі туралы жазбаша түрде келісім жасасуға құқылы.

Егер ата-аналар келісімге келе алмаса, ата-аналардың (олардың біреуінің) талап етуі бойынша дауды қорғаншы және қамқоршы органның қатысуымен сот шешеді.

4. Соттың шешімі орындалмаған жағдайда кінәлі ата-анаға заңдарда көзделген шаралар қолданылады.

Сот шешімі қасақана орындалмаған жағдайда баладан бөлек тұратын ата-ананың талап етуі бойынша сот баланың мүдделерін негізге алып және баланың пікірін ескере отырып, баланы соған беру туралы шешім шығара алады.

5. Баласынан бөлек тұратын ата-ананың өз баласы туралы тәрбие, емдеу мекемелері мен басқа да мекемелерден ақпарат алуға құқығы бар.

Ақпарат беруден ата-ана тарапынан баланың өмірі мен денсаулығына қатер болған жағдайларда ғана бас тартылуы мүмкін. Ақпарат беруден бас тартуға сот тәртібімен дау айтылуы мүмкін.

66-бап. Ата-аналардың басқа адамдардан балаларын талап етуге құқығы

1. Ата-аналар заң немесе сот шешімі негізінсіз баланы өз қолында ұстап отырған кез келген адамнан оны қайтаруды талап етуге құқылы. Дау туындаған жағдайда ата-аналар өз құқықтарын қорғау үшін сотқа шағымдануға құқылы.

Бұл тараптарды қарау кезінде сот баланы ата-анасына беру баланың мүдделеріне сай келмейді деген қорытындыға келсе, баланың пікірін ескере отырып, ата-анасының талап-арызын қанағаттандырудан бас тартуға құқылы.

2. Егер сот ата-анасының да, бала қолындағы адамның да оның дұрыс тәрбие алуы мен дамуын қамтамасыз етуге жағдайы жоқ екендігін анықтаса, сот баланы қорғаншы және қамқоршы органның қамқорлығына береді.

11-тарау

АТА-АНА ҚҰҚЫҚТАРЫНАН АЙЫРУ ЖӘНЕ

ОЛАРДЫ ШЕКТЕУ

67-бап. Ата-ана құқықтарынан айыру

1. Егер ата-аналар (олардың біреуі):

1) ата-ана міндеттерін орындаудан, оның ішінде алимент төлеуден қасақана жалтаратын болса;

2) өз баласын перзентханадан (бөлімшесінен) не өзге де балаларды тәрбиелеу, емдеу немесе басқа да мекемелерден алудан дәлелді себептерсіз бас тартса;

3) өздерінің ата-ана құқықтарын пайдаланып қиянат жасаса;

4) балаларға қатыгездік көрсетсе, оның ішінде олардың денесіне немесе психикасына зорлық-зомбылық жасаса, олардың жыныстық пәктігіне қастандық жасаса;

5) заңдарда белгіленген тәртіппен маскүнемдікпен, нашақорлықпен және уытқұмарлықпен ауырады деп танылған болса, олар ата-ана құқығынан айырылуы мүмкін.

2. Өз балаларының не жұбайының өміріне немесе денсаулығына қарсы қасақана қылмыс жасаған жағдайда ата-аналар (олардың біреуі) ата-ана құқығынан айырылуы мүмкін.

68-бап. Ата-ана құқығынан айыру тәртібі

1. Ата-ана құқығынан айыру сот тәртібімен жүргізіледі.

Ата-ана құқығынан айыру туралы істер ата-аналардың біреуінің (олардың орнындағы адамдардың), кәмелетке толмаған балалардың құқықтарын қорғау жөніндегі міндеттер жүктелген органдардың немесе ұйымдардың (қорғаншы және қамқоршы органдардың, кәмелетке толмағандардың істері жөніндегі комиссияның жетім балалар мен ата-анасының қамқорлығынсыз

қалған балаларға арналған мекемелердің және басқаларының) арызы бойынша, сондай-ақ прокурордың талабы бойынша қаралады.

2. Ата-ана құқығынан айыру туралы істер прокурор мен қорғаншы және қамқоршы органның қатысуымен қаралады.

3. Ата-ана құқығынан айыру туралы істі қарау кезінде сот ата-ана құқығынан айырылған ата-аналардан (олардың біреуінен) алимент өндіріп алу туралы мәселені шешеді.

4. Егер сот ата-ана құқығынан айыру туралы істі қарау кезінде ата-аналардың (олардың біреуінің) іс-әрекетінен қылмыстық жазаланатын әрекетті байқаса, мұны жеке қаулымен прокурор назарына жеткізуге міндетті.

5. Сот ата-ана құқығынан айыру туралы соттың шешімі заңды күшіне енген күннен бастап үш күннің ішінде бұл шешімнің көшірмесін баланың тууын мемлекеттік тіркеу орны бойынша азаматтық хал актілерін жазу органы мен қорғаншы және қамқоршы органға жолдауға міндетті.

69-бап. Ата-ана құқықтарынан айырудың салдары

1. Ата-ана құқықтарынан айыру балалармен туыстық фактісіне негізделген барлық құқықтардан, оның ішінде одан асырауға қаражат алу (осы Заңның 131бабы), сондай-ақ балалары бар азаматтар үшін белгіленген жеңілдіктер мен мемлекеттік жәрдемақылар алу құқықтарынан айырылуға әкеп соғады.

2. Ата-ана құқығынан айыру ата-аналарды өз баласын асырау міндетінен босатпайды, ол баланы асырап алу арқылы тоқтатылады.

3. Бала мен ата-ана құқықтарынан айырылған ата-ананың одан әрі бірге тұруы туралы мәселе сот тәртібімен шешіледі.

4. Ата-анасы (олардың біреуі) ата-ана құқықтарынан айырылған бала ата-анасымен және басқа да туыстарымен туыстық фактісіне, оның ішінде мұра алу құқығына негізделген тұрғын үй-жайға меншік құқығын немесе тұрғын үй-жайды пайдалану құқығын, сондай-ақ мүліктік құқықтарын сақтап қалады.

5. Баланы басқа ата-анаға беру мүмкін болмаған кезде немесе ата-анасының екеуі де ата-ана құқықтарынан айырылған жағдайда бала қорғаншы және қамқоршы органның қамқорлығына беріледі.

6. Ата-ана құқықтарынан айырылған ата-аналарының (олардың біреуінің) өтініші бойынша қорғаншы және қамқоршы

орган, егер бұл балаға зиянды ықпал етпесе, баламен жолығуға рұқсат ете алады.

7. Ата-анасы (олардың біреуі) ата-ана құқықтарынан айырылған жағдайда баланы асырап алуға ата-ананы (олардың біреуін) ата-ана құқықтарынан айыру туралы сот шешім шығарған күннен бастап кемінде алты ай өткенде жол беріледі.

70-бап. Ата-ана құқықтарын қалпына келтіру

1. Егер ата-аналар (олардың біреуі), мінез-құлқын, тұрмыс салтын және баланы тәрбиелеуге көзқарасын өзгертсе, олардың ата-ана құқықтары қалпына келтірілуі мүмкін.

2. Ата-ана құқықтарын қалпына келтіру ата-ана құқықтарынан айырылған ата-ананың арызы бойынша сот тәртібімен жүзеге асырылады. Ата-ана құқықтарын қалпына келтіру туралы істер қорғаншы және қамқоршы органдардың, сондай-ақ прокурордың қатысуымен қаралады.

3. Егер ата-ана құқықтарын қалпына келтіру баланың мүдделеріне қайшы келсе, сот баланың пікірін ескере отырып, ата-ана құқықтарын қалпына келтіру туралы ата-ананың (олардың біреуінің) талап-арызын қанағаттандырудан бас тартуға құқылы.

Он жасқа толған бала жөніндегі ата-ана құқықтарын қалпына келтіру баланың келісімімен ғана жасалуы мүмкін.

Егер бала асырап алынған болса және баланы асырап алудың күші жойылмаса (осы Заңның 96-бабы), ата-ана құқықтарын қалпына келтіруге жол берілмейді.

71-бап. Ата-ана құқықтарын шектеу

1. Сот баланың мүддесін ескере отырып, баланы ата-анадан (олардың біреуінен) оларды ата-ана құқықтарынан айырмай алу жолымен ата-ана құқықтарын шектеу туралы шешім шығара алады.

2. Егер баланың ата-аналармен (олардың біреуімен) қалуы:

1) ата-аналарға (олардың біреуіне) байланысты емес мән-жайлар (психикасының бұзылуы немесе өзге де созылмалы ауру, ауыр мән-жайлардың және с.с. салдары) бойынша бала үшін қауіпті болса;

2) олардың мінез-құлқының салдары бала үшін қауіпті болса, алайда ата-аналарды (олардың біреуін) ата-ана құқықтарынан айыру үшін жеткілікті негіздер анықталмаған болса, ата-ана құқықтарын шектеуге жол беріледі. Егер ата-аналар (олардың біреуі) өз мінез-құлқын өзгертпесе, қорғаншы және қамқоршы орган ата-ана құқықтарын шектеу туралы сот шешімі шыққаннан

кейін алты ай өткен соң оларды ата-ана құқықтарынан айыру туралы талап қоюға міндетті. Баланың мүдделеріне сәйкес қорғаншы және қамқоршы орган осы мерзім аяқталғанға дейін ата-аналарды (олардың біреуін) ата-ана құқықтарынан айыру туралы талап қоюға құқылы.

3. Ата-ана құқықтарын шектеу туралы талапты баланың жақын туысқандары, кәмелетке толмаған балалардың құқықтарын қорғау міндеті заңмен жүктелген органдар мен мекемелер (осы Заңның 68-бабының 1-тармағы), мектепке дейінгі мекемелер, жалпы білім беретін және басқа да мекемелер, сондай-ақ прокурор қоя алады.

4. Ата-ана құқықтарын шектеу туралы істер прокурор мен қорғаншы және қамқоршы органның қатысуымен қаралады.

5. Ата-ана құқықтарын шектеу туралы істер қаралған кезде сот ата-аналардан (олардың біреуінен) балаға алимент өндіріп алу туралы мәселені шешуге құқылы.

72-бап. Ата-ана құқықтарын шектеудің салдары

1. Ата-ана құқықтарын сот шектеген ата-аталар баланы жеке өзі тәрбиелеу құқығынан айырылады, ал 71-баптың 2-тармағының 2) тармақшасында көзделген жағдайларда, сондай-ақ балалары бар азаматтар үшін белгіленген жеңілдіктер мен мемлекеттік жәрдемақылар алу құқығынан да айырылады.

2. Ата-ана құқықтарын шектеу ата-аналарды баланы асырау жөніндегі міндеттерден босатпайды.

3. Өзіне қатысты ата-аналарының (олардың біреуінің) ата-ана құқықтары шектелген бала тұрғын үй-жайға меншік құқығын немесе тұрғын үй-жайды пайдалану құқығын сақтап қалады, сондай-ақ ата-аналары және басқа да туысқандарымен туыстық фактісіне негізделген мүліктік құқығын, соның ішінде мұра алу құқығын сақтап қалады.

4. Ата-анасының екеуінің де ата-ана құқықтары шектелген жағдайда бала қорғаншы және қамқоршы органның қамқоршылығына беріледі.

5. Ата-ана құқықтарын сот шектеген ата-аналарға, егер олар балаға зиянды әсерін тигізбесе, баламен қатысуға рұқсат етілуі мүмкін. Ата-аналардың баламен қатысуына қорғаншы немесе қамқоршы органның не қорғаншысының (қамқоршысының), баланың патронат тәрбиелеушілерінің немесе бала тұратын мекеме әкімшілігінің келісімімен жол беріледі.

73-бап. Ата-ана құқықтарын шектеудің күшін жою

1. Егер ата-аналардың (олардың біреуінің) ата-ана құқықтары шектелген негіздер жойылса, сот ата-аналардың (олардың біреуінің) талап-арызы бойынша баланы ата-анасына (олардың біреуіне) қайтарып беру туралы және осы Заңның 72-бабында көзделген шектеулердің күшін жою туралы шешім шығара алады.

2. Егер ата-анасына (олардың біреуіне) баланы қайтарып беру оның мүдделеріне қайшы келетін болса, сот баланың пікірін ескере отырып, талапты қанағаттандырудан бас тартуға құқылы.

74-бап. Баланың өміріне немесе оның денсаулығына тікелей қатер төнген жағдайда баланы айырып алу

1. Баланың өміріне немесе оның денсаулығына тікелей қатер төнген жағдайда қорғаншы және қамқоршы орган баланы ата-аналардан (олардың біреуінен) немесе оны қамқоршылыққа алған басқа да адамдардан дереу айырып алуға құқылы.

Баланы дереу айырып алуды аудандық (қалалық) атқарушы органның тиісті актісі негізінде қорғаншы және қамқоршы орган жүргізеді.

2. Баланы айырып алу кезінде қорғаншы және қамқоршы орган прокурорға дереу хабарлауға, баланы уақытша орналастыруды қамтамасыз етуге және баланы айырып алу туралы аудандық (қалалық) атқарушы органның актісі шыққаннан кейін жеті күн ішінде сотқа ата-аналарды ата-ана құқықтарынан айыру немесе олардың ата-ана құқықтарын шектеу туралы талап қоюға міндетті.

75-бап. Баланы айырып алуға байланысты істер бойынша сот шешімдерін орындау

1. Баланы ата-анасынан айырып алуға және оны басқа адамға (адамдарға) беруге байланысты шешімді мәжбүрлеп орындау қорғаншы және қамқоршы органның және баланы алатын адамның (адамдардың) міндетті түрде қатысуымен, ал қажет болған жағдайларда ішкі істер органдары өкілінің қатысуымен, ал қажет болған жағдайларда ішкі істер органдары өкілінің қатысуымен жүргізілуге тиіс.

2. Баланы беру туралы сот шешімін оның мүдделеріне нұқсан келтірмей орындау мүмкін болмаған жағдайда бала соттың ұйғарымымен тәрбие, емдеу мекемесіне немесе басқа мекемеге уақытша орналастырылуы мүмкін.

76-бап. Бала ретінде асырап алуға жол берілетін балалар

1. Кәмелетке толмаған балаларға қатысты және солардың мүдделеріне сәйкес қана ұл асырап алуға немесе қыз асырап алуға жол беріледі.

2. Қазақстан Республикасының азаматы болып табылатын бұл балаларды Қазақстан Республикасының аумағында тұрақты тұратын Қазақстан Республикасының азаматтарына тәрбиелеуге беру мүмкін болмаған жағдайларда ғана шетелдіктерге асырап алуға, не балалардың туыстарына осы туыстарының азаматтығы мен тұрғылықты жеріне қарамастан асырап алуға берілуі мүмкін.

Балалар Қазақстан Республикасының аумағынан тыс жерлерде тұрақты тұратын Қазақстан Республикасының азаматтарына, балалардың туысы емес шетелдіктерге аталған балалар осы Заңның 101-бабының 3-тармағына сәйкес орталықтандырылған есепке қойылған күннен үш ай өткеннен соң асырап алуға берілуі мүмкін.

3. Бала асырап алғысы келетін шетелдіктер баланы жеке өзі таңдап алуға, онымен кемінде екі апта бойы тікелей жақын араласуға, қорғаншы және қамқоршы органға баланы асырап алғысы келетіні туралы жазбаша арыз, сондай-ақ мемлекеттік лицензиялар негізінде осындай қызметті жүзеге асыратын агенттіктер беретін ықтимал ата-аналардың қаржы жағынан әлауқаты, отбасы жағдайы, денсаулық жағдайы, жеке басының адамгершілік қасиеттері туралы анықтама беруге міндетті.

77-бап. Баланы асырап алу тәртібі

1. Баланы асырап алуды бала асырап алуға тілек білдірген адамдардың (адамның) арызы бойынша сот жүргізеді. Бала асырап алу туралы істерді сот азаматтық іс жүргізу заңдарында көзделген ережелер бойынша ерекше іс жүргізу тәртібімен жүргізеді.

Балаларды асырап алу туралы істерді сот қорғаншы және қамқоршы органдардың қатысуымен қарайды.

2. Бала асырап алушының және асырап алынған баланың құқықтары мен міндеттері (осы заңның 89-бабы) баланы асырап алу туралы сот шешімі заңды күшіне енген күннен бастап туындайды.

Сот баланы асырап алу туралы соттың шешімі заңды күшіне енген күннен бастап үш күн ішінде осы шешімнің көшірмесін шешім шығарған орны бойынша азаматтық хал актілерін жазатын орган мен қорғаншы және қамқоршы органға жіберуге міндетті.

Бала асырап алу азаматтық хал актілерінің мемлекеттік тіркеуі үшін белгіленген тәртіппен мемлекеттік тіркелуге тиіс.

78-бап. Асырап алынуға тиісті балаларды және бала асырап алуға тілек білдірген адамдарды есепке алу

1. Асырап алынуға тиісті балаларды есепке алу осы Заңның 101-бабының 3-тармағында белгіленген тәртіппен жүзеге асырылады.

2. Бала асырап алуға тілек білдірген адамдарды есепке алу облыстық (республикалық маңызы бар қалалық, астаналық) атқарушы органдар белгілеген тәртіппен жүзеге асырылады.

Қазақстан Республикасының азаматы болып табылатын балаларды асырап алуға тілек білдірген шетелдіктерді есепке алу Қазақстан Республикасының Сыртқы істер министрлігі белгілейтін тәртіппен жүргізіледі.

79-бап. Бірнеше бала асырап алу

1. Бір адамның ағалы-інілі және апалы-сіңлілі (қарындасты) болып табылатын немесе өзара туыстық қатынасы жоқ бірнеше баланы асырап алуына болады.

Өзара туыстық қатынасы жоқ асырап алынған балалардың арасында ағалы-інілі және апалы-сіңлілі (қарындасты) сияқты құқықтар мен міндеттер пайда болады.

2. Асырап алу балалардың мүдделеріне сай келетін жағдайларды қоспағанда, ағалы-інілер мен апалы-сіңлілерді (қарындастарын) әртүрлі адамдардың асырап алуына жол берілмейді.

80-бап. Бала асырап алуға құқығы бар адамдар

1. Бала асырап алуға бала асырап алушы адамның отбасында баланың қалыпты дамуы, тәрбиеленуі және білім алуы үшін жағдайлар болған кезде рұқсат етіледі.

2. Мыналарды:

1) сот әрекетке қабілетсіз немесе әрекет қабілеттілігі шектеулі деп таныған адамдарды;

2) сот біреуін әрекетке қабілетсіз немесе әрекет қабілеттілігі шектеулі деп таныған ерлі-зайыптыларды;

3) сот арқылы ата-ана құқықтарынан айырылған немесе сот ата-ана құқықтарын шектеген адамдарды;

4) өзіне заңмен жүктелген міндеттерді тиісінше орындамағаны үшін қорғаншылық (қамқоршылық) міндеттерден шеттетілген адамдарды;

5) егер өз кінәлары бойынша сот шешімімен бала асырап алудың күші жойылса, бұрынғы бала асырап алушы адамдарды;

6) денсаулық жағдайы бойынша ата-ана құқықтарын жүзеге асыра алмайтын адамдарды қоспағанда, қай жыныстан болса да кәмелетке толған адамдар бала асырап алушылар бола алады. Баланы асырап алуға, оны қорғаншылығына (қамқоршылығына) алуға, патронатқа алуға болмайтын адамның бойындағы ауруларының тізбесін Қазақстан Республикасының Үкіметі белгілейді.

3. Бір-бірімен некеде тұрмайтын адамдардың белгілі бір баланы бірлесіп асырап алуына болмайды.

81-бап. Бала асырап алушы мен асырап алынушы баланың арасындағы жас айырмасы

1. Некеде тұрмайтын асырап алушы мен асырап алынушы баланың жас айырмасы кем дегенде он алты жас болуы тиіс. Сот дәлелді деп таныған себептер бойынша жас айырмасы қысқартылуы мүмкін.

2. Өгей әкесі (өгей шешесі) бала асырап алғанда, осы баптың 1-тармағында белгіленген жас айырмасы талап етілмейді.

82-бап. Бала асырап алуға ата-аналардың, қорғаншылар мен қамқоршылардың келісімі

1. Баланы асырап алу үшін оның ата-аналарының келісімі қажет. Жасы он алтыға жетпеген, кәмелетке толмаған ата-аналардың баласын асырап алғанда, сондай-ақ олардың ата-аналарының немесе қорғаншыларының (қамқоршыларының), патронат тәрбиешілерінің келісімі, ал ата-аналары немесе қорғаншылары (қамқоршылары) болмаған жағдайда - қорғаншы және қамқоршы органның келісімі қажет.

2. Бала асырап алуға ата-аналардың келісімі нотариат куәландырған немесе ата-анасының қамқорлығынсыз қалған бала тұратын мекеменің басшысы растаған не бала асырап алу жүргізілген орындағы немесе ата-ананың тұрғылықты жеріндегі қорғаншы және қамқоршы орган бекіткен арызда көрсетілуге тиіс, сондай-ақ бала асырап алу ісін жүргізу кезінде сотта тікелей білдірілуі мүмкін.

Бала асырап алу туралы сот шешімі шығарылғанға дейін ата-аналар бала асырап алуға өздері берген келісімінің күшін жоюға құқылы.

3. Ата-аналар нақты адамдарға не нақты адамды көрсетпей-ақ баланы асырап алуына келісім беруі мүмкін. Қорғаншы және қамқоршы органдар сотқа баланы асырап алудың бала мүдделеріне сай келетіні туралы қорытынды береді. Мұндай

қорытынды баланы оның өгей әкесі (өгей шешесі) асырап алған кезде талап етілмейді.

4. Қорғаншылықта (қамқоршылықта) тұрған балаларды асырап алу үшін олардың қорғаншыларының (қамқоршыларының) жазбаша түрдегі келісімі қажет.

5. Патронат туралы шарт бойынша тәрбиеленіп жатқан балаларды асырап алу үшін патронат тәрбиешілерінің жазбаша түрдегі келісімі қажет.

6. Ата-аналарының қамқорлығынсыз қалған және тәрбие, емдеу мекемелері мен басқа да мекемелердегі балаларды асырап алу үшін осы мекемелер басшыларының жазбаша түрдегі келісімі қажет.

7. Сот баланың мүдделерін көздей отырып, оны асырап алу туралы осы баптың 1, 4-6-тармақтарында аталған адамдардың келісімінсіз шешім шығаруға құқылы.

83-бап. Баланы ата-аналарының келісімінсіз асырап алу

Егер ата-аналарын:

- 1) сот белгісіз немесе өлген, хабар-ошарсыз кеткен деп таныса;
- 2) сот әрекетке қабілетсіз деп таныса;
- 3) сот ата-ана құқықтарынан айырса (осы Заңның 69-бабының 7-тармағындағы талаптар сақталған жағдайда);
- 4) баламен бірге тұрмайтын және сот дәлелсіз деп таныған себептер бойынша алты айдан астам уақыт бойы оны тәрбиелеу мен асыраудан жалтарып жүрсе, олардың баланы асырап алуға келісімі талап етілмейді.

84-бап. Асырап алуға баланың келісімі

1. Он жасқа толған баланы асырап алу үшін оның келісімі қажет. Баланың асырап алынуға келісімін сот белгілейді.

2. Егер бала асырап алу туралы арыз берілгенге дейін бала асырап алушының үйінде тұрып, оны өзінің ата-анасы деп есептейтін болса, асырап алуға баланың келісімі бар деп ұйғарылады.

85-бап. Бала асырап алуға ерлі-зайыптылардың біреуінің келісімі

1. Егер баланы ерлі-зайыптылардың екеуі бірдей асырап алмаса, баланы ерлі-зайыптылардың біреуі асырап алған кезде бала асырап алуға ерлі-зайыптылардың екіншісінің жазбаша келісімі талап етіледі.

2. Егер ерлі-зайыптылар отбасылық қатынастарды іс жүзінде тоқтатып, бір жылдан астам уақыт бөлек тұрып жатса және екінші жұбайының тұрғылықты жері белгісіз болса, бала асырап алу үшін екінші жұбайдың келісімі талап етілмейді.

86-бап. Асырап алынған баланың аты, әкесінің аты және тегі

1. Асырап алынған баланың өз аты, әкесінің аты және тегі сақталады.

2. Бала асырап алушының өтініші бойынша, егер бұл баланың мүдделеріне қайшы келмейтін болса, асырап алынған балаға бала асырап алушының тегі, сондай-ақ ол ұсынған ат беріледі. Асырап алынған баланың әкесінің аты болып, егер бала асырап алушы еркек болса, асырап алушының аты, ал егер асырап алушы әйел болса, асырап алынған баланың әкесі ретінде сол әйел ұсынған адамның аты танылады. Егер бала асырап алушы ерлі-зайыптылардың тектері әртүрлі болса, бала асырап алушы ерлі-зайыптылардың келісімдері бойынша, асырап алынған балаға олардың біреуінің тегі беріледі.

3. Баланы некеде тұрмайтын адам асырап алған жағдайда, оның өтініші бойынша туу туралы кітапқа асырап алынған бала шешесінің (әкесінің) тегі, аты мен әкесінің аты осы адамның (бала асырап алушының) көрсетуі бойынша жазылады.

4. Бала асырап алудың құпиялылығы талап еткен жағдайларды қоспағанда, он жасқа жеткен асырап алынған баланың тегі, аты мен әкесінің аты тек сол баланың келісімімен ғана өзгертілуі мүмкін.

5. Асырап алынған баланың тегі, аты және әкесінің аты өзгертілгені туралы оны асырап алу туралы сот шешімінде көрсетіледі.

87-бап. Асырап алынған баланың туған күні мен туған жерінің өзгертілуі

1. Бала асырап алудың құпиялылығын қамтамасыз ету үшін бала асырап алушының өтініші бойынша асырап алынған баланың туған күні, бірақ алты айдан аспайтын мерзімге, сондай-ақ оның туған жері өзгертілуі мүмкін.

Асырап алынған баланың туған күнін өзгертуге үш жасқа дейінгі бала асырап алынған кезде ғана жол беріледі.

2. Асырап алынған баланың туған күнінің және (немесе) туған жерінің өзгертілуі жөнінде бала асырап алу туралы сот шешімінде көрсетіледі.

88-бап. Бала асырап алғандарды асырауға алынған баланың ата-анасы ретінде жазу

1. Бала асырап алушылардың өтініші бойынша сот туу туралы жазбалар кітабына бала асырап алушыларды өздері асырап алған баланың ата-анасы ретінде жазу туралы шешім қабылдай алады.

2. Осы Заңның 84-бабының 2-тармағында көзделген жағдайларды қоспағанда, он жасқа толған асырап алынған балаға қатысты мұндай жазба жасау үшін оның келісімі қажет.

3. Мұндай жазба жүргізу қажеттілігі жөнінде баланы асырап алу туралы сот шешімінде көрсетіледі.

89-бап. Бала асырап алудың құқықтық салдары

1. Асырап алынған балалар және олардың ұрпақтары бала асырап алушылар мен олардың туыстарына қатысы бойынша, ал бала асырап алушылар және олардың туыстары асырап алынған балалар мен олардың ұрпақтарына қатысы бойынша жеке мүліктік емес және мүліктік құқықтар мен міндеттер жағынан тегі бір туыстарға теңестіріледі.

2. Асырап алынған балалар өздерінің ата-аналарына (өздерінің туыстарына) қатысы бойынша жеке мүліктік емес және мүліктік құқықтарынан айрылады және олар жөніндегі міндеттерден босатылады.

3. Баланы бір адам асырап алған жағдайда, егер бала асырап алушы еркек болса, шешесінің тілегі бойынша, егер бала асырап алушы әйел болса, әкесінің тілегі бойынша жеке мүліктік емес және мүліктік құқықтар мен міндеттердің сақталуы мүмкін.

4. Асырап алынған баланың меншігіндегі мүліктің сақталуы үшін бала асырап алушы жауапты болады. Бала асырап алудан бас тартқан жағдайда бұл мүлікті қайтару жөніндегі міндет те бала асырап алушыға жүктеледі.

5. Асырап алынған баланың ата-анасының біреуімен немесе қайтыс болған ата-анасының туыстарымен қарым-қатынастары сақталуы жөнінде баланы асырап алу туралы сот шешімінде көрсетіледі.

6. Осы баптың 1 және 2-тармақтарында көзделген бала асырап алудың, осы баланың туу туралы акт жазбасындағы бала асырап алушылардың ата-анасы ретінде жазылуына қарамастан, құқықтық салдары пайда болады.

90-бап. Асырап алынған баланың зейнетақы мен жәрдемақы алу құқығының сақталуы

Асырап алынар кезінде ата-анасының қайтыс болуына байланысты өзіне тиесілі зейнетақы мен жәрдемақы алуға құқығы бар бала бұл құқықты асырап алынған жағдайда да сақтап қалады.

91-бап. Бала асырап алудың құпиялылығы

1. Бала асырап алудың құпиялылығы заңмен қорғалады.

Бала асырап алу туралы шешім шығарған судьялар немесе бала асырап алуды мемлекеттік тіркеуді жүзеге асырған лауазымды адамдар, сондай-ақ бала асырап алу туралы өзгедей түрде хабардар болған адамдар бала асырап алудың құпиялылығын сақтауға міндетті.

2. Осы баптың 1-тармағында аталған, бала асырап алудың құпиялылығын оны асырап алушылардың еркіне қарамай жария еткен адамдар заңда белгіленген тәртіппен жауапқа тартылады.

92-бап. Бала асырап алуды жарамсыз деп тану

1. Бала асырап алу:

1) асырап алу туралы шешім жалған құжаттар негізінде қабылданған;

2) заң бойынша міндетті болса да (осы Заңның 82-бабы), бала асырап алу ата-аналардың келісімінсіз жасалған;

3) некеде тұрған адам жұбайының келісімінсіз бала асырап алған;

4) осы Заңның 80-бабының 2-тармағында көзделген ережелер бұзылған жағдайларда жарамсыз деп танылады.

2. Бала асырап алуды жарамсыз деп тану сот тәртібімен жүргізіледі.

3. Бала асырап алуды жарамсыз деп тану туралы істі сот қорғаншы және қамқоршы органның қатысуымен қарайды.

93-бап. Бала асырап алуды жарамсыз деп тану туралы талап етуге құқығы бар адамдар

Бала асырап алуды жарамсыз деп тану туралы талапты асырап алынушының ата-аналары, асырап алушының жұбайы, бала асырап алуға байланысты құқықтары бұзылған адамдар, прокурор, қорғаншы және қамқоршы орган қоюға құқылы.

94-бап. Бала асырап алуды жарамсыз деп танудың салдары

1. Бала асырап алу туралы сот шешімі шыққан кезден бастап бала асырап алу жарамсыз деп танылады.

2. Бала асырап алу жарамсыз деп танылған жағдайда, асырап алынған баланың және асырап алушылардың (бала асырап

алушылар туыстарының) өзара құқықтары мен міндеттері тоқтатылады және егер мұны баланың мүдделері қажет етсе, баланың және оның ата-анасының (оның туыстарының) өзара құқықтары мен міндеттері қалпына келтіріледі.

3. Ата-ананың талап етуі бойынша балаға бұрынғы аты, әкесінің аты және тегі беріледі.

4. Сот бала асырап алуды жарамсыз деп тану туралы соттың шешімі заңды күшіне енген күннен бастап үш күн ішінде осы шешімнің үзіндісін бала асырап алуды мемлекеттік тіркеу орны бойынша азаматтық хал актілерін жазатын орган мен қорғаншы және қамқоршы органдарға жіберуге міндетті.

95-бап. Бала асырап алудың күшін жоюға негіздер

1. Бала асырап алушылар өздеріне жүктелген міндеттерін орындаудан жалтарған, ата-ана құқықтарын теріс пайдаланған, асырап алынған балаға қатал қараған, соның ішінде оған күш қолданып немесе психикалық зорлық- зомбылық етіп, жыныстық пәктігіне қастық жасаған, маскүнемдікпен, нашақорлықпен немесе уытқұмарлықпен ауырады деп танылған жағдайларда, баланы асырап алудың күші жойылуы мүмкін.

2. Сот баланың мүдделерін негізге алып және баланың пікірін ескере отырып, басқа да негіздер бойынша баланы асырап алудың күшін жоюға құқылы.

96-бап. Бала асырап алудың күшін жою

1. Бала асырап алудың күшін жою сот тәртібімен жүргізіледі.

2. Бала асырап алудың күшін жою туралы іс қорғаншы және қамқоршы органның, сондай-ақ прокурордың қатысуымен қаралады.

3. Бала асырап алудың күшін жою туралы сот шешімі заңды күшіне енген күннен бастап бала асырап алу тоқтатылады.

Сот бала асырап алудың күшін жою туралы сот шешімі заңды күшіне енген күннен бастап үш күн ішінде осы шешімнің үзіндісін бала асырап алуды мемлекеттік тіркеу орны бойынша азаматтық хал актілерін жазатын орган мен қорғаншы және қамқоршы органдарға жіберуге міндетті.

97-бап. Бала асырап алудың күшін жоюды талап етуге құқығы бар адамдар

Бала асырап алудың күшін жоюды талап етуге оның ата-аналарының, бала асырап алушылардың, он төрт жасқа толған асырап алынған баланың, қорғаншы немесе қамқоршы органның, сондай-ақ баланың мүдделеріне сай прокурордың құқығы бар.

98-бап. Бала асырап алудың күшін жоюдың салдары

1. Сот бала асырап алудың күшін жойған кезде, асырап алынған баланың және баланы асырап алғандардың, бала асырап алушылар туыстарының өзара құқықтары мен міндеттері тоқтатылады және егер баланың мүдделері талап етсе, бала мен оның ата-анасының (оның туыстарының) өзара құқықтары мен міндеттері қалпына келтіріледі.

2. Бала асырап алудың күші жойылған кезде бала сот шешімі бойынша ата-анасына беріледі. Ата-аналары болмаған кезде, сондай-ақ баланы ата-анасына беру оның мүдделеріне қайшы келсе, бала қорғаншы және қамқоршы органның қамқоршылығына беріледі.

3. Сот баланың асырап алынуына байланысты оған берілген аты, әкесінің аты және тегі сақталу-сақталмау мәселесін де шешеді.

Он жасқа толған баланың атын, әкесінің атын немесе тегін тек оның келісімімен ғана өзгерту мүмкін болады.

4. Сот баланың мүдделерін негізге ала отырып, осы Заңның 125 және 127-баптарында белгіленген мөлшерде бұрынғы бала асырап алушыны баланы асырауға қаражат төлеп тұруға міндеттеуге құқылы.

99-бап. Асырап алынған бала кәмелетке толғаннан кейін бала асырап алудың күшін жоюға жол бермеу

Егер бала асырап алудың күшін жою туралы талап қойылған кезде асырап алынған бала кәмелетке толса, баланы асырап алудың күшін жоюға жол берілмейді, бұған мұндай күшін жоюға бала асырап алушы мен асырап алынған баланың өзара келісімі, сондай-ақ асырап алынған баланың ата-анасының, егер олары тірі болса, сот ата-ана құқықтарынан айырмаған немесе әрекетке қабілетсіз деп танымаған болса, олардың да келісімі болған жағдайлар қосылмайды.

4-БӨЛІМ

ҚОРҒАНШЫЛЫҚ ЖӘНЕ ҚАМҚОРШЫЛЫҚ

13-тарау

АТА-АНАЛАРЫНЫҢ ҚАМҚОРЛЫҒЫНСЫЗ ҚАЛҒАН БАЛАЛАРДЫ АНЫҚТАУ ЖӘНЕ ОРНАЛАСТЫРУ

100-бап. Ата-аналарының қамқорлығынсыз қалған балалардың құқықтары мен мүдделерін қорғау

1. Ата-анасының қайтыс болуы, олардың ата-ана құқықтарынан айырылуы, олардың ата-ана құқықтарының шектелуі, ата-анасының әрекетке қабілетсіз деп танылуы, ата-анасының сырқаттылығы, ата-аналарының ұзақ уақыт болмауы, ата-аналардың балаларын тәрбиелеуден немесе олардың құқықтары мен мүдделерін қорғаудан жалтаруы, соның ішінде ата-аналардың тәрбиелеу, емдеу және басқа да осыған ұқсас мекемелерден өз балаларын алудан бас тартуы, сондай-ақ ата-аналардың қамқорлығы болмаған өзге де жағдайларда, балалардың құқықтары мен мүдделерін қорғау қорғаншы және қамқоршы органдарға жүктеледі.

2. Қорғаншы және қамқоршы органдар ата-аналарының қамқорлығынсыз қалған балаларды анықтайды, осындай балалардың есебін алуды жүргізеді және ата-анасының қамқорлығынсыз қалудың нақты мән-жайларын негізге ала отырып, балаларды орналастырудың нысандарын тандайды (осы Заңның 102-бабы), сондай-ақ оларды асырау тәрбиелеу және білім беру жағдайларына одан әрі бақылау жасауды жүзеге асырады.

Қорғаншы және қамқоршы органдардан басқа, ата-анасының қамқорлығынсыз қалған балаларды орналастыру жөніндегі заңды және жеке тұлғалардың қызметіне жол берілмейді.

101-бап. Ата-аналарының қамқорлығынсыз қалған балаларды анықтау және есепке алу

1. Осы Заңның 100-бабының 1-тармағында аталған балалар туралы мәліметтер бар мекемелердің (мектепке дейінгі білім беру, жалпы білім беру, емдеу және басқа да мекемелердің) лауазымды адамдары және өзге де азаматтар олар туралы қорғаншы және қамқоршы органдарға балалардың нақты тұрған жерін хабарлауға міндетті.

Қорғаншы және қамқоршы орган осындай мәліметтер алған күннен бастап үш күн ішінде баланың тұрмыс жағдайына зерттеу жүргізуге және ата-аналарының немесе оның туыстарының қамқорлығы жоқ екендігі фактісі анықталған кезде баланы орналастыру туралы мәселе шешілгенге дейін оның құқықтары мен мүдделерін қорғауды қамтамасыз етуге міндетті.

2. Ата-аналарының қамқорлығынсыз қалған балалар тұратын тәрбие, емдеу және басқа да мекемелердің басшылары, баланы отбасы тәрбиесіне беру мүмкін екендігі белгілі болған күннен бастап жеті күн мерзім ішінде бұл туралы осы мекеменің тұрған

жері бойынша қорғаншы және қамқоршы органға хабарлауға міндетті.

3. Қорғаншы және қамқоршы орган осы баптың 1 және 2-тармақтарында аталған мәліметтер түскен күннен бастап бір ай ішінде баланы орналастыруды қамтамасыз етеді (осы Заңның 102-бабы) және баланы отбасына тәрбиелеуге беру мүмкіндігі болмаған кезде орталықтандырылған есепке алу үшін және кейіннен баланы Қазақстан Республикасының аумағында тұрақты тұратын Қазақстан Республикасы азаматының отбасына тәрбиелеуге орналастыруға жәрдем көрсету үшін осындай бала туралы мәліметті тиісті әкімшілік-аумақтық бөліністің білім беру басқармасының органына жібереді.

Балаларды орталықтандырылған есепке алуды ұйымдастыру тәртібін Қазақстан Республикасының Үкіметі белгілейді.

4. Осы баптың 2 және 3-тармақтарында көзделген міндеттерді орындамағаны үшін, сондай-ақ бала туралы көпе-көрнеу жалған мәліметтер бергені үшін лауазымды адамдар заңда белгіленген тәртіппен жауапқа тартылады.

102-бап. Ата-аналарының қамқорлығынсыз қалған балаларды орналастыру

1. Ата-аналарының қамқорлығынсыз қалған балалар асырап алынып, отбасына тәрбиеленуге, қорғаншылыққа (қамқоршылыққа) немесе патронат шарты бойынша, ал мұндай мүмкіндік болмаған кезде, жетім балаларға немесе ата-аналарының қамқорлығынсыз қалған балаларға арналған барлық үлгідегі (тәрбие, емдеу және басқа да) мекемелерге берілуге тиіс.

Баланың мүддесіне сай оны орналастыру кезінде оның этникалық шығу тегі, белгілі бір дінге және мәдениетке жататындығы, ана тілі, тәрбие мен білім берудегі сабақтастықты қамтамасыз ету мүмкіндігі ескерілуі мүмкін.

2. Ата-аналарының қамқорлығынсыз қалған балаларды, осы баптың 1-тармағында аталған отбасына немесе мекемеге тәрбиелеуге орналастырылғанға дейін балаларға қорғаншылық (қамқоршылық) міндеттерін атқару қорғаншы және қамқоршы органдарға уақытша жүктеледі.

14-тарау ҚОРҒАНШЫЛЫҚТЫ ЖӘНЕ ҚАМҚОРШЫЛЫҚТЫ БЕЛГІЛЕУ ТӘРТІБІ

103-бап. Қорғаншылық және қамқоршылық белгіленетін адамдар

1. Қорғаншылық және қамқоршылық ата-анасының қамқорлығынсыз қалған (осы Заңның 101-бабының 1-тармағы) балаларға, оларды асырау, тәрбиелеу және білім беру мақсатында, сондай-ақ олардың мүліктік және мүліктік емес құқықтары мен мүдделерін қорғау үшін белгіленеді.

2. Қорғаншылық және қамқоршылық әрекетке қабілетсіз немесе әрекетке қабілеті шектеулі кәмелетке толған адамдардың мүліктік және жеке мүліктік емес құқықтары мен мүдделерін қорғау үшін де белгіленеді.

104-бап. Қорғаншылық

1. Қорғаншылық он төрт жасқа толмаған балаларға, сондай-ақ психикалық аурудың салдарынан немесе ақыл-есінің кемдігінен сот әрекетке қабілетсіз деп таныған адамдарға белгіленеді.

2. Қорғаншылық қайтыс болған немесе соттың шешімімен өлді немесе хабаршарсыз кеткен деп танылған кәмелетке толмаған адамның, әрекетке қабілетсіз немесе әрекетке қабілеті шектеулі кәмелетке толған адамның мүлкіне тағайындалады.

Егер қорғаншылық және қамқоршылық белгіленген адамның басқа жерде мүлкі болса, онда осы мүлікті басқару үшін қорғаншы және қамқоршы органдар мүліктің тұрған жерінде қорғаншы тағайындай алады.

105-бап. Қамқоршылық

1. Қамқоршылық он төрттен он сегіз жасқа дейінгі кәмелетке толмағандарға, сондай-ақ спиртті ішімдіктерге немесе есірткі заттарға салынуы салдарынан сот әрекет қабілеттілігі шектеулі деп таныған адамдарға белгіленеді.

2. Денсаулығының жай-күйіне байланысты өзінің құқықтарын өз бетінше жүзеге асыра алмайтын және міндеттерді орындай алмайтын кәмелетке толған әрекет қабілеттілігі адамдардың арызы бойынша оларға қамқоршылық белгіленуі мүмкін.

106-бап. Қорғаншы және қамқоршы органдар

1. Аудандық (қалалық) атқарушы органдар қорғаншы және қамқоршы органдар болып табылады.

2. Аудандық және қалалық атқарушы органдар өздерінің қорғаншылық және қамқоршылық жөніндегі міндеттерін халыққа білім беруге, оны әлеуметтік қорғауға және оның денсаулығын сақтауға уәкілеттік берілген органдары арқылы жүзеге асырады, ал поселкелік, селолық, ауылдық атқарушы органдар бұл қызметтерді дербес жүзеге асырады.

3. Қорғаншы және қамқоршы органдар баланың және оны тәрбиелеуге үміткер адамның (адамдардың) тұрмыс жағдайларына зерттеу жүргізуге және зерттеу актісін сотқа табыс етуге міндетті.

4. Қорғаншы және қамқоршы органдар өздерінің міндеттерін осы органдар туралы Қазақстан Республикасының Үкіметі бекітетін ереже негізінде жүзеге асырады.

107-бап. Қорғаншылықты және қамқоршылықты белгілеу

1. Қорғаншы және қамқоршы органдар қорғаншылық пен қамқоршылықты қажет ететін адамның тұрғылықты жері бойынша қорғаншылық пен қамқоршылық белгілейді. Жекелеген жағдайларда қорғаншылық пен қамқоршылық қорғаншының (қамқоршының) тұрғылықты жері бойынша белгіленуі мүмкін.

2. Адамды әрекетке қабілетсіз немесе оның әрекет қабілеттілігі шектеулі деп тану туралы шешім заңды күшіне енген кезден бастап үш күн ішінде сот бұл туралы оған қорғаншылық және қамқоршылық белгілеу үшін сол адамның тұрғылықты жері бойынша қорғаншы және қамқоршы органға хабарлауға міндетті.

3. Адамға қорғаншылықты және қамқоршылықты белгілеу қажеттігі туралы тиісті органдарға белгілі болған кезден бастап бір ай ішінде қорғаншылық және қамқоршылық белгіленеді.

4. Қорғаншы немесе қамқоршы тағайындауға мүдделі адамдар сот тәртібімен шағымдануы мүмкін.

108-бап. Қорғаншылар мен қамқоршылар

1. Мыналарды:

1) сот әрекетке қабілетсіз немесе әрекет қабілеттілігі шектеулі деп таныған адамдарды;

2) сот бойынша ата-ана құқықтарынан айырылған немесе ата-ана құқықтарын сот шектеген адамдарды;

3) өзіне заңмен жүктелген міндеттерді тиісінше орындамағаны үшін қорғаншылық (қамқоршылық) міндеттерден шеттетілген адамдарды;

4) егер сот олардың кінәсінен бала асырап алудың күшін жойған болса, бұрын бала асырап алушыларды;

5) денсаулығының жай-күйіне байланысты (осы Заңның 80-бабы 2-тармағының 6) тармақшасы) баланы тәрбиелеу жөніндегі міндеттерін жүзеге асыра алмайтын адамдарды қоспағанда, екі жыныстың да кәмелетке толған адамдары қорғаншылар (қамқоршылар) бола алады.

2. Қорғаншы немесе қамқоршы тек оның келісімімен ғана тағайындалуы мүмкін.

Егер бұл қорғаншылыққа алынушының мүдделеріне қайшы келмесе, қорғаншыны немесе қамқоршыны тағайындауда жұбайының, ата-анасының, туыстарының немесе қорғаншылыққа алынушыға жақын басқа да адамдардың басым құқығы болады.

Егер қамқорлыққа алынушылардың мүдделерінің арасында қайшылық болмаса, бір қорғаншыны немесе қамқоршыны бірнеше адамға тағайындауға жол беріледі.

3. Әрекетке қабілетті және ата-ана құқықтарынан айырылмаған, бірақ балаларының тәрбиесін жүзеге асыра алмайтын ата-аналардың кәмелетке толмаған балаларына қорғаншы және қамқоршы тағайындалатын кезде, қорғаншылар және қамқоршылар ата-аналардың тілегі ескеріле отырып тағайындалады.

Балаға қорғаншы (қамқоршы) тағайындау кезінде қорғаншының (қамқоршының) адамгершілік және өзге де жеке қасиеттері, оның қорғаншылық (қамқоршылық) міндеттерді орындау қабілеті, қорғаншы (қамқоршы) мен баланың арасындағы қатынастар, қорғаншы (қамқоршы) отбасы мүшелерінің балаға деген көзқарасы, сондай-ақ, егер бұл мүмкін болса, баланың өз тілегі ескеріледі. Егер кәмелетке толмаған балаға қорғаншы немесе қамқоршы етіп тағайындалатын адам некеде тұрса, оның жұбайының келісімі талап етіледі.

4. Қорғаншылықты немесе қамқоршылықты қажет ететін және тиісті тәрбие, емдеу мекемелерінде, халықты әлеуметтік қорғау мекемелерінде тұрып жатқан адамдардың қорғаншылары мен қамқоршылары осы мекемелердің әкімшілігі болып табылады.

Қорғаншының (қамқоршының) осындай мекемелерге баланы уақытша орналастыруы қорғаншының (қамқоршының) осы балаға қатысты қорғаншылық (қамқоршылық) құқықтары мен міндеттерін тоқтатпайды.

5. Қорғаншылар мен қамқоршылар өз қамқорындағылардың құқықтары мен мүдделерін қорғауды кез келген адамдарға қатысты, соның ішінде сотта арнайы өкілеттіксіз қорғай алады.

15-тарау

ҚОРҒАНШЫЛАРДЫҢ (ҚАМҚОРШЫЛАРДЫҢ) ЖӘНЕ ҚАМҚОРЛЫҚҚА АЛЫНҒАНДАРДЫҢ ҚҰҚЫҚТЫҚ ЖАҒДАЙЫ

109-бап. Қорғаншылыққа (қамқоршылыққа) алынған адамдардың құқықтары

1. Қорғаншылыққа (қамқоршылыққа) алынған адамдардың:
 - 1) өздерінің адамдық қадір-қасиеттерінің құрметтелуіне;
 - 2) қорғаншы (қамқоршы) тарапынан қамқорлық көруге;

3) осы Заңның 112-бабының 4-тармағында көзделген жағдайларды қоспағанда, онымен бірге тұруға;

4) өздеріне тиесілі алименттерін, зейнетақыларын, жәрдемақыларын және басқа да әлеуметтік төлемдерді алуға;

5) тұрғын үйге меншік құқығын немесе тұрғын үйді пайдалану құқығын сақтауға;

6) қорғаншы (қамқоршы) тарапынан қиянат етушіліктен қорғануға құқығы бар.

2. Қорғаншылыққа (қамқоршылыққа) алынған балалар осы баптың 1-тармағында келтірілген құқықтардан басқа:

1) қорғаншының (қамқоршының) отбасында тәрбиелену;

2) оларды асырап-бағу, тәрбиелеу, білім беру және жан-жақты дамыту үшін жағдайлардың қамтамасыз етілуі;

3) тұрғын үй-жайы болмаған жағдайда тұрғын үй заңдарына сәйкес оны алу құқықтарына да;

4) осы заңның 52-54, 59-баптарында көзделген құқықтарға ие болады.

110-бап. Ата-аналарының қамқорлығынсыз қалған, тәрбие және емдеу мекемелеріндегі балалардың құқықтары

1. Ата-аналарының қамқорлығынсыз қалған, тәрбие, емдеу және басқа да мекемелеріндегі балалардың:

1) асырап-бағылуға, тәрбиеленуге, білім алуға, жан-жақты дамуға, өздерінің адамгершілік қадір-қасиеттерінің құрметтелуіне, өз мүдделерінің қамтамасыз етілуіне;

2) өздеріне тиесілі алименттерді, зейнетақыларды, жәрдемақы-ларды және басқа да әлеуметтік төлемдерді алуға;

3) тұрғын үй-жайға меншік құқығын немесе тұрғын үй-жайды пайдалану құқығын сақтауға, ал тұрғын үй-жайы болмаған жағдайда тұрғын үй-заңдарына сәйкес тұрғын үй-жай алу құқығына ие болуға;

4) аталған мекемелерде тұруы аяқталған соң еңбек туралы заңдарда көзделген жұмысқа орналасу кезіндегі жеңілдіктерге ие болуға құқығы бар.

2. Қорғаншы және қамқоршы органдар осы баптың 1-тармағында аталған мекемелерде тұрып жатқан балаларды асырау, тәрбиелеу, оларға білім беру жағдайларын бақылауды жүзеге асырады.

3. Осы мекемелер түлектерінің құқықтарын қорғау қорғаншы және қамқоршы органдарға жүктеледі.

4. Ата-аналарының қамқорлығынсыз қалған және осы баптың 1-тармағында аталған мекемелерде тұратын балалар осы

Заңның 52-54, 59-баптарында көзделген құқықтарға да ие болады.

111-бап. Қорғаншылардың (қамқоршылардың) өз міндеттерін атқаруы

1. Қорғаншылар заң жүзінде қамқоршылыққа алынғандардың өкілдері болып табылады және барлық қажетті мәмілелерді олардың атынан және олардың мүдделерін көздеп жасайды.

2. Қамқоршылар өздерінің қамқоршылығындағы адамдардың өз бетінше жасауға құқығы жоқ мәмілелерді жасауға келісім береді, қамқоршылығындағылардың өз құқықтарын жүзеге асыруына және міндеттерін атқаруына жәрдем көрсетеді, сондай-ақ оларды үшінші бір тұлғалардың тарапынан ықтимал қиянаттардан қорғайды.

3. Заңда белгіленген жағдайларды қоспағанда, қорғаншылық және қамқоршылық жөніндегі міндеттер тегін атқарылады.

Қорғаншы (қамқоршы) қамқоршылығына алынғандарды өз есебінен асырап бағуға міндетті емес. Қамқоршылыққа алынушыны асырап-бағу қамқоршылыққа алынушының алатын жалақысы, алименті, зейнетақысы және басқа да әлеуметтік төлемдері есебінен, сондай-ақ оған тиесілі мүліктер есебінен жүзеге асырылады.

Қамқоршылыққа алынушыны асырап-бағуға жеткілікті қаражат болмаған кезде, қорғаншы және қамқоршы органдар оны асырап-бағуға жәрдемақы тағайындайды.

4. Қорғаншылар мен қамқоршылар өздерінің қамқорлығына алынғандарды асырап-бағуға, оларды бағып-күту мен емдеуді қамтамасыз етуге, олардың құқықтары мен мүдделерін қорғауға қамқорлық жасауға міндетті. Аталған міндеттер сот әрекет қабілеттілігі шектеулі деп таныған кәмелетке толған адамдардың қамқоршылығына жүктелмейді.

5. Спиртті ішімдіктерге немесе есірткі заттарға салынуы салдарынан әрекетке қабілетсіз немесе әрекет қабілеті шектеулі деп танылған адам жөніндегі негіздер жойылса, қорғаншы немесе қамқоршы қамқорлыққа алынушыны әрекетке қабілетті деп тану туралы және одан қорғаншылық пен қамқоршылықты алып тастау туралы сотқа өтініш беруге міндетті.

112-бап. Баланың қорғаншысының (қамқоршысының) құқық-тары мен міндеттері

1. Баланың қорғаншысы (қамқоршысы) қорғаншылығындағы (қамқоршылығындағы) баланы тәрбиелеуге, оның денсаулығына,

дене, психикалық, адамгершілік және рухани дамуына қамқорлық жасауға құқылы және міндетті.

Қорғаншы (қамқоршы) баланың пікірі мен қорғаншы және қамқоршы органның ұсыныстарын ескере отырып, сондай-ақ осы Заңның 64-бабында көзделген талаптар сақталған жағдайда қорғаншылығындағы (қамқоршылығындағы) баланы тәрбиелеудің әдістерін дербес белгілеуге құқылы.

Қорғаншы (қамқоршы) баланың пікірін ескере отырып, ол орта білім алғанға дейін балаға білім беру мекемесі мен оқытудың нысанын таңдауға құқылы және баланың орта білім алуын қамтамасыз етуге міндетті.

2. Қорғаншы (қамқоршы) қамқоршылығындағы (қорғаншылығындағы) баланы өздерінде заңды негіздерсіз ұстап отырған кез келген адамнан, соның ішінде баланың жақын туыстарынан қайтарып беруді сот арқылы талап етуге құқылы.

3. Баланың өз ата-аналарымен және басқа жақын туыстарымен қарым-қатынас жасауына, мұндай қарым-қатынас баланың мүдделеріне сай келмеген жағдайларды қоспағанда, бөгет болуға қорғаншының (қамқоршының) құқығы жоқ.

4. Қамқорлыққа алынушылар, балалар немесе емдеу мекемелерінде тәрбиеленуде немесе емделуде болған жағдайларды қоспағанда, кәмелетке толмағандардың қорғаншылары мен қамқоршылары өздері қамқорлыққа алғандармен бірге тұруға міндетті. Қамқоршының он алты жасқа толған қамқоршылыққа алынушыдан бөлек тұруына, бұл қамқоршылыққа алынушының тәрбиесіне және оның құқықтары мен мүдделерін қорғауға қолайсыздық туғызбайтын жағдайда, қорғаншы және қамқоршы органның рұқсатымен жол беріледі.

Қорғаншылар мен қамқоршылар тұрғылықты жерінің өзгеруі туралы қорғаншы және қамқоршы органдарға хабарлап отыруға міндетті.

5. Қорғаншы кемінде жылына бір рет қорғаншы және қамқоршы органға қамқоршылыққа алынушының денсаулық жағдайы туралы және оны тәрбиелеу жөніндегі, сондай-ақ оның мүлкін басқару жөніндегі жұмыс туралы есеп беріп отыруға міндетті.

113-бап. Әрекетке қабілетті азаматтарды қамқоршылыққа алу

1. Денсаулық жағдайы бойынша өз құқығын жүзеге асырып, қорғай алмайтын және міндеттерін орындай алмайтын кәмелетке толған әрекетке қабілетті адамның өтініші бойынша оған қамқоршылық белгіленуі мүмкін.

2. Кәмелетке толған әрекетке қабілетті адамның қамқоршысын қорғаншы және қамқоршы орган сол адамның келісімі бойынша ғана тағайындауы мүмкін.

3. Кәмелетке толған әрекетке қабілетті қамқоршылыққа алынушыға тиесілі мүлікке билік етуді қамқоршылыққа алынушымен жасалған тапсыру шарты немесе мүлікті сенімді басқару негізінде қамқоршы жүзеге асырады.

Қамқоршылыққа алынушыны асырап-бағуға және оның тұрмыстық қажеттерін қанағаттандыруға бағытталған тұрмыстық және өзге де мәмілелерді жасауды қамқоршылыққа алынушының келісімімен қамқоршы жүзеге асырады.

4. Кәмелетке толған әрекетке қабілетті адамды қамқоршылыққа алу осы адамның талабы бойынша тоқтатылуы мүмкін.

Қамқоршылыққа алынған адамның қамқоршысы осы Заңның 115-бабында көзделген жағдайларда өзіне жүктелген міндеттерді орындаудан босатылады.

114-бап. Қамқоршылыққа алынушының мүлкіне билік ету

1. Қамқоршылыққа алынушы адамның кірістерін, соның ішінде оның мүлкін басқарудан түсетін кірістерін, қамқоршылыққа алынушының өзі дербес билік етуге құқығы бар кірістерін қоспағанда, тек қана қамқоршылыққа алынушының мүдделеріне сай және қорғаншы мен қамқоршы органның алдын ала рұқсатымен қорғаншы немесе қамқоршы жұмсайды.

Қорғаншы және қамқоршы органның алдын ала берген рұқсатынсыз, қамқоршылыққа алынушының оның кірісі ретіндегі тиесілі сомасы есебінен қорғаншы мен қамқоршы қамқоршылыққа алынушыны асырау үшін қажетті азын-аулақ шығыстар жасауға құқылы.

2. Қорғаншы және қамқоршы органның алдын ала берген рұқсатынсыз қорғаншының иеліктен алу жөніндегі мәмілелер жасауға, ал қамқоршының мәміле жасауға келісім беруге, соның ішінде қамқоршылыққа алынушының мүлкін айырбастауға немесе сыйға тартуға немесе оның атынан кепіл болу шартын жасасуға, оны жалға (жалдауға), тегін пайдалануға немесе кепілге беруге, қамқоршылыққа алынушының заң бойынша және өсиет бойынша мұрагерлікпен тиесілі құқықтарынан бас тартқызуға әкеп соғатын мәмілелер жасауға, оның мүлкін бөлуге немесе одан үлес бөлуге, сондай-ақ қамқоршылыққа алынушының мүлкін азайтуға әкеп соғатын басқа да кез келген мәмілелер жасауға құқығы жоқ. Аталған мәмілелер нәтижесінде қорғаншы алған қаражаттың қалай жұмсалуға тиіс екенін қорғаншы және қамқоршы орган белгілейді.

Қамқоршылыққа алынушының мүлкін басқару тәртібі Қазақстан Республикасының заңдарымен белгіленеді.

3. Мүлікті қамқоршылығына алушыға сый ретінде немесе тегін түрде пайдалануға беруді қоспағанда, қорғаншының (қамқоршының), олардың жұбайлары мен жақын туыстарының қамқоршылыққа алынушымен мәмілелер жасауға, сондай-ақ мәмілелер жасау кезінде немесе қамқоршылыққа алынушы мен қорғаншы немесе қамқоршының жұбайы және олардың жақын туыстары арасында жүргізілген сот ісінде қамқоршылыққа алынушының атынан өкілдік білдіруге құқығы жоқ.

Қорғаншы (қамқоршы) болып тағайындалмастан бұрын туындаған қамқоршылыққа алынушының қорғаншысына (қамқоршысына), оның жұбайына немесе туыстарына қарыздары қорғаншы және қамқоршы органның рұқсатымен төленеді.

115-бап. Қорғаншылар мен қамқоршыларды олардың өз міндеттерін атқарудан босату және шеттету

1. Қорғаншы және қамқоршы орган көмелетке толмаған қамқоршылыққа алынушы өз ата-анасына қайтып оралған немесе ол асырап алушыға қайтарылған жағдайларда, қорғаншыны немесе қамқоршыны өз міндеттерін атқарудан босатады.

Қамқоршылыққа алынушыны тәрбие, емдеу мекемесіне, халықты әлеуметтік қорғау мекемесіне немесе басқа да мекемеге орналастыру кезінде, егер бұл қамқоршылыққа алынушының мүдделеріне қайшы келмесе, қорғаншы және қамқоршы орган бұрын тағайындалған қорғаншыны немесе қамқоршыны олардың өз міндеттерін атқарудан босатады.

2. Дәлелді себептер болған кезде (сырқаттану, мүліктік жағдайдың өзгеруі, қамқоршылыққа алынушымен өзара түсініспеушілік және т.с.с) қорғаншы немесе қамқоршы оның өтініші бойынша өз міндеттерін атқарудан босатылуы мүмкін.

3. Қорғаншы немесе қамқоршы өзінің тиісті міндеттерін тиісінше атқармаған жағдайда, соның ішінде өзінің қорғаншылығын немесе қамқоршылығын жеке басының пайдасы мақсатында пайдаланған кезде немесе қамқоршылыққа алынушыны қадағалаусыз және қажетті көмексіз қалдырған жағдайда, қорғаншы және қамқоршы орган қорғаншыны немесе қамқоршыны осы міндеттерді атқарудан шеттеуі және кінәлі адамды заңмен белгіленген жауапқа тарту үшін қажетті шаралар қолдануы мүмкін.

116-бап. Қорғаншылықты және қамқоршылықты тоқтату

1. Қамқоршылыққа алынушыны әрекетке қабілетті деп тану немесе қорғаншының, қамқоршының немесе қорғаншы және қамқоршы органның арызы бойынша оның әрекет қабілеттілігі шектеулілігінің күшін жою туралы сот шешім шығарған жағдайларда кәмелетке толған адамдарға қорғаншылық және қамқоршылық тоқтатылады.

2. Жасөспірім қамқоршылыққа алынушы он төрт жасқа жеткен соң оған қорғаншылық тоқтатылады, ал қорғаншылық міндетін жүзеге асыратын адам бұл туралы қосымша шешімсіз кәмелетке толмаған баланың қамқоршысы болады.

3. Кәмелетке толмаған балаға қамқоршылық он сегіз жасқа жеткен кезде арнайы рұқсатсыз, сондай-ақ ол некеге отырған кезде және кәмелетке толғанға дейін ол әрекетке толық қабілетті болған басқа да жағдайларда қамқоршылық тоқтатылады.

117-бап. Қорғаншылардың және қамқоршылардың әрекеттеріне шағым жасау

Қорғаншылардың және қамқоршылардың әрекетіне кез келген адам қамқоршылыққа алынушының мүдделеріне сай қорғаншы және қамқоршы органға не оның тұрғылықты жері бойынша сотқа шағым жасай алады.

118-бап. Қорғаншы және қамқоршы органдардың шешімдеріне шағым жасау

Қорғаншы және қамқоршы органдардың барлық мәселелер жөніндегі шешімдеріне мүдделі адамдар сот тәртібімен шағым жасай алады.

16-тарау ПАТРОНАТ

119-бап. Патронат

1. Қорғаншылық және қамқоршылық нысанындағы патронат ата-анасының қамқорлығынсыз қалған, соның ішінде тәрбиелеу, емдеу немесе осы тәрізді басқа да мекемелердегі кәмелетке толмаған балаларға белгіленеді.

2. Баланы тәрбиелеуге алуға тілек білдіруші адам (патронат тәрбиеші) мен қорғаншы және қамқоршы орган арасында жасалған баланы (балаларды) тәрбиелеуге беру туралы шарт патронаттың туындау негізі болып табылады.

3. Патронат туралы Ережені Қазақстан Республикасының Үкіметі бекітеді.

120-бап. Баланы тәрбиелеуге беру туралы шарт

1. Баланы тәрбиелеуге беру туралы шарт баланы асырап-бағу, тәрбиелеу және білім беру жағдайларын, патронат тәрбиешінің құқықтары мен міндеттерін, патронат тәрбиешіге қатысты қорғаншы және қамқоршы органдардың міндеттерін, сондай-ақ мұндай шарттың тоқтатылу негіздері мен салдарларын көздеуі тиіс.

Бала патронат тәрбиешіге аталған шартпен белгіленген мерзімге тәрбиелеуге беріледі.

2. Патронат тәрбиешілердің еңбегіне ақы төлеу және тәрбиелеуге алынған балалар санына қарай берілетін жеңілдіктер Қазақстан Республикасының заңдарымен белгіленеді.

3. Баланы тәрбиелеуге беру туралы шарт:

1) дәлелді себептері (сырқаттану, отбасылық немесе материалдық жағдайдың өзгеруі, баламен өзара түсіністіктің болмауы, балалар арасындағы жанжалдар және басқалар) болған кезде патронат тәрбиешілердің бастамасы бойынша;

2) баланы асырап-бағу, тәрбиелеу және білім беруде қолайсыз жағдайлар туған кезде қорғаншы және қамқоршы органның бастамасы бойынша;

3) бала ата-анасына қайтарып берілген немесе бала асырап алынған жағдайларда мерзімінен бұрын бұзылуы мүмкін.

121-бап. Патронат тәрбиешілер

1. Патронат тәрбиешілер тәрбиеге алынған балаға (балаларға) қатысты қорғаншылар мен қамқоршылар сияқты құқықтар мен міндеттерге ие болады. Оларға осы заңның 108-бабында көзделген талаптар қойылады.

2. Патронат тәрбиешілерді іріктеп алуды қорғаншы және қамқоршы органдар жүзеге асырады.

122-бап. Патронат белгіленетін бала (балалар)

1. Шарт бойынша оны патронат тәрбиешілерге беру үшін баланы (балаларды) алдын ала таңдауды қорғаншы және қамқоршы органмен келісім бойынша баланы (балаларды) отбасына қабылдауға тілек білдірген адамдар жүзеге асырады.

Ағалы-інілерді, апалы-сіңлілерді (қарындастарын) ажыратуға жол берілмейді, бұған олардың мүдделеріне сай келетін жағдайлар қосылмайды.

2. Баланы (балаларды) патронат тәрбиешілерге беру оның пікірі ескеріле отырып жүзеге асырылады. Он жасқа толған бала (балалар) оның келісімімен ғана берілуі мүмкін.

3. Патронат тәрбиешілерге берілген бала (балалар) өзіне тиесілі алименттерге, зейнетақыға, жәрдемақыға және басқа да әлеуметтік төлемдерге құқығын, сондай-ақ тұрғын үй-жайға меншік құқығын немесе тұрғын үй-жайды пайдалану құқығын сақтайды. Тұрғын үй-жайы болмаған кезде, тұрғын үй заңдарына сәйкес оған тұрғын үй-жай берілуіне құқығы бар.

Патронат тәрбиешілерге берілген бала (балалар) осы Заңның 52-54, 59-баптарында көзделген құқықтарға да ие болады.

123-бап. Патронат тәрбиешілерге берілген баланы (балаларды) асырап-бағу

1. Әрбір баланы асырап-бағуға Қазақстан Республикасының Үкіметі белгілеген тәртіппен және мөлшерде ай сайын ақшалай қаражат төленеді.

2. Қорғаншы және қамқоршы орган патронат тәрбиешілерге қажетті көмек көрсетуге, баланың (балалардың) өмірі мен тәрбиесіне қалыпты жағдай туғызуға жәрдемдесуге міндетті, сондай-ақ патронат тәрбиешілерге жүктелген баланы (балаларды) асырап-бағу, тәрбиелеу және оған білім беру міндеттерін орындауға бақылауды жүзеге асыруға құқылы.

5-БӨЛІМ. ОТБАСЫ МҮШЕЛЕРІНІҢ АЛИМЕНТТІК ҚАТЫНАСТАРЫ

17-тарау

АТА-АНАЛАРМЕН БАЛАЛАРДЫҢ АЛИМЕНТТІК МІНДЕТТЕМЕЛЕРІ

124-бап. Ата-аналардың кәмелетке толмаған балаларды асырап-бағу жөніндегі міндеттері

1. Ата-аналар өздерінің кәмелетке толмаған балаларын асырап-бағуға міндетті. Кәмелетке толмаған балаларды асыраудың тәртібі мен нысанын ата-аналар дербес айқындайды.

Ата-аналар осы Заңның 20-тарауына сәйкес өздерінің кәмелетке толмаған балаларын асырап-бағу туралы келісім (алимент төлеу туралы келісім) жасауға құқылы.

2. Егер ата-аналар өздерінің кәмелетке толмаған балаларын асырап-бағуына алмаса, кәмелетке толмаған балаларды асырап-бағуға арналған қаражат (алимент) ата-аналардан сот тәртібімен өндіріп алынады.

3. Ата-аналардың алимент төлеу туралы келісімі болмағанда, кәмелетке толмаған балалар асырап-бағуға алынбағанда және сотқа талап-арыз берілмегенде қорғаншы және қамқоршы орган кәмелетке толмаған балаларға олардың ата-анасынан (олардың біреуінен) алимент өндіріп алу туралы талап қоюға құқылы.

125-бап. Кәмелетке толмаған балаларды асырап-бағуға сот тәртібімен өндіріп алынатын алименттің мөлшері

1. Алимент төлеу туралы келісім болмаған жағдайда сот кәмелетке толмаған балаларға олардың ата-аналарынан алиментті ай сайын мынадай мөлшерде: бір балаға - ата-анасы табысының және (немесе) өзге де кірісінің - төрттен бірін; екі балаға - үштен бірін; үш және одан да көп балаға - тең жартысын өндіріп алады.

2. Бұл үлестердің мөлшерін сот тараптардың материалдық немесе отбасылық жағдайларын және назар аударарлық өзге де мән-жайларды ескере отырып кемітуі немесе көбейтуі мүмкін.

126-бап. Кәмелетке толмаған балаларға алимент ұсталатын табыстың және (немесе) өзге де кірістің түрлері

Ата-аналардың ұлттық және (немесе) шетел валютасымен алатын және осы заңның 125-бабына сәйкес кәмелетке толмаған балаларға алимент ұсталып қалатын табысының және (немесе) өзге де кірісінің түрлерін Қазақстан Республикасының Үкіметі белгілейді.

127-бап. Кәмелетке толмаған балаларға тұрақты ақша сомасы түрінде алимент өндіріп алу

1. Ата-аналардың кәмелетке толмаған балаларына алимент төлеу туралы келісімі болмаған жағдайда және ата-ананың табысына және (немесе) өзге де кірісіне үлестік қатынаста алимент өндіріп алу мүмкін болмаған, қиындық тудырған немесе тараптардың бірінің мүдделерін айтарлықтай бұзатын жағдайларда, сот тұрақты ақша сомасында немесе сонымен бірге үлесте/осы Заңның 125-бабына сәйкес/және тұрақты ақша сомасында ай сайын өндіріп алынатын алимент мөлшерін белгілеуге құқылы.

Мұндай жағдайларға үнемі алынбайтын, өзгермелі табысы және (немесе) өзге де кірістері бар ата-аналардан не табысын және (немесе) өзге де кірістерін толығымен немесе ішінара заттай алатын ата-анадан алимент өндіріп алу жатады.

2. Тұрақты ақша сомасының мөлшерін сот баланың бұрынғы қамтамасыз етілу деңгейін мүмкіндігінше барынша сақтауды

негізге алып, тараптардың материалдық және отбасылық жағдайлары мен басқа да назар аударарлық мән- жайларды ескере отырып белгілейді.

3. Егер ата-аналардың әрқайсысының қолында балалар қалатын болса, алимент мөлшерін аз қамтамасыз етілген ата-ананың біреуінен екіншісінің пайдасына осы баптың 2-тармағына сәйкес ай сайын өндіріп алынатын және сот белгілейтін тұрақты ақша сомасы белгіленеді.

128-бап. Ата-анасының қамқорлығынсыз қалған балаларға алиментті өндіріп алу және пайдалану

1. Ата-анасының қамқорлығынсыз қалған балаларға алимент осы Заңның 125-127-баптарына сәйкес өндіріп алынады және балалардың қорғаншысына (қамқоршысына) немесе олардың патронат тәрбиешісіне төленеді.

2. Ата-анасының қамқорлығынсыз қалған және тәрбиелеу, емдеу мекемелері мен өзге де мекемелердегі балаларға ата-аналарынан өндіріп алынатын алимент сол мекемелердің шотына аударылады, онда әр балаға бөлек есептеледі.

Аталған мекемелер бұл соманы банкілерге салуға құқылы. Келіп түскен алимент сомасының айналысынан түскен кірістің елу проценті аталған мекемелердегі балаларды асырап-бағуға пайдаланылады. Бала мұндай мекемеден кеткен кезде оған төленген алимент сомасы және оның айналасынан түскен кірістің елу проценті уәкілетті банкте баланың атына ашылған шотқа аударылады.

129-бап. Еңбекке жарамсыз кәмелетке толған балалардың алимент алуға құқығы

1. Ата-аналар өздерінің көмекке мұқтаж, еңбекке жарамсыз кәмелетке толған балаларын асырап-бағуға міндетті.

2. Алимент төлеу туралы келісім болмаған жағдайда еңбекке жарамсыз кәмелетке толған балаларға алимент төлеу мөлшерін сот алимент төленетін кезде қолданылып жүрген айлық есептік көрсеткішке еселенген қатынасында, тараптардың материалдық және отбасылық жағдайлары мен назар аударарлық басқа да мүдделерін негізге ала отырып белгілейді.

130-бап. Ата-аналардың балаларды асырап-бағуға арналған қосымша шығындарға қатысуы

1. Алимент төлеу туралы келісім болмағанда және ерекше мән-жайлар болғанда (кәмелетке толмаған балалардың немесе еңбекке жарамсыз кәмелетке толған көмекке мұқтаж балалардың

ауыр науқастануы, мертігуі, оларға бөгде адамның бағып-күтуіне ақы төлеу қажеттігі және басқа да мән-жайлар) сот осы мән-жайлар туғызған қосымша шығындарды көтеруге әрбір ата-ананы қатысуға тарту мүмкін.

2. Ата-аналардың қосымша шығындарды көтеруге қатыстырылу тәртібі мен бұл шығындардың мөлшерін сот ата-аналар мен балалардың материалдық және отбасылық жағдайлары мен тараптардың назар аударарлық басқа да мүдделерін негізге ала отырып ай сайын төленуге тиісті алимент төленетін кездегі айлық есептік көрсеткішке еселенген қатынасында белгілейді.

3. Сот ата-аналарды нақты шеккен қосымша шығындарды өтеуге де, балаларды асырап-бағуға болашақта жасалуға тиіс қосымша шығыстарды өтеуге де қатысуға міндеттеуге құқылы.

131-бап. Кәмелетке толған балалардың ата-аналарын асырап-бағу жөніндегі міндеттері

1. Еңбекке жарамды кәмелетке толған балалар өздерінің еңбекке жарамсыз көмекке мұқтаж ата-аналарын асырап-бағуға және оларға қамқорлық жасауға міндетті.

2. Алимент төлеу туралы келісім болмаған жағдайда еңбекке жарамсыз көмекке мұқтаж ата-аналарға алимент олардың еңбекке жарамды кәмелетке толған балаларынан сот тәртібімен өндіріп алынады.

3. Әрбір баладан өндіріп алынатын алимент мөлшерін сот ата-аналары мен балаларының материалдық және отбасылық жағдайлары мен тараптардың назар аударарлық басқа да мүдделерін негізге ала отырып, алимент төлеу кезіндегі айлық есептік көрсеткішке еселенген қатынастарында белгілейді.

4. Алимент мөлшерін айқындау кезінде сот, балаларының бәріне, олардың біреуіне немесе олардың бірнешеуіне талап қойылғанына қарамастан, осы ата-ананың еңбекке жарамды, кәмелетке толған балаларының бәрін ескеруге құқылы.

5. Егер сот ата-аналардың ата-ана міндеттерін орындаудан жалтарғанын анықтаса, балаларының өздерінің еңбекке жарамсыз, көмекке мұқтаж ата-аналарын асырап-бағу жөніндегі міндеттерінен босатылуы мүмкін.

Балалары ата-ана құқықтарынан айырылған ата-аналарына алимент төлеуден босатылады.

132-бап. Кәмелетке толған балалардың ата-аналарына жасалған қосымша шығындарға қатысуы

1. Кәмелетке толған балалар ата-аналарына қамқорлық жасамағанда және ерекше мән-жайлар болғанда (ата-анасы ауыр науқастану, мертігу, оны бөгде адамның бағып-күткені үшін ақы төлеу, оны халықты әлеуметтік қорғау жүйесінің интернат үйіне орналастыру қажет болғанда және т.с.с) кәмелетке толған балаларын сот осы мән-жайлар туғызған қосымша шығындарды көтеруге қатыстыруы мүмкін.

2. Кәмелетке толған балалардың әрқайсысының қосымша шығындарды көтеру тәртібі мен осы шығындардың мөлшерін сот осы Заңның 131-бабының 3,4, 5-тармақтарының ережелері сақталған жағдайда ата-аналар мен балаларының материалдық және отбасы жағдайлары мен тараптардың назар аударарлық басқа да мүдделерін ескере отырып белгілейді.

3. Қосымша шығындарды көтеру тәртібі мен бұл шығындардың мөлшері тараптардың келісуімен белгіленуі мүмкін.

18-тарау

ЕРЛІ-ЗАЙЫПТЫЛАРДЫҢ ЖӘНЕ БҰРЫНҒЫ ЕРЛІ-ЗАЙЫПТЫЛАРДЫҢ АЛИМЕНТТІК МІНДЕТТЕМЕЛЕРІ

133-бап. Ерлі-зайыптылардың бір-бірін асырап-бағу жөніндегі міндеттері

1. Ерлі-зайыптылар бір-бірін материалдық жағынан қолдауға міндетті.

2. Мұндай қолдаудан бас тартқан және ерлі-зайыптылардың арасында алимент төлеу туралы келісім болмаған жағдайда алимент төлеуге қажетті қаражаты бар жұбайдан:

1) еңбекке жарамсыз мұқтаж жұбайының;

2) жүкті кезінде және ортақ баласы туған күннен бастап үш жыл бойы әйелінің;

3) ортақ мүгедек баланы бағып отырған мұқтаж жұбайының бала он сегіз жасқа толғанға дейін;

4) ортақ мүгедек баланы 16 жасқа толғанға дейін бағып-күтіп отырған, сондай-ақ 16 жасқа толғаннан соң ортақ мүгедек балаға I-II топтағы мүгедектік белгіленген жағдайда мұқтаж жұбайының алимент төлеуді сот тәртібімен талап етуге құқығы бар.

134-бап. Бұрынғы жұбайдың неке бұзылғаннан кейін алимент алуға құқығы

1. Алимент төлеуге қажетті қаражаты бар бұрынғы жұбайынан алимент төлеуді сот тәртібімен талап етуге:

1) жүкті кезінде және ортақ баласы туған күннен бастап үш жыл бойы бұрынғы әйелінің;

2) ортақ мүгедек баланы 16 жасқа толғанға дейін бағып-күтіп отырған, сондай-ақ 16 жасқа толған соң ортақ мүгедек балаға I-II топтағы мүгедектік белгіленген жағдайда көмекке мұқтаж бұрынғы жұбайының;

3) неке бұзылғанға дейін еңбекке жарамсыз болып қалған еңбекке жарамсыз көмекке мұқтаж бұрынғы жұбайының құқығы бар.

2. Алименттің мөлшері мен оны неке бұзылғаннан кейін бұрынғы жұбайына берудің тәртібі бұрынғы ерлі-зайыптылардың арасындағы келісім бойынша белгіленуі мүмкін.

135-бап. Ерлі-зайыптылардан және бұрынғы ерлі-зайыптылардан сот тәртібімен өндіріп алынатын алименттің мөлшері

Ерлі-зайыптылардың (бұрынғы ерлі-зайыптылардың) арасында алимент төлеу туралы келісім болмаған жағдайда жұбайдан (бұрынғы жұбайдан) сот тәртібімен өндіріп алынатын алименттің мөлшерін ерлі-зайыптылардың (бұрынғы ерлі-зайыптылардың) материалдық және отбасы жағдайын, тараптардың бақа да назар аударарлық мүдделерін негізге ала отырып, алимент төлеу кезіндегі қолданылып жүрген есептік көрсеткішке еселенген қатынаста сот белгілейді.

136-бап. Жұбайды екінші жұбайды асырап-бағу жөніндегі міндеттен босату немесе бұл міндеттің мерзімін шектеу

1. Сот жұбайдың еңбекке жарамсыз, көмекке мұқтаж екінші жұбайды асырап-бағу міндетінен босатуы немесе некеде тұрған кезеңде де, неке бұзылғаннан кейін де бұл міндетті белгілі бір мерзімге мынадай жағдайларда:

1) спирт ішімдіктеріне, есірткі заттарына, психотропты заттарға салынып кетуі салдарынан немесе қасақана қылмыс жасауы салдарынан көмекке мұқтаж жұбайы еңбекке жарамсыз болып қалған;

2) ерлі-зайыптылар некеде ұзақ тұрмаған;

3) алимент төлеуді талап ететін жұбайдың отбасында өзін лайықты ұстамаған жағдайларда шектеуі мүмкін.

2. Бұрынғы жұбайын асырап-бағу жөніндегі міндет мынадай жағдайларда:

1) көмек алуға құқығы бар жұбай жаңа некеге тұрғанда;

2) осы Заңның 134-бабына көзделген мән-жайлар жойылғанда сот шешімімен тоқтатылады.

19-тарау.
ОТБАСЫНЫҢ БАСҚА МҮШЕЛЕРІНІҢ
АЛИМЕНТТІК МІНДЕТТЕМЕЛЕРІ

137-бап. Ағалары мен апаларының өздерінің кәмелетке толмаған және еңбекке жарамсыз, кәмелетке толған інілері мен сіңлілерін (қарындастарын) асырау жөніндегі міндеттері

Кәмелетке толмаған көмекке мұқтаж інілері мен сіңлілерінің (қарындастарының) өз ата-аналарынан қаражат алуға мүмкіндігі болмаған жағдайда өздерінің алимент төлеуге қажетті қаражаты бар еңбекке жарамды, кәмелетке толған ағалары мен апаларынан сот тәртібімен алимент алуға құқығы бар. Еңбекке жарамсыз, көмекке мұқтаж кәмелетке толған ағалары мен апаларына да, егер олар өздерінің еңбекке жарамды, кәмелетке толған балаларынан, жұбайларынан (бұрынғы жұбайларынан) немесе ата-анасынан көмек ала алмаса, осындай құқық беріледі.

138-бап. Немерелерін асырап-бағу жөніндегі атасы мен әжесінің міндеттері

Өздерінің ата-аналарынан көмек алуы мүмкін болмаған жағдайда, кәмелетке толмаған, көмекке мұқтаж немерелердің өздерінің алимент төлеуге қажетті қаражаты бар әжесі мен атасынан сот тәртібімен алимент алуға құқығы бар. Өздерінің жұбайларынан (бұрынғы жұбайларынан) немесе ата-анасынан көмек ала алмаса, еңбекке жарамсыз, көмекке мұқтаж кәмелетке толған немерелерге де осындай құқық беріледі.

139-бап. Немерелердің атасын және әжесін асырап-бағу міндеті

Өздерінің кәмелетке толған еңбекке жарамды балаларынан немесе жұбайынан (бұрынғы жұбайынан) қажетті қаражат ала алмаған жағдайда, еңбекке жарамсыз, көмекке мұқтаж аталар мен әжелер өздерінің алимент төлеуге қажетті қаражаты бар кәмелетке толған немерелерінен сот тәртібімен алимент талап етуге құқылы.

140-бап. Тәрбиеленушілердің өздерін нақты тәрбиелеушілерді асырап-бағу міндеті

1. Кәмелетке толмаған балаларға нақты тәрбие беруді, асырап-бағуды жүзеге асырушы, еңбекке жарамсыз, көмекке мұқтаж адамдар, егер олар өздерінің кәмелетке толған, еңбекке жарамды балаларынан немесе жұбайларынан (бұрынғы

жұбайларынан) көмек ала алмаса, олар өздерінің кәмелетке толған, еңбекке жарамды тәрбиеленушілерінен көмек беруді сот тәртібімен талап етуге құқылы.

2. Егер тәрбиелеушілер тәрбиеленушілерді бес жылдан аз уақыт асырап- бағып, тәрбиелесе, сондай-ақ өздерінің тәрбиеленушілерінен тиісті түрде асырап-бақпаған және тәрбиелемеген болса, сот тәрбиеленушілерді нақты тәрбиеленушілерін асырап бағу жөніндегі міндеттен босатуға құқылы.

3. Осы баптың 1-тармағында көзделген міндеттер қорғаншылықта (қамқоршылықта), патронатта болған адамдарға жүктелмейді.

141-бап. Өгей ұлдар мен өгей қыздардың өгей әкесін және өгей шешесін асырап-бағу жөніндегі міндеттері

1. Өгей ұлдар мен өгей қыздарын тәрбиелеп, асырап-баққан, еңбекке жарамсыз, көмекке мұқтаж өгей әке мен өгей шешенің, егер өздерінің кәмелетке толған еңбекке жарамды балаларынан немесе жұбайларынан (бұрынғы жұбайларынан) көмек ала алмаса, осыған қажетті қаражаты бар еңбекке жарамды, кәмелетке толған өгей ұлдарынан немесе өгей қыздарынан асырап бағуды сот тәртібімен талап етуге құқылы.

2. Егер өгей әке мен өгей шеше өгей балалары мен өгей қыздарын бес жылдан аз уақыт тәрбиелеп, асырап-бақса, сондай-ақ олар өздерінің тәрбиелеу және асырау міндеттерін тиісті түрде атқармаса, сот өгей ұлдар мен өгей қыздарды өгей әкесі мен өгей шешесін асырап-бағу міндеттерінен босатуға құқылы.

142-бап. Отбасының басқа мүшелерінен сот тәртібімен өндіріп алынатын алименттің мөлшері

1. Осы Заңның 139-141-баптарында аталған адамдарға алименттің мөлшері мен оны төлеу тәртібі тараптардың келісімімен белгіленуі мүмкін.

2. Тараптардың келісімі болмаған жағдайда сот тәртібімен өндіріп алынатын алименттің мөлшерін сот әрбір жеке жағдайда алимент төлеуші мен алушының материалдық және отбасы жағдайы мен тараптардың назар аударарлық басқа да мүдделерін ескере отырып, алимент төлеген кезде қолданылып жүрген есептік көрсеткішке еселенген қатынаста белгілейді.

3. Егер отбасының алимент талап етуші мүшесін бір мезгілде бірнеше адам асырап-бағуға міндетті болса, сот олардың материалдық және отбасы жағдайына қарай әрқайсысының алимент төлеу міндеттерін орындауға қатысу мөлшерін

белгілейді. Алимент мөлшерін белгілеу кезінде сот, алимент төлеуге міндетті барлық адамдардың бәріне, олардың біреуіне немесе олардың бірнешеуіне талап қойылғанына қарамастан, сол адамдардың бәрін ескеруге құқылы.

20-тарау.

АЛИМЕНТ ТӨЛЕУ ТУРАЛЫ КЕЛІСІМ

143-бап. Алимент төлеу туралы келісім жасау

Алимент төлеу (алименттің мөлшері, оны төлеуді шарттарымен тәртібі) туралы келісім алиментті төлеуге міндетті адам мен оны алушы адам арасында, ал алиментті төлеуге міндетті адам және (немесе) алимент алушы әрекетке қабілетсіз болған жағдайда осы адамдардың заңды өкілдері арасында жасалады.

144-бап. Алимент төлеу туралы келісімінің нысаны

1. Алимент төлеу туралы келісім жазбаша түрде жасалады және оны нотариат куәландыруға тиіс.

Алимент төлеу туралы келісімнің заңда белгіленген нысанының сақталмауы Қазақстан Республикасы Азаматтық кодексінің (Жалпы бөлім) 157-бабында көзделген салдарларға әкеп соғады.

2. Алимент төлеу туралы нотариат куәландырған келісім атқару парағының күшіне ие болады.

145-бап. Алимент төлеу туралы келісімді жасасу, атқару, өзгерту, бұзу және жарамсыз деп тану тәртібі

1. Алимент төлеу тәртібі туралы келісімді жасасуға, атқаруға, бұзуға және жарамсыз деп тануға Қазақстан Республикасы Азаматтық кодексінің (Жалпы бөлім) азаматтық-құқықтық мәмілелерді жасасуды, атқаруды, бұзуды және жарамсыз деп тануды реттейтін нормалары қолданылады.

2. Алимент төлеу туралы келісім екі жақтың өзара келісімі бойынша кез келген уақытта өзгертілуі немесе бұзылуы мүмкін. Алимент төлеу туралы келісімді өзгерту немесе бұзу алимент төлеу туралы келісімнің өзі сияқты нысанда жасалуға тиіс.

3. Алимент төлеу туралы келісімді орындаудан біржақты бас тартуға немесе оның шарттарын біржақты өзгертуге жол берілмейді.

4. Тараптардың материалдық немесе отбасы жағдайлары елеулі өзгеріске ұшыраған жағдайда және алимент төлеу туралы келісімді өзгерту немесе бұзу жөніндегі келісімге қол жетпеген

кезде мүдделі тарап осы келісімді өзгерту туралы немесе бұзу туралы сотқа талап беруге құқылы. Алимент төлеу туралы келісімді өзгерту немесе бұзу туралы мәселені шешкен кезде сот тараптардың назар аударарлық кез келген мүддесін ескеруге құқылы.

146-бап. Алимент алушының мүдделерін бұзатын алимент төлеу туралы келісімді жарамсыз деп тану

Егер алимент төлеу туралы келісімде көзделген кәмелетке толмаған баланы немесе кәмелетке толған әрекетке қабілетсіз отбасы мүшесін асырап- бағу шарттары олардың мүдделерін айтарлықтай бұзатын болса, атап айтқанда, осы Заңның 147-бабы 2-тармағының талаптары сақталмаған жағдайда кәмелетке толмаған баланың немесе кәмелетке толған әрекетке қабілетсіз отбасы мүшесінің заңды өкілінің, сондай-ақ қорғаншы және қамқоршы органның немесе прокурордың талап етуі бойынша сот тәртібімен мұндай келісім жарамсыз деп танылуы мүмкін.

147-бап. Алимент төлеу туралы келісім бойынша төленетін алименттің мөлшері

1. Алимент төлеу туралы келісім бойынша төленетін алименттің мөлшерін тараптар сол келісімде белгілейді.

2. Кәмелетке толмаған балаларға алимент төлеу жөніндегі келісім бойынша белгіленетін алименттің мөлшері олардың сот тәртібімен алимент өндіріп алған жағдайда алатын алименттің мөлшерінен төмен болмауы керек (осы Заңның 125-бабы).

148-бап. Алимент төлеу туралы келісім бойынша алимент төлеудің әдістері мен тәртібі

1. Алимент төлеу туралы келісім бойынша алимент төлеудің әдістері мен тәртібі сол келісіммен белгіленеді.

2. Алименттің алимент төлеуге міндетті адам табысына және (немесе) өзге де кірісіне үлес есебімен; дүркін-дүркін төленіп тұратын тұрақты ақша сомасымен; бір жолғы төленетін тұрақты ақша сомасымен; мүлік беру жолымен, сондай-ақ келісімде қол жеткеніне қарай өзге де әдістермен төленуі мүмкін.

Алимент төлеу туралы келісімде алимент төлеудің түрлі әдістерін ұштастыру көзделуі мүмкін.

21-тарау.

**АЛИМЕНТТІ СОТ ТӘРТІБІМЕН ТӨЛЕТТІРУ
ЖӘНЕ ӨНДІРІП АЛУ ТӘРТІБІ**

149-бап. Алиментті сот шешімімен өндіріп алу

Осы Заңның 124-142-баптарында аталған отбасы мүшелері алимент төлеу туралы келісім болмаған жағдайда алимент өндіріп алу туралы талаппен сотқа жүгінуге құқылы.

150-бап. Алимент алу үшін арыз беру мерзімдері

1. Алимент алуға құқығы бар адам, алимент алу құқығы туындаған кезден бастап өткен мерзімге қарамастан, егер бұрын алимент төлеу туралы келісім бойынша алимент төленбеген болса, сотқа алимент өндіріп алу туралы арыз беруге құқылы.

2. Алимент сотқа өтініш жасалған кезден бастап беріледі.

Егер сотқа арыз беруден бұрын асырап-бағуға қаражат алу шаралары қолданылғанын, бірақ алиментті төлеуге міндетті адамның оны төлеуден жалтаруы салдарынан алимент алынбағанын сот анықтаса, сотқа өтініш жасалған кезден бастап үш жыл мерзім шегінде өткен кезеңге алимент өндіріп алынуы мүмкін.

151-бап. Ұйым әкімшілігінің алиментті ұстап қалу міндеті

Алимент төлеуге міндетті адамның жұмыс орны бойынша ұйымның әкімшілігі нотариат куәландырған алимент төлеу туралы келісімнің негізінде немесе атқару парағының негізінде алимент төлеуге міндетті адамның жалақысынан және өзге де кірісінен алимент алушы адам үшін ай сайын алимент ұстап қалуға және оны алимент төлеуге міндетті адамның есебінен алимент төлеуге міндетті адамға жалақының және өзге де кірістің төленген күнінен бастап үш күн мерзімнен кешіктірмей төлеуге немесе аударуға міндетті.

152-бап. Алимент төлеу туралы келісім негізінде алиментті ұстап қалу

Нотариат куәландырған алимент төлеу туралы келісімнің негізінде алимент осындай келісімнің және атқару құжаттарының негізінде ұсталып қалатын жалпы сома алимент төлеуге міндетті адам жалақысының және өзге де кірісінің елу процентінен асқан жағдайда да ұсталып қалуы мүмкін.

153-бап. Алимент төлеуге міндетті адамның жұмыс орнын ауыстырғаны туралы хабарлау міндеті

1. Сот шешімі немесе нотариат куәландырған алимент төлеу туралы келісім негізінде алиментті ұстап қалушы ұйымның әкімшілігі алиментті өндіріп алу жөніндегі шешім орындалатын жердегі сот орындаушысына және алимент алушы адамға алиментті төлеуге міндетті адамның жұмыстан босағаны туралы,

сондай-ақ, өзіне белгілі болса, оның жаңа жұмыс орнын немесе тұратын жерін үш күн мерзім ішінде хабарлауға міндетті.

2. Алимент төлеуге міндетті адам сот орындаушысы белгілеген мерзімде соңғысына және алимент алушы адамға, жұмыс орнының немесе тұратын жерінің өзгергені туралы, ал кәмелетке толмаған балаларға алимент төлеген жағдайда қосымша табысының немесе өзге де кірісінің болуы туралы хабарлауға тиіс.

3. Осы баптың 1 және 2-тармақтарында аталған деректерді дәлелсіз себептермен хабарламаған жағдайда бұған кінәлі лауазымды адамдар және өзге де азаматтар әкімшілік жауапқа тартылады.

154-бап. Алимент төлеуге міндетті адамның мүлкінен өндіріп алу

1. Алимент төлеу туралы келісіммен немесе сот шешімімен белгіленген мөлшерде алимент, сондай-ақ алимент бойынша берешек алимент төлеуге міндетті адамның табысынан және өзге де кірісінен өндіріп алынады, табысы және өзге де кірісі жеткіліксіз болған жағдайда алимент сол алимент төлеуге міндетті адамның банкердегі шотындағы немесе банктік емес қаржы мекемелеріндегі ақша қаражатынан ұсталады. Бұл қаражат жеткіліксіз болған жағдайда ол алимент төлеуге міндетті адамның заң бойынша өндіріп алуға болатын кез келген мүлкінен өндіріліп алынады.

2. Алимент төлеуге міндетті адамның шотындағы ақша қаражатынан және оның өзге де мүлкінен алимент өндіріп алу заңдарда белгіленген тәртіппен жүргізіледі.

155-бап. Алимент бойынша берешекті белгілеу

1. Алимент төлеу жөніндегі келісім негізінде немесе атқару парағының негізінде өткен кезең үшін алимент өндіріп алу атқару парағы немесе нотариат куәландырған алимент төлеу туралы келісім табыс етілгеннен бұрынғы үш жыл мерзім шегінде жүргізіледі.

2. Атқару парағы негізінде немесе нотариат куәландырған келісім негізінде алимент ұстау алиментті төлеуге міндетті адамның іздестірілуіне байланысты жүргізілмеген жағдайда, осы баптың 1-тармағында белгіленген мерзімге қарамастан және асырап-бағуға алимент төлеу белгіленген адамның кәмелетке толғанына қарамастан, алимент бүкіл кезең үшін өндіріп алынады.

3. Берешек мөлшерін сот шешімінде немесе алимент төлеу туралы келісімде белгіленген алимент мөлшерін негізге ала отырып, сот орындаушысы анықтайды.

4. Осы Заңның 125-бабына сәйкес кәмелетке толмаған балаларға төленетін алимент бойынша берешектің мөлшері алимент төлеуге міндетті адамның алимент өндіріп алынбаған кезеңдегі табысы мен өзге де кірісі негізге алына отырып анықталады. Егер алимент төлеуге міндетті адам осы кезеңде жұмыс істемеген болса немесе оның табысы мен өзге де кірісін куәландыратын құжат тапсырылмаса, алимент бойынша берешек сол берешекті өндіріп алу кезіндегі Қазақстан Республикасындағы орташа жалақы мөлшері негізге алына отырып анықталады. Егер берешекті бұлайша анықтау тараптардың бірінің мүддесіне елеулі түрде нұқсан келтірсе, онда мүддесіне нұқсан келтірілген тарап сотқа жүгінуге құқылы, ол тараптардың материалдық және отбасы жағдайын, басқа да назар аударарлық мән-жайларды ескере отырып, берешекті тұрақты ақша сомасында анықтауы мүмкін.

5. Сот орындаушысының алимент бойынша берешекті анықтауымен келіспеген жағдайда кез келген тарап заңдарда көзделген тәртіппен сот орындаушысының әрекетіне шағымдана алады.

6. Алимент төлеуден жалтарып жүрген ата-ананы іздестіру кезеңінде төленген, балаға заңдарда белгіленген ай сайынғы жәрдемақы сомалары сол ата-аналардан төленген сомалардың он процентін бюджет кірісіне есептеу арқылы өндіріп алынады.

156-бап. Алимент бойынша берешекті төлеуден босату

1. Алимент бойынша берешекті төлеуден босату немесе тараптардың келісімі бойынша алимент төлеген кезде осы берешек, кәмелетке толмаған балаларға алимент төлейтін жағдайларды қоспағанда, тараптардың өзара келісуі бойынша азайтылуы мүмкін.

2. Алимент төлеуге міндетті адамның талап-арызы бойынша сот, егер алимент оның сырқаттануына байланысты немесе басқа да дәлелді себептер бойынша төленбегенін, оның материалдық және отбасы жағдайы алимент бойынша пайда болған берешекті өтеуге мүмкіндік бермейтінін анықтаса, оны алимент бойынша берешекті төлеуден толық немесе ішінара босатуға құқылы.

157-бап. Алиментті уақтылы төлемегені үшін жауапкершілік

1. Алимент төлеу туралы келісім бойынша алимент төлеуге міндетті адамның кінәсінен берешек пайда болған жағдайда кінәлі адам сол келісімде көзделген тәртіппен жауапты болады.

2. Сот шешімі бойынша алимент төлеуге міндетті адамның кінәсінен берешек пайда болған жағдайда кінәлі адам алимент алушыға кешіктірген әр күні үшін төленбеген алимент сомасының оннан бір проценті мөлшерінде тұрақсыздық айыбын төлейді.

Алимент алушы алимент төлеуге міндетті, алименттің уақтылы төленбегеніне кінәлі адамнан алименттік міндеттемелерді орындауды кешіктіруден келтірілген бүкіл залалының тұрақсыздық айыбымен жабылмаған бөлігін де өндіріп алуға құқылы.

158-бап. Алиментті есептеуге және кері өндіріп алуға жол берілмеуі

1. Алиментті басқа қарсы талаптармен есептеуге болмайды.

2. Төленген алимент сомасын:

1) алимент алушының жалған мәліметтер хабарлауына байланысты немесе оның қолдан жасалған құжаттар беруіне байланысты алимент өндіріп алу туралы сот шешімінің күші жойылған;

2) алимент алушы тарапынан алдау, қорқыту немесе күш көрсетіп ықпал жасау салдарынан алиментті төлеу жөніндегі келісім жарамсыз деп танылған;

3) сот шешімінің, алимент төлеу туралы келісімнің немесе атқару парағының қолдан жасалу фактісі негізінде алимент төленгені сот үкімімен анықталған жағдайларды қоспағанда, кері талап етуге болмайды.

3. Егер осы баптың 2-тармағында келтірілген әрекеттерді кәмелетке толмаған баланың немесе кәмелетке толған әрекетке қабілетсіз алимент алушының өкілі жасаған болса, алимент кері өндіріліп алынбайды, ал төленген алименттің сомасы алимент төлеуге міндетті адамның талабы бойынша кінәлі өкілден өндіріп алынады.

159-бап. Алиментті индекстеу

Сот шешімі бойынша тұрақты ақша сомасымен өндіріп алынатын алименттің индекстелуін алиментті ұстайтын орын бойынша ұйымның әкімшілігі заңда белгіленген айлық есептік көрсеткіштің өсуіне бара-бар жүргізеді.

160-бап. Алимент төлеуге міндетті адам шет мемлекетке тұрақты тұруға кеткен жағдайда алимент төлеу

1. Алимент төлеуге міндетті адам шет мемлекетке тұрақты тұруға кеткен жағдайда ол заң бойынша қаражат беруге міндетті отбасы мүшелерімен осы Заңның 143,144,147 және 148-баптарына сәйкес алимент төлеу туралы келісім жасасуға құқылы.

2. Келісімге қол жетпеген жағдайда мүдделі адам алименттің мөлшерін тұрақты ақша сомасында белгілеу туралы немесе алиментті бір жолғы төлеу туралы не алимент есебіне белгілі бір мүлікті беру туралы немесе алиментті өзге бір жолмен төлеу туралы талап етіп сотқа жүгінуге құқылы.

161-бап. Соттың бұрын белгіленген алимент мөлшерін өзгерту және алимент төлеуден босату

1. Егер алимент төлеу туралы келісім болмаған жағдайда алимент мөлшері сот тәртібімен белгіленгеннен кейін тараптардың бірінің материалдық немесе отбасылық жағдайы өзгерсе, сот кез келген тараптың талап етуі бойынша белгіленген алимент мөлшерін өзгертуге немесе алимент төлеуге міндетті адамды оны төлеуден босатуға құқылы. Алимент мөлшері өзгертілген немесе оны төлеуден босатылған жағдайда сот тараптардың назар аударарлық мүддесін де ескеруге құқылы.

2. Егер кәмелетке толған әрекетке қабілетті адам алиментті төлеуге міндетті адамға қатысты қасақана қылмыс жасағаны немесе кәмелетке толған әрекетке қабілетті адам отбасында лайықсыз мінез-құлық көрсеткен жағдайы анықталса, сот оған алимент өндіріп беруден бас тартуға құқылы.

162-бап. Алименттік міндеттемелерді тоқтату

1. Алимент төлеу туралы келісіммен белгіленген алименттік міндеттемелер осы келісімнің күшінде болу мерзімі біткенде немесе осы келісімде көзделген негіздер бойынша, сондай-ақ тараптардың бірі қайтыс болғанда тоқтатылады.

2. Сот тәртібімен өндіріп алынатын алиментті төлеу:

1) бала кәмелетке толғаннан кейін немесе кәмелетке толмаған балалар кәмелетке толғанға дейін толық әрекетке қабілетін алған жағдайларда;

2) асырап-бағу үшін алимент өндіріп алынған бала асырап алынғанда;

3) сот алимент алушының еңбекке жарамдылығы қалпына келтірілген немесе көмекке мұқтаждығы тоқтатылған деп танығанда;

4) еңбекке жарамсыз, бұрынғы жұбайының көмегіне мұқтаж болып келген алимент алушы жаңа некеге тұрғанда;

5) алимент алушы адам немесе алимент төлеуге міндетті адам қайтыс болғанда тоқтатылады.

6-БӨЛІМ. АЗАМАТТЫҚ ХАЛ АКТІЛЕРІ

22-тарау ЖАЛПЫ ЕРЕЖЕЛЕР

163-бап. Азаматтық хал актілерін тіркеу

Туу, қайтыс болу, неке қию, некені бұзу, бала асырап алу, әке (ана) болуды анықтау, атын, әкесінің атын және тегін өзгерту азаматтық хал актілерін жазатын мемлекеттік органдарда, ал мұндай органдар жоқ жерлерде - аудандық маңызы бар қалада, кентте, ауылда (селода), ауылдық (селолық) округте - тиісті әкім аппаратында тіркелуге тиіс.

164-бап. Азаматтық хал актілерін тіркеуді жүргізетін органдар

Азаматтық хал актілерін тіркеуді азаматтық хал актілерін жазатын бөлімдер, ал мұндай бөлімдер жоқ жерлерде жергілікті атқарушы органдар жүргізеді.

165-бап. Азаматтық хал актілерін тіркеу ережелері.

Акт кітаптары

1. Азаматтық хал актілері жазбаларын өзгерту, қалпына келтіру және күшін жою тәртібін белгілейтін ережелер, сондай-ақ азаматтық хал актілерін тіркеу кітаптарының нысанын және осы кітаптардағы жазбалар негізінде берілетін куәліктердің нысанын, акт кітаптарын сақтаудың тәртібі мен мерзімін Қазақстан Республикасының Үкіметі белгілейді.

2. Азаматтық хал актілерін тіркеу ережелері, сондай-ақ некеге тұратын адамдардың денсаулық жағдайы мен отбасы жағдайы туралы бірін-бірі хабардар ету, олардың болашақ ерлі-зайыптылар және ата-аналар ретіндегі құқықтары мен міндеттерін түсіндіру тәртібі осы Заңмен және Қазақстан Республикасының Үкіметі бекітетін Азаматтық хал актілерін тіркеу тәртібі туралы нормативтік құқықтық актімен белгіленеді.

166-бап. Мемлекеттік баж

1. Тууды тіркеу, әке болуды анықтау, бала асырап алу, неке қию, некені бұзу, тегін, атын және әкесінің атын, ұлтын және жынысын өзгерту үшін, сондай-ақ туу, неке, некені бұзу, қайтыс болу туралы актілердің жазбаларын өзгертуге, толықтыруға, түзету мен қалпына келтіруге байланысты куәліктер және азаматтық хал актілерін тіркеу туралы қайталап куәліктер беру үшін Қазақстан Республикасының Салық кодексінде белгіленген мөлшерде мемлекеттік баж алынады.

2. Қайтыс болуды тіркеу, сондай-ақ азаматтық хал актілерін тіркеу кезінде жіберілген қателерге байланысты куәліктер беру Қазақстан Республикасының Салық кодексіне сәйкес мемлекеттік баж алынбай жүргізіледі.

167-бап. Азаматтық хал актілеріндегі жазбаларды өзгерту, толықтыру және түзету тәртібі

1. Жеткілікті негіздер болған жағдайда және мүдделі адамдардың арасында дау тумаған жағдайда азаматтық хал актілері жазбаларына өзгерістер, толықтырулар мен түзетулер енгізуді азаматтық хал актілерін жазатын органдар жүргізеді. Мүдделі адамдардың арасында дау туған жағдайда азаматтық хал актілеріндегі жазбаларға өзгерістер енгізу, оларды түзету мәселелері сот тәртібімен шешіледі.

2. Азаматтық хал актілеріндегі жазбаларға өзгерістер, толықтырулар мен түзетулер енгізу туралы арыздар - арыз берушінің тұрақты тұратын жері бойынша азаматтық хал актілерін жазатын органға, ал шетелде тұрақты тұратын Қазақстан Республикасы азаматтарының, сондай-ақ азаматтық хал актілерін Қазақстан Республикасының азаматтық хал актілерін жазатын органдарында тіркелген және шетелде тұрақты тұратын шетелдіктер мен азаматтығы жоқ адамдар Қазақстан Республикасының шетелдік мекемелері беріледі.

3. Азаматтық хал актілеріндегі жазбаларға өзгерістер, толықтырулар мен түзетулер енгізуді жазба жазылған жер бойынша азаматтық хал актілерін жазатын орган жүргізеді. Азаматтық хал актілерін жазуға өзгерістер, толықтырулар мен түзетулер енгізуден бас тартуға сот тәртібімен шағым жасалуы мүмкін.

168-бап. Азаматтық хал актілерінің жазбаларын қалпына келтіру

1. Азаматтық хал актілерінің жоғалған жазбаларын қалпына келтіру туралы арыз сол арызды берушінің тұрақты тұратын жері бойынша азаматтық хал актілерін жазатын органға, ал шетелде

тұрақты тұратын Қазақстан Республикасы азаматтарының, сондай-ақ азаматтық хал актілері Қазақстан Республикасының азаматтық хал актілерін жазатын органдарында тіркелген және шетелде тұрақты тұратын шетелдіктер мен азаматтығы жоқ адамдардың арыздары Қазақстан Республикасының шетелдік мекемелеріне беріледі.

2. Азаматтық хал актілері жазбаларын қалпына келтіру тиісті жазбаның бұрын болғанын растайтын құжаттар болған жағдайда немесе сот шешімінің негізінде жасалады.

3. Азаматтық хал актілері жазбасының жоғалғаны сол жоғалған жазба болған жер бойынша азаматтық хал актілері жазбасының облыстық (қалалық) архиві растауға тиіс.

4. Азаматтық хал актілерін жазатын органдардың жоғалған жазбаны қалпына келтіруі мүмкін болмаған жағдайда азаматтық хал актілерін тіркеу фактісі Қазақстан Республикасының Азаматтық іс жүргізу кодексінде белгіленген ережелер бойынша сот тәртібімен анықталады.

5. Азаматтық хал актілерінің қалпына келтірілген жазбаларын тіркеуді жоғалған жазба болған жердегі азаматтық хал актілерін жазатын орган жүргізеді.

169-бап. Азаматтық хал актілеріндегі жазбаларды жою

1. Азаматтық хал актілері жазбасының:

1) сот шешімінің негізінде;

2) мүдделі адамдардың арызы бойынша;

3) жойылуға тиісті бастапқы, қалпына келтірілген немесе қайталап жазылған жазбаны тапқан азаматтық хал актілерін жазатын органның бастамасымен жойылуы мүмкін.

2. Азаматтық хал актілері жазбаларын жою туралы арыз сол арыз берушінің тұрақты тұратын жері бойынша - сотқа немесе азаматтық хал актілерін жазатын органға, ал шетелде тұрақты тұратын Қазақстан Республикасы азаматтарының, азаматтық хал актілері Қазақстан Республикасының азаматтық хал актілерін жазатын органдарында тіркелген және шетелде тұрақты тұратын шетелдіктер мен азаматтығы жоқ адамдардың арыздары Қазақстан Республикасының шетелдік мекемелеріне беріледі.

3. Азаматтық хал актілері жазбаларын жою жойылуға тиісті жазба болған жерде жүргізіледі.

170-бап. Азаматтық хал актілерін жазу ережелерін бұзғаны үшін лауазымды адамдардың жауапкершілігі

Лауазымды адамдар азаматтық хал актілерін тіркеуден негізсіз бас тартқаны үшін, халықтың табиғи қозғалысын есепке

алу жөніндегі мәліметтерді белгіленген мерзімде тапсырмағаны немесе теріс мәліметтер тапсырғаны үшін, сондай-ақ бала асырап алу құпиясын жария еткені үшін (осы Заңның 91-бабы) заңда белгіленген тәртіппен жауап беруге тиіс.

171-бап. Азаматтардың некеге тұруға кедергі келтіретін мән-жайларды жасырғаны немесе азаматтық хал актілерін жазатын органдарға жалған мәліметтер бергені үшін жауапкершілігі

Некеге тұруға кедергі келтіретін мән-жайларды жасырғаны немесе азаматтық хал актілерін жазатын органдарға жалған мәліметтер бергені үшін азаматтар заңдарға сәйкес жауап береді.

23-тарау. ТУУДЫ ТІРКЕУ

172-бап. Тууды тіркеу тәртібі

1. Балалардың тууын тіркеуді азаматтық хал актілерін жазатын органдар баланың туған жері бойынша немесе ата-анасының не олардың біреуінің тұрғылықты жері бойынша жүргізеді.

2. Туу туралы арызды ата-аналары немесе олардың біреуі, ал ата-аналары қайтыс болған, науқастанған жағдайда немесе басқа да себептермен арыз беру мүмкін болмаған ретте мүдделі адамдар немесе бала туған кезде шешесі жатқан емдеу мекемесінің әкімшілігі жазбаша немесе ауызша түрде береді. Арызға емдеу мекемесінің анықтамасы, ал бала үйде туған жағдайда дәрігердің, басқа бір медицина қызметкерінің немесе олар болмаған жағдайда кемінде екі куәнің арызы қоса беріледі. Азаматтық хал актілері жазылатын кітаптарға ата-анасын, ата-анасының атын, әкесінің атын, тегін, ұлтын жазу осы Заңның 49, 50, 55-баптарының 1-3-тармақтарына сәйкес жүргізіледі.

3. Кәмелетке толмаған ата-аналардың баласын тіркеу (осы Заңның 61-бабы) жалпы тәртіппен жүзеге асырылады.

173-бап. Әкесі қайтыс болғаннан кейін немесе некебұзылғаннан кейін не неке заңсыз деп танылғаннан кейін туған балалардың тууын тіркеу

Некеде тұрған кезде бойға біткен және әкесі қайтыс болғаннан кейін немесе неке бұзылғаннан кейін не неке заңсыз деп танылғаннан кейін туған баланың тууын тіркеу, егер әкесі қайтыс болған немесе неке бұзылған не ол заңсыз деп танылған күннен екі жүз жетпіс күннен аспаған болса, жалпы негізде жүргізіледі.

174-бап. Туу туралы арыз беру мерзімдері

Туу туралы арыз азаматтық хал актілерін жазу органдарына бала туған күннен бастап екі айдан, ал бала өлі туған жағдайда босанған кезден бастап бес тәуліктен кешіктірмей жасалуға тиіс.

175-бап. Тауып алынған баланың туылғанын тіркеу тәртібі

Тауып алынған баланың туылғаны, егер ол бұрын тіркелмеген болса, оны тауып алған адамның, балалар мекемесі әкімшілігінің немесе ішкі істер органдарының мәлімдемесі бойынша тауып алынған күннен бастап үш тәуліктен кешіктірмей тіркелуге тиіс. Мәлімдемеге бала тауып алынған уақытты, орынды және мән-жайларды көрсетіп, ішкі істер органы немесе аудандық (қалалық) атқарушы органдар жасаған хаттама қоса тіркеледі.

176-бап. Тууды салтанатты жағдайда тіркеу

Ата-аналардың тілегі бойынша азаматтық хал актілерін жазу органы баланың тууын салтанатты жағдайда - азаматтық хал актілерін жазу органының үй-жайында, сондай-ақ азаматтық хал актілерін жазатын органдар мен жаңа туған баланың ата-аналарының келісімімен өзге жерде тіркеуді Азаматтық хал актілерін тіркеу тәртібіне сәйкес қамтамасыз етеді.

177-бап. Туу туралы жазбалар кітабына енгізілетін мәліметтер

1. Баланың туу туралы жазбалар кітабына баланың туған уақыты, туған жері, жынысы, оған қойылған аты, тегі, әкесінің аты, сондай-ақ ата-аналарының аты, әкесінің аты, тегі олардың тұрақты тұратын жері және ата-ананың тілегі бойынша олардың ұлты жазылуға тиіс.

Жазылған жазбаға сәйкес тууы туралы куәлік беріледі.

2. Бала өлі туған жағдайда туу туралы жазбалар кітабындағы ерекше бағанада тиісті белгі жасалады.

24-тарау. ӘКЕ БОЛУДЫ АНЫҚТАУДЫ ТІРКЕУ

178-бап. Әке болуды анықтауды тіркеу тәртібі

1. Әке болуды анықтауды тіркеу осы Заңның 46-бабының 4-тармағында көзделген жағдайларда ата-ананың біреуі тұратын жер бойынша азаматтық хал актілерін жазу органдарында, ал осы Заңның 47-бабында көзделген жағдайларда әке болуды анықтау туралы сот шешімі шығарылған жердегі азаматтық хал актілерін жазу органдарында жүргізіледі.

2. Кәмелетке толған адамдар жөнінде әке болуды анықтауды тіркеуге олардың келісімімен ғана жол беріледі.

179-бап. Әке болуды анықтау туралы куәлік және баланың тууы туралы жаңа куәлік беру

Әке болуды анықтауды тіркеген кезде азаматтық хал актілерін жазу органдары әке болуды анықтау туралы актілерді тіркеу кітабына бала, оның анасы мен әкесі туралы мәліметтерді жазады, әке болуды анықтау туралы куәлік және баланың тууы туралы жаңа куәлік береді.

25-тарау. НЕКЕНІ ТІРКЕУ

180-бап. Некені тіркеу туралы арыз

Некесін тіркегісі келетін адамдар арыз берушінің біреуі тұратын жердегі не өздерінің ата-аналары тұратын жердегі азаматтық хал актілерін жазу органына арыз береді.

181-бап. Некеге тұратын адамдардың арыздарын қабылдау

1. Некеге тұратын адамдар:
 - 1) жеке басын куәландыратын құжаттарды;
 - 2) белгіленген неке жасын кеміту қажет екенін растайтын, осы Заңның 10-бабында аталған құжаттарды;
 - 3) бұрынғы некелері туралы мәліметтерді;
 - 4) балалары туралы мәліметтерді көрсетуге міндетті.
2. Некеге тұратын адамдармен келісе отырып, некені тіркеу мерзімі белгіленеді (осы Заңның 13-бабы).

182-бап. Некені тіркеу тәртібі

1. Некені тіркеу азаматтық хал актілерін жазу органдарында (бөлімдерінде), ал мұндай органдар жоқ жерлерде - аудандық маңызы бар қалада, кентте, ауылда (селода), ауылдық (селолық) округте - әкім аппаратында жүргізіледі.

Жоғарыда аталған органдардың лауазымды адамы:

- 1) некеге тұру ниеті туралы берілген арыздарды жария етеді;
- 2) некелесушілерге болашақ жұбайлардың құқықтары мен міндеттерін түсіндіреді;
- 3) некеге тұруға келісетінін және жұбайлардың қалап алатын тектерін анықтайды.

2. Неке қиюға кедергі жоқ болған жағдайда азаматтық хал актілері жазылатын кітапқа неке туралы жазба жасалады, оған

некеге тұратындар қол қояды және оны азаматтық хал актілерін жазу органының лауазымды адамы қол қойып бекітеді.

183-бап. Некені салтанатты жағдайда тіркеу

Некені тіркеу салтанатты жағдайда - азаматтық хал актілерін жазу органдарының некені салтанатты түрде тіркеуге арнайы белгіленген үй-жайларында, сондай-ақ азаматтық хал актілерін жазу органдары мен некеге отыратын адамдардың келісуі бойынша өзге жерлерде де жүргізілуі мүмкін.

184-бап. Неке туралы жазбаны тоқтата тұру

Неке туралы жазба жасалғанға дейін некені тіркеу үшін кедергілер бар екендігі туралы арыз түскен жағдайда лауазымды адам жазбаны тоқтата тұруға және арыз берушіден белгіленген мерзімде тиісінше деректі айғақтар беруді талап етуге міндетті. Бұл мерзім бір айдан аспауы керек.

185-бап. Ерлі-зайыптыларға неке туралы куәлік беру

Некені тіркеу өткізілгеннен кейін ерлі-зайыптыларға неке туралы куәлік беріледі.

26-тарау. НЕКЕНІҢ БҰЗЫЛУЫН ТІРКЕУ

186-бап. Сот шешімі бойынша некенің бұзылуын тіркеу

Некенің тоқтатылуын соттың заңды күшіне енген шешімі негізінде тіркеу (осы Заңның 22-бабы) сот шешімі шығарылған жердегі азаматтық хал актілерін жазу органында некенің бұзылғаны туралы заңды күшіне енген сот шешімінің көшірмесі және сот шешімі бойынша өндіріп алынуға тиісті соманың төленгені туралы түбіршектің негізінде жүргізіледі.

187-бап. Некенің бұзылуын ерлі-зайыптылардың өзара келісімі бойынша тіркеу

1. Кәмелетке толмаған балалары жоқ ерлі-зайыптылардың өзара келісімі бойынша некенің бұзылуын тіркеу (осы Заңның 16-бабының 1-тармағы) ерлі-зайыптылардың екеуі немесе біреуі тұратын жердегі азаматтық хал актілерін жазу органына некені бұзу туралы ерлі-зайыптылардың бірлесіп берген арызы негізінде жүргізіледі.

2. Некенің бұзылуын ресімдеу және некенің бұзылғаны туралы куәлікті ерлі-зайыптыларға беру олар өтініш берген күннен бастап бір ай өткеннен кейін жүргізіледі.

188-бап. Хабар-ошарсыз кеткен, әрекетке қабілетсіз немесе ұзақ мерзімге бас бостандығынан айыруға сотталған адаммен некенің бұзылуын тіркеу

1. Хабар-ошарсыз кеткен, әрекетке қабілетсіз немесе қылмыс жасағаны үшін кемінде үш жыл мерзімге бас бостандығынан айыруға сотталған (осы Заңның 16-бабының 2-тармағы) адаммен некенің бұзылуын тіркеуді екінші жұбайдың арызы мен соттың заңды күшіне енген шешімінің немесе үкімінің көшірмесін не шешім яки үкімнен алынған үзіндіні көрсету негізінде азаматтық хал актілерін жазу органы жүргізеді.

2. Азаматтық хал актілерін жазу органы арыз түскен күннен бастап бір апта мерзімде қамауда жатқан жұбайға не әрекетке қабілетсіз жұбайдың қорғаншысына немесе хабар-ошарсыз кеткен жұбайдың мүлкіне қорғаншыға хабарлама алынған күннен бастап он бес күн мерзім белгілей отырып хабарлауға міндетті, осы мерзім ішінде олар арыз бойынша өздерінің арасында дау бар екені туралы хабарлауға құқылы.

189-бап. Некенің бұзылуы туралы куәлік беру

1. Некенің бұзылуын тіркеу жасалғаннан кейін тараптардың әрқайсысына олардың арызы бойынша некені бұзылғаны туралы куәлік беріледі.

2. Егер неке сот тәртібімен бұзылса, некенің бұзылуы туралы куәлікте некенің бұзылуы туралы сот шешімінің заңды күшіне енгізілетін күні көрсетілуге тиіс.

27-тарау БАЛА АСЫРАП АЛУДЫ ТІРКЕУ

190-бап. Бала асырап алуды тіркеу негізі

Бала асырап алу соттың заңды күшіне енген бала асырап алу туралы шешімі негізінде бала асырап алу азаматтық хал актілерін жазу органдарында тіркеледі.

191-бап. Бала асырап алуды тіркеу орны

Бала асырап алуды тіркеу бала асырап алу туралы сот шешімі шығарылған жерде жүргізіледі.

192-бап. Бала асырап алу туралы куәлік және баланың тууы туралы жаңа куәлік беру

Азаматтық хал актілерін жазу органдары бала асырап алу туралы куәлік береді. Асырап алынған баланың тегін, атын және әкесінің атын өзгерткен жағдайда (осы Заңның 86-бабы), сондай-

ақ туу туралы жазбалар кітаптарына бала асырап алушыны асырап алынған баланың ата-анасы ретінде жазғанда (осы Заңның 88-бабы) туу туралы жаңа куәлік беріледі.

193-бап. Бала асырап алу туралы жазбаны жою

1. Бала алу туралы жазба бала асырап алудың күшін жою туралы немесе бала асырап алуды жарамсыз деп тану туралы заңды күшіне енген сот шешімі негізінде жойылады.

2. Егер бала асырап алудың күші олардың өтініші бойынша жойылса, бала асырап алуды жою туралы өтінішті баланың ата-анасы, егер оның талап етуі бойынша бала асырап алудың күшін жою жасалса, қорғаншы немесе қамқоршы орган береді.

28-тарау
АТЫН, ӘКЕСІНІҢ АТЫН ЖӘНЕ ТЕГІН
ӨЗГЕРТУДІ ТІРКЕУ

194-бап. Атын, әкесінің атын және тегін өзгертуді тіркеу тәртібі

1. Қазақстан Республикасы азаматтарының тегін, атын, әкесінің атын өзгертуіне олар он алты жасқа толғаннан кейін рұқсат беріледі. Тегін, атын, әкесінің атын өзгертуді және оны тіркеуді арыз берушінің тұрғылықты жеріндегі азаматтық хал актілерін жазу органдары жүргізеді. Тегін, атын, әкесінің атын өзгертуден бас тарту жөнінде сотқа заңда белгіленген мерзімде шағым жасалуы мүмкін.

2. Тегін, атын, әкесінің атын өзгерту туралы өтініштерді қарау Қазақстан Республикасының Үкіметі белгілейтін тәртіппен жүргізіледі.

29-тарау
ҚАЙТЫС БОЛУДЫ ТІРКЕУ

195-бап. Қайтыс болуды тіркеу тәртібі

1. Қайтыс болу жағдайы, сондай-ақ азаматты өлді деп жариялау туралы және өлу фактісін анықтау туралы сот шешімдері азаматтық хал актілерін жазу органдарында тіркеледі.

2. Қайтыс болуды тіркеу өлген адамның тұрған жеріндегі немесе ол қайтыс болған жердегі азаматтық хал актілерін жазу органдарында жүргізіледі.

3. Адамды өлді деп жариялау туралы және өлу фактісін анықтау туралы сот шешімдерін тіркеу шешім шығарылған жерде жүргізіледі.

196-бап. Қайтыс болуы туралы мәлімдеме беру мерзімі

Қайтыс болу туралы мәлімдеме жеті тәуліктен кешіктірмей, ал адам зорлықпен өлтірілсе, өзін-өзі өлтірсе, жазатайым жағдайдан өлсе, сондай-ақ өлік табылған жағдайда өлген немесе өлік табылған кезден бес күннен кешіктірмей берілуге тиіс.

197-бап. Қайтыс болу туралы мәлімдеме беретін адамдар мен органдар

Қайтыс болу туралы мәлімдемені өлген адаммен бірге тұрған адамдар, ал ондай адамдар болмаған жағдайда көршілері, тұрғын үй-пайдалану ұйымдарының қызметкерлері немесе адам қайтыс болған жердегі мекеменің әкімшілігі немесе өлікті тапқан ішкі істер органы жазбаша немесе ауызша түрде жасайды.

198-бап. Қайтыс болу туралы мәлімдеменің мазмұны

Қайтыс болу туралы мәлімдемеде мәлімдеуші өлген адам туралы мына мәліметтерді: өлген адамның аты, әкесінің аты, тегі, туған жылы, соңғы тұрған жері және оның отбасылық жағдайы, қайтыс болған жылы, айы мен күні, қайтыс болу себебі, сондай-ақ қайтыс болу туралы мәлімдеме жасаған адамның аты, әкесінің аты, тегі және тұрғылықты жері көрсетіледі.

199-бап. Қайтыс болу фактісін куәландыру

1. Қайтыс болу фактісі дәрігердің куәлігімен, ал оны беру мүмкін болмаған жағдайда екі куәнің айғағымен куәландырылады.

2. Өліктің табылғаны туралы мәлімдемеге тиісті мемлекеттік органдар жасаған хаттама қоса тіркеледі.

**7-БӨЛІМ. НЕКЕ-ОТБАСЫ ЗАҢДАРЫ
НОРМАЛАРЫНЫҢ
ШЕТЕЛДІКТЕР МЕН АЗАМАТТЫҒЫ ЖОҚ
АДАМДАРҒА ҚОЛДАНЫЛУЫ**

200-бап. Қазақстан Республикасының аумағында неке қию

1. Қазақстан Республикасының аумағында неке қиюдың нысаны мен тәртібі Қазақстан Республикасының заңдарымен белгіленеді.

2. Қазақстан Республикасының аумағында неке қиюдың ережелері, егер халықаралық шартта өзгеше көзделмесе, некеге тұратын адамдардың әрқайсысының некеге тұратын кезде қай мемлекеттің азаматы болса, сол мемлекеттің заңдарымен, осы Заңның 9-11-баптарының неке қиюға кедергі болатын мән-жайлар жөніндегі талаптарын сақтай отырып белгіленеді.

3. Азаматтығы жоқ адамның Қазақстан Республикасының аумағында некесін қию ережелері сол адамның тұрақты тұратын жері бар мемлекеттің заңдарымен белгіленеді.

201-бап. Қазақстан Республикасының шетелдік мекемелерінде неке қию

1. Қазақстан Республикасының аумағынан тыс жерлерде тұратын Қазақстан Республикасының азаматтары арасындағы неке Қазақстан Республикасының шетелдік мекемелерінде қиылады.

2. Қазақстан Республикасының шетелдік мекемелерінде шетелдіктер арасында қиылған некелер, егер бұл адамдар некелескен кезде Қазақстан Республикасындағы елшісін немесе консулын тағайындаған шет мемлекеттің азаматтары болып табылса, екі жаққа бірдей болу шартымен Қазақстан Республикасында заңды деп танылады.

202-бап. Қазақстан Республикасының аумағынан тыс жерлерде қиылған некені тану

1. Қазақстан Республикасының аумағынан тыс жерлерде Қазақстан Республикасы азаматтарының арасында қиылған некелер және Қазақстан Республикасының азаматтары мен шетелдіктердің немесе азаматтығы жоқ адамдардың арасында қиылған некелер олар аумағында неке қиылған мемлекеттің заңын сақтай отырып жасалса, осы Заңның 11-бабында көзделген жағдайларды қоспағанда, Қазақстан Республикасында заңды деп танылады.

2. Қазақстан Республикасының аумағынан тыс жерлерде шетелдіктер арасында қиылған некелер, олар аумағында жасалған мемлекеттің заңдарын сақтай отырып қиылса, Қазақстан Республикасында заңды деп танылады.

203-бап. Қазақстан Республикасының аумағында немесе Қазақстан Республикасының аумағынан тыс жерлерде қиылған некенің заңсыздығы

Қазақстан Республикасының аумағында немесе Қазақстан Республикасының аумағынан тыс жерлерде жасалған некенің

заңсыздығы осы Заңның 200, 202- баптарына сәйкес неке қию кезінде қолданылған заңдармен айқындалады.

204-бап. Некенің бұзылуы

1. Қазақстан Республикасының азаматтары мен шетелдіктер немесе азаматтығы жоқ адамдар арасындағы некені, сондай-ақ Қазақстан Республикасының аумағында шетелдіктер арасындағы некені бұзу Қазақстан Республикасының заңдарына сәйкес жүргізіледі.

2. Қазақстан Республикасының аумағынан тыс жерлерде тұратын Қазақстан Республикасының азаматы Қазақстан Республикасынан тыс жерлерде тұратын жұбайымен некені оның азаматтығына қарамастан Қазақстан Республикасының сотында бұзуға құқылы. Қазақстан Республикасының заңдарына сәйкес некені азаматтық хал актілерін жазу органдарында бұзуға жол берілетін жағдайда неке Қазақстан Республикасының шетелдік мекемелерінде бұзылуы мүмкін.

3. Қазақстан Республикасынан тыс жерлерде Қазақстан Республикасының азаматтары мен шетелдіктер немесе азаматтығы жоқ адамдар арасындағы некені бұзу тиісті шет мемлекеттің заңдарын сақтай отырып жасалса, Қазақстан Республикасында заңды деп танылады.

4. Қазақстан Республикасының аумағынан тыс жерлерде шетелдіктер арасындағы некені бұзу тиісті шет мемлекеттің заңдарын сақтай отырып жасалса, Қазақстан Республикасында заңды деп танылады.

205-бап. Ерлі-зайыптылардың мүліктік емес және мүліктік жеке құқықтары мен міндеттері

Ерлі-зайыптылардың мүліктік емес және мүліктік жеке құқықтары мен міндеттері аумағында екеуінің бірге тұратын жері бар мемлекеттің заңдарымен, ал екеуінің бірге тұратын жері болмаған жағдайда - аумағында екеуінің бірге тұрған соңғы жері болған мемлекеттің заңдарымен белгіленеді. Бұрын бірге тұрған жері болмаған ерлі-зайыптылардың мүліктік емес және мүліктік жеке құқықтары мен міндеттері Қазақстан Республикасының аумағында Қазақстан Республикасының заңдарымен белгіленеді.

206-бап. Әке (ана) болуды анықтау және даулау

1. Әке (ана) болуды анықтау және даулау бала туған кезде азаматы болған мемлекеттің заңдарымен айқындалады.

2. Әке (ана) болуды анықтаудың және даулаудың тәртібі Қазақстан Республикасының аумағында Қазақстан

Республикасының заңдарымен белгіленеді. Егер Қазақстан Республикасының заңдарында азаматтық хал актілерін жазу органдарында әке (ана) болуды анықтауға жол берілсе, баланың Қазақстан Республикасының аумағынан тыс жерлерде тұратын тым болмаса біреуі Қазақстан Республикасының азаматы болып табылатын ата-анасы әке (ана) болуды анықтау туралы Қазақстан Республикасының шетелдік мекемелеріне арыз беруге құқылы.

207-бап. Ата-аналардың және балалардың құқықтары мен міндеттері

Ата-аналардың және балалардың құқықтары мен міндеттері, соның ішінде ата-аналардың балаларын асырап-бағу жөніндегі міндеті аумағында олардың бірге тұратын жері бар мемлекеттің заңдарымен белгіленеді. Ата-аналар мен балалардың бірге тұратын жері болмаған жағдайда ата-аналардың және балалардың құқықтары мен міндеттері бала азаматы болып табылатын мемлекеттің заңдарымен белгіленеді. Талапкердің талап етуі бойынша алименттік міндеттемелерге және ата-ана мен балалардың арасындағы басқа да қатынастарға аумағында бала тұрақты тұратын мемлекеттің заңдары қолданылуы мүмкін.

208-бап. Кәмелетке толған балалардың және басқа да отбасы мүшелерінің алименттік міндеттемелері

Кәмелетке толған балалардың ата-аналарының пайдасына алименттік міндеттемелері, сондай-ақ басқа да отбасы мүшелерінің алименттік міндеттемелері аумағында олардың бірге тұратын жері бар мемлекеттің заңдарымен белгіленеді. Бірге тұратын жері болмаған жағдайда мұндай міндеттемелер алимент алуға құқығы бар адам азаматы болып табылатын мемлекеттің заңдарымен белгіленеді.

209-бап. Бала асырап алу

1. Қазақстан Республикасының аумағында шетелдіктердің, азамат-тығы жоқ адамдардың Қазақстан Республикасының азаматы болып табылатын баланы асырап алуы, соның ішінде бала асырап алудың күшін жою осы заңның 76-78, 82-84 және 96-баптарының талаптарын сақтай отырып Қазақстан Республикасының заңдарына сәйкес жүргізіледі.

2. Қазақстан Республикасының аумағында Қазақстан Республикасының азаматтары шетелдік болып табылатын баланы асырап алған жағдайда баланың заңды өкілінің және бала азаматы болып табылатын мемлекеттің құзыретті

органының келісімін, сондай-ақ егер аталған мемлекеттің заңдарына сәйкес талап етілетін болса, асырап алуға баланың да келісімін алу қажет.

3. Қазақстан Республикасының азаматы болып табылатын және Қазақстан Республикасынан тыс жерлерде тұратын баланы асырап алуды бала асырап алушы азаматы болып табылатын шет мемлекеттің құзыретті орган жүргізген ретте Қазақстан Республикасының аумағынан тыс жерлерге кеткенге дейін баланың тұратын аудандық (қалалық) атқарушы органнан немесе оның ата-анасынан (олардың біреуінен) бала асырап алуға алдын-ала рұқсат алынған жағдайда Қазақстан Республикасында заңды деп танылады.

4. Егер бала асырап алудың нәтижесінде баланың Қазақстан Республикасының заңдарында және Қазақстан Республикасының халықаралық шарттарында белгіленген құқықтары бұзылса, бала асырап алудың күші сот тәртібімен жойылуға тиіс.

5. Қазақстан Республикасының азаматы болып табылатын балаларды шетелдіктерге асырап алуға берудің тәртібін Қазақстан Республикасының Үкіметі белгілейді.

6. Шетелдіктерге асырап алуға берілген балаларға бақылау жасауды Қазақстан Республикасының шетелдік мекемелері жүзеге асырады.

210-бап. Қазақстан Республикасынан тыс жерлерде тұратын Қазақстан Республикасы азаматтарының азаматтық хал актілерін тіркеу

1. Қазақстан Республикасынан тыс жерлерде тұратын Қазақстан Республикасы азаматтарының азаматтық хал актілерін тіркеу Қазақстан Республикасының шетелдік мекемелерінде жүргізіледі.

2. Қазақстан Республикасының шетелдік мекемелерінде азаматтық хал актілерін тіркеу кезінде, егер мүдделі адамдар Қазақстан Республикасының азаматтары болса, Қазақстан Республикасының заңдары қолданылады.

211-бап. Азаматтық хал актілерінің жасалғанын растайтын шет мемлекеттердің құжаттарын тану

Қазақстан Республикасынан тыс жерлерде Қазақстан Республикасының азаматтары, шетелдіктер және азаматтығы жоқ адамдар жөнінде тиісті мемлекеттердің заңдары бойынша азаматтық хал актілерінің жасалғанын растайтын шет мемлекеттердің құзыретті органдары берген құжаттар консулдық

ресмилендірілген жағдайда Қазақстан Республикасында жарамды деп танылады.

212-бап. Басқа мемлекеттердің неке-отбасы заңдарының Қазақстан Республикасында қолданылуы

Басқа мемлекеттердің неке-отбасы заңдарының нормалары оларды қолдану Қазақстан Республикасының заңдарына қайшы келген жағдайда қолданылмайды. Бұл жағдайда Қазақстан Республикасының заңдары қолданылады.

213-бап. Халықаралық шарттар

Егер Қазақстан Республикасы бекіткен халықаралық шартта Қазақстан Республикасының неке және отбасы туралы заңдарында белгіленгенінен өзгеше ережелер белгіленсе, халықаралық шарттың ережелері қолданылады.

*Қазақстан Республикасының
Президенті*

Н.Ә. НАЗАРБАЕВ

Ынтымақов С. А. Карпушина Т. Д.

Отбасы құқығы

Практикум

***ЖШС «Заң әдебиеті» бас директоры
Жансейтов Н. Н.***

***Басылымға жауапты қызметкерлер: Омарқожаева Г.К., Төребаева Г.А.
Сараишы: Оспанова Д. К.
Беттеуші: Төребаева Г.А.
Дизайн: Савельев А.О.***

Басуға 31.03.2006 қол қойылды. Офсеттік басылыс.
Пішімі 60×90¹/₁₆. Қағазы офсеттік. Қаріп түрі «Таймс».
Есептік баспа табағы 8. Шартты баспа табағы 6.
Таралымы 500. Тапсырыс № 64.

«Заң әдебиеті» баспасы
050057, Алматы қ.,
М. Өзтүрік к-ші, 12-үй
Тел./факс: (3272) 747-833, 742-650.
E-mail: law_literature@nursat.kz

ЖШС «Заң әдебиеті» баспаханасында басылған.